

Acts

Luke-el pip atherr ingkwernek. Angka ingwer Luke, Jesus-penh, rarl ilek-ilek mpwarek, arntety-rnem mwerrilek, rarl akngerr akalty-anthek. Ahelengkwel-rnem renh atanthek, arwerl iylpeyl-atherrek. Ra ilwek. Rernem renh intey-warl akwernek. Ingwa atherr-penh Jesus ra itethirrek. Akemirrek-anem. Akngeyel renh ipmepenh itethilek rlterrk ilkwakertel. Jesus kwertengerl ikwerenh-rnemek lwewarrernelhek. Rernem renh Akngey-kenh apmer-warl alpenty intwarek. Angka anyent ingweran Akngey-kenh Angka arlperryirrekarl, apmer arrpanenh-warl. Akngey-kenh Itnweng apetyek ikwer-rnem-warl, renh-rnem rlterrkiletyek, arnkatyiletyek. Akalty ingkerr Jesus-kenh angka awak-penh, rernemarl renh aytarek-penh, angka mwerr-angker rernem apmer arrpanenhek ilerl-apenh. Acts-kenh angka aynteyel, rernem ilerl-apenh Akngey-kenh angka mwerr-angker. Luke-el Acts pip ingkwernek, Akngey-kenh angka ingkerrenh-angkwarr arlpimpilek, rernem Jesus anyent renh iterl-arayntetyek.

Angka mwerr-angker ilerl-apayntetyek

¹ Theophilus-ay, pip weth iterl-aray, atharl awank ingkwernek, angka Jesus-kenh ingkerrenh, rarl akngerr ingkerrenh-angkwarr akalty-anthek, arntety-rnem-then mwerrilek, apmer arrpanenhek. Ra akely ayntek, rarl ilkwerrek,

rarl warrkirrek, rarl akngerr akalty-anthek, rarl ilwek.

² Ra alker-warl alpey-alentyel ra angkakert ikwerenh-rnem Itnweng Rlwartel akalty-anthek, rernem-anem apmer arrpanenh-itwek akalty-anthetyek ikwerenh-angkwarr-antey.

³ Irrwampenty awelhemel ilwek-penh, Jesus ra angkep arrpemarl itethirremel aremirrenhey-alpek, arlta 40-ek-atwety arrpemarl. Ikwerenhel-rneman renh arnarek akngerr-inger, rarl angkep ikwer-rnem-warl aremirrek, rarl itethirremel akwentek awenng-they. Jesus-el renh-rnem ilek, Akngey anyent aknganenty anyent ingkerrenhek. Jesus-el renh-rnem akalty-anthek, Akngeyellarl ikwerenh-rnem arntarnt-aretyek.

⁴ Jesus-an angkek kwertengerl ikwerenh-rnem, "Alpey-angenh Jerusalem-they! Alerl, arrantherr mpwelhenherr-arey, Akngeyel arrenhantherr Itnweng anthetyek, atharl arrenhantherr arrwekel ilek-angkwarr, Akngeyellarl ingkerrenh alhelek, ingkerrenh ra Itnweng anthetyek.

⁵ John-el ikwerenh-rnem kwatyelant baptise-emelek. Arlta irrpety-inger-penh, arrantherr baptise inem Itnweng rlterrk ikwerenh-anem, Akngeyel Itnweng ikwerenh thwenem arrekantherr-warl."

Jesus alker-warl alpeyel

⁶ Kwertengerl ikwerenh-rnem ikwer-itwek anenharl-antey, rernem Jesus renh ayernek, "Ingkartay, ntwang Rome-areny-rnem irrenteyenh, artwa Israel-areny anyent rlwanemel arrernem, anwekantherr atyetyart ilkwa anayntetyek?"

⁷ Jesus angkek ikwer-rnem-warl, “Akngey rantarl iterl-areyel arlta, atyetyart ilkwa arrer-netyek. Rant akalty.

⁸ Itnweng ikwerenharl apetyem arrekanterr-warl, ingkerrenh Itnweng ikwerenh-akert rl-terrk anetyek. Apmer ingkerrenh-angkwarr arrantherr iletiek, apmer arrpanenhek, apmer Jerusalem-areny-rnemek, apmer Judea-areny-rnemek, apmer Samaria-areny-rnemek, ahern ingkerrenh-angkwarr arrantherr ilerl-apayntetyek angka atyenh.”

⁹⁻¹⁰ Jesus rarl ilek-penh, kwertengerl ikwerenh-rnemel renh intwarek, rarl kwenpay-angkwarr ywerrerl-alhek alker-warl. Rernem renh arey-angenh-anem. Rernem ikwer ywarn-antey itny-wenenh, renh aretyek-arrpantey, ra ikwer-rnem-kety ywerrenhek. Artwa atherr arnkwa arlter-akert-atherr ikwer-rnem-warl aremirrek.

¹¹ Ratherrap angkek, “Ilekek Galilee-areny-rnem arrantherr alkeran itnyweneyel? Jesus ra alpek irrwerl-warl! Ingwer-ingerant ra apey-alpeyenh, wetharl arrantherr renh intwarek-apeny arrpemarl.”

Kwertengerl-rnemel Matthias renh rlwaneyel, kwertengerl anetyek

¹²⁻¹³ Kwertengerl rernem apmer Jerusalem-warl-anem alpek, apwert arwerl alip-angketyarr-warl. Apwert Jerusalem-they arrer ayn-tenh. Rernem warl kwen-warl aylpenhek, itnan rernem Peter, John, James, Andrew, Philip, Thomas, Bartholomew, Matthew, James,

Alphaeus-kenh alerikw, Simon, rarl Rome-areny-rnem-then atwerrenh, Judas-then, James-kenh alerikw. Rernem warl irrwerl-warl aylpenhek, irrkaty rernemarl awank anenh-warl.

¹⁴ Kwertengerl rernem anyent-antey Akngey-warl angkenh. Arlta arrpanenhel Mary arelh ingwer-rnem-then Jesus-kenh ayteyikw ingwer-rnem-then, rernem kwertengerl ikwerenh-rnem-itwek anyentirrenh, Akngeyek angkayntetyek.

¹⁵ Arlta ingwerel, 120 innganem Jesus-kenh kwertengerl-rnem akarrirrek. Peter-anem rtnerl-alhemel, ikwer-rnem-warl angkek.

¹⁶⁻¹⁷ “Atyenh-rnemay, awank-akerr Itnwengel David renh akaltyilek, Judas renh iterl-aretyek, rarl Jesus ahelengkw-rnem-warl ahayiweyenh, rernem renh ipmek atwetyek. Angka nhenh arraty innga. Judas rarl anwekantherr-itwek warrkirrenh. Ran innga Jesus renh ahelengkw-rnem-warl ahayiwek.” Alakenh Peter angkek.

¹⁸ (Rernem Judas renh man antheke, ra renh-rnem atnwenhey-alhetyek Jesus ikwer-warl. Judas-el apmer renh payemelek-anem, man ikwerel. Judas ra ipmek atwelhek. Ra aytnerl-alhek, ilwemel-anem. Atnalty-rnem aytnek ahern-warl.)

¹⁹ Jerusalem-areny-rnem rernem ingkerrenhel awek, Judas rarl ilwek, Jesus renh ahelengkw-rnem-warl ahayiwek-penh. Judas-arl ikwer-itwek ilwek, rernem apmer renh itnewek Arrkn-gangketyarr.)

²⁰ Peter-el renh-rnem ilek arrpemar, “Akngey-kenh angka arrwekeleny Psalm pip-itwekan arrwekel aynteyelar, Judas ra ilwekerr-away: ‘Warl ikwerenh arltwanem aynteyenh.

Ingwerenty aney-angenh-anem arrangkw innganem. Ingwerenty-anem warrk ikwerenh-warl arrernelhetyek, rarl ilwek-kety.’

²¹⁻²² Artwa anyent-anem anwantherr arrerneyek, rarl ilerl-apayntetyek apmer arrpanenh-itwek, Jesus rarl itethirremel akwentek. Artwa anyent akaltyirrek Jesus-angkwarr ywerreyek-atwety, Jesus renharl ra aytarek, renharl John-el baptise-emelek, rarl renh aleth-antey Jesus renh apentek, alker-warl alpekek-atwety.”

²³ Rernem iterrenh artwa nthenh-apeny rlwanetyek, ranem angkakert anetyek. Artwa anyent Joseph Barsabbas, ingweran Matthias.

²⁴⁻²⁶ Rernem Akngey-anem ayernek. “Ntwa ingkerrenh iterl-areyel, aleth-antey. Ntwa anwekantherr anayntila, anwantherr artwa anyent arraty rlwanetyek, angkakert anetyek, Judas rarl ilwek-kety, rarl apmwangkwarr amentewarl alhenh.” Apwert atherr-anem irrwerl-warl-athek iwek arrkernelhemel. Apwert ratherr ahern-warl aytnek apek apwert-itwek ayntek. Apwert ikwer-itwek Matthias itna ayntek. Artwa Matthias rantey antengilek. Matthias ikwer-rnem-warl anyentirrek.

2

Itnweng Rlwart ikwer-rnem-warl apetyeyel

¹ Pentecost arlta anyent ikwerel-antey Jesus ikwerenh-rnem akarrirrek.

² Rernem awek awer-apeny arwerlk angkenty.

³ Anyentel-anyentel akapwert-warl lherrm-apyeny arrernelhek, rernem warl kwen-itwek rtnehh-warl.

⁴ Itnweng Rlwart ra ikwer-rnem-warl antelhek, rernem angka ingwerek-ingwer angkerrenh, ingkerrenh awerrey-angenhant-arey.

⁵ Jew-rnem apmer arrpanenh-they arwa apetyek, apmer Jerusalem ikwer-itwek anerl-alpetyek. Rernem Inkart-angkwarr apenteh.

⁶⁻⁷ Arwerlk angkenty rernem awek, rernem ingkerrenh anyentirrek. Rernem ywarn iterrek, rernem angka ingkerrenhel angkerrenh. "Nhenh-rnem Galilee-areny-rnem.

⁸ Nthakenh rernem angka ingwerek-ingwer angkerreyel? Anantherr renh-rnem aweyel, rernemarl angka anwekantherr-apyenarl angkeyel.

⁹ Ingwer-rnem Parthia-areny-arl, Media-areny-arl, Elam-areny-arl, Mesopotamia-arenyarl, Judea-arenyarl, Cappadocia-arenyarl, Pontus-arenyarl, Asia-arenyarl,

¹⁰ Phrygia-arenyarl, Pamphylia-arenyarl, Egypt-arenyarl, Libya-arenyarl, Cyrene tawen-they arrer, ingwer-rnem apmer Rome-they apetyek.

¹¹ Ingwer-rnem Jew lyerteny-rneman, ingwer-rnem Jew akely-penh-rnem, Crete-areny, Arabia-areny. Rernem angkerreyel, 'Akngey rlterrk inngan.' "

¹² Rernem ywarn iterrek. Ingwer-rnem angkerrenh, "Ilek-arrpantey nhenhan?"

¹³ Ingwer-rnemel renh-rnem arrkernelhilenh, terangk rernem angkerrerl-arenty-arrpantey.

Peter angkeyel ingkerrenhek

¹⁴ Peter ra kwertengerl 11-pel-itwek rtnenh. Ra aketh innga renh-rnem ilek, “Atyenh-rnem, arrantherr ingkerrenh Jerusalem-areny atyeng mwantysel awelhenherr-arey, atharl arrekanterr ilem.

¹⁵ Arrantherr apmwel-areth iterreyel terangk-rnem-arrpantey ilerl-anemel. Nhenhan ingwepenh arwarl, nthakenh terangk irrey-angenh ingwepenhan.

¹⁶ Akngey-kenh angkakert Joel ra awank-akerr anenh.

¹⁷ Akngey angkek ikwer-angkwarr: ‘Arlta ingkern ikwerel atha ingkerrenh-anem Itnweng atyenh antheyenh ingkerrenhekek. Ikwer-penh away arrekanttherrel-rnem kwey arrekatherrel-rnem angka atyenh ileyenh. Ayeng artwa akely-rnem arrekanttherrenh-warl aremirreyenh, artwa ampwernem-warl-then, rernem altyerr areyenh.

¹⁸ Atha artwa warrkenh-rnem-then arelh warrkenh-rnem-then Itnweng atyenh anthem. Angka atyenh ingwer-rnem-warl rernem ileyenh.

¹⁹ Athanem ingwerek-ingwer lwewarrerneyek alker-itwek-then, ahern-itwek-then. Rernem rwa lherrm areyenh, kwert-then, arrkngethen.

²⁰ Ingkeny ra ingwemernt irreyenh, alkent ra rnter-rnter irreyenh, arrkngapeny. Ikwer-penh Ingkart ra apey-alpeyenh rlterrk ilkwakert.

²¹ Arlta ingkern ikwerel, Ingkartel renh-rnem arntarnt-areyenh, rernemarl renh ayernenty, ra renh-rnem arntarnt-aretyek.’ Alakenh-anyem

Joel-kenh pip-itwek aynteyel.

²² Artwa Israel-kenh-rnem, arrantherr atyeng awelhenherr-arey, atharl arrenhantherr ilem, Jesus Nazareth-areny ikwer. Akngey rantey Jesus ikwer inkwerelhek, renh rlterr-kilemel, ilek-ilek-angkwarr ra mpwarayntetyek. Kel arrantherr arek rarl ilek-ilek mpwarek.

²³ Akngey ra arrwekel-antey iterrek, Jesus arrekantherr-warl thwenetyek, ingkerrenhek katy ilwetyek. Ra arrekantherr-warl kel thwenek. Arrantherr artwa apmwernem-warl-then artwa ahelengkw-rnem-warl ahayiwek, rernem renh ipmek atwetyek, rernem renh arwerl iylpeyl-atherrek atantek.

²⁴ Akngeyel renh angkep arrpemarl itethilek, rlterr-ikwerenh-akertel. Arrewaly-rnem awenng-itwek aynteyel. Rernem ywarn-antey ament akemirreyenh. Jesus ra awengel ayntenh arrpemarl. Akngeyel renh akemelhilek, rlterr-ikwerenh-akertel.

²⁵ Atyetyart David-el ingkwernek pip-warl arrwekel-antey Jesus-arl aremirreyenh. Ra alakenh-anyem ingkwernek: 'Ingkart ra atyeng-itwek arrer aneyel. Artwa ingwer-rnem ywarn atyeng arrkernelheyenh, ayenh ilpertiletiek.

²⁶ Ayeng irrkngerney-anem aneyel, Akngeyekant-anem ayeng inkwerelhemel. Ayeng alhewer-anem anayntem, rarl ayenh arntarnt-areyel.

²⁷ Ingkartel ayenh iwerl-alhey-angenh awenng-itwek. Ra ayenh arntarnt-areyenh, awenng-itwek, ayenh iwerl-alhey-angenh, ngarl atyeng ilkelheyel.

²⁸ Ra ayenh akalty-anthek, arraty-angkwarr anetyek, ayeng aknganekarl iteth aneyenh. Ra ayenh irrkngerney anthek, atyeng-itwek intem-antey aneyenh.' ”

²⁹ Peter angkek arrpemar, “Atyenh-rnem, angka David-kenh ayeng arraty angkeyel. Ra ilwek, rernem David renh awenng-warl akw-ernek. Aleyan awenng ikwerenh aynteyel-antey.

³⁰ David ra Inkart-kenh angkakert anenh. Ra iterl-arek, Akngeyelarl renh alhelek, artwa anyent ikwer-rnem arrernetyek, ra atyetyart ilkwa anetyek.

³¹ David ra iterl-arek, Inkartel angkep anyent impen akemelhileyenh. Ra ilek, Akngeyel renh awenng-itwel iwerl-alhey-angenh.

³² Akngeyel Jesus renh innga akemelhilek, arrewaly-penh itethilemel. Anwernantherr akalty, anwernantherr renh angetherr aytaremel arek.

³³ Jesus ranem alker-warl alpek, Akngey-itwek aney-alpek. Akngeyel Itnweng renh alhelek, renh anthetyek, Jesus ra Itnweng rlterrk anwen-hantherr antheyel. Aleyan arrantherr areyel-anem, aweyel-anem, Itnweng renhey-antey.

³⁴ David ra alker-warl alhey-angenh. Ra angka nhenh ingkwernek, ament ikwerenh-angkwarr-weny: ‘Inkart angkek Inkart atyenh-warl, “Atyeng-itwel ana!

³⁵ Artwa apmwernem atha antengiletiek, rl-terrk ilkwakertel, renh-rnem ywerrelhilemel, rernem ngkweng awelhetyek.” ’

³⁶ Israel-kenh-rnem ingkerrenh, arrantherr nhenhek ingkerrenhel iterl-aretyek, Jesus ir-

rkaty weth nhenhan arrantherr arwerl iylpeyl-atherrel atanthekarl. Akngeyel Christ arrenek, ra Inkart arrekantherr ingkerrenhek anetyek.”

³⁷ Angka rernem awek-penh, rernem ywarn iterremel-anem anenh. Peter-anem rernem ayernek, kwertengerl ingwer-rnem-then, “Nthakenh-angkwarr arrantherr irreman?”

³⁸ Peter angkek, “Akngey-warl angkep irrenherr-arey, baptise inemel, itna Jesus-angkwarr, Akngeyelarl apmwa arrekantherrety iwem. Ikwer-penhan Itnweng Rlwart ra antelheyenh arrekantherr-warl, arrekantherr-itwek intem anetyek.

³⁹ Alakenh-anyem Akngeyel arrekantherr arrenek, ampernemek-then ingkerrenhek, Itnweng ikwerenh thwenetyek. Apmer ingwer-areny-rnem-then Akngeyel ikwer-rnem arrenek arrpemar, Itnweng ikwerenh thwenetyek.”

⁴⁰ Peter-el renh-rnem akalty-anthek arrpemar aleth-antey, “Arrantherr artwa apmwernem-the y angkep irretyek.”

⁴¹ Rernem-anem Peter-ek awelhek. Rernem-anem Peter-warl apetyek, renh-rnem baptise-emeletyek. Arlta ikwerel-antey, Akngeyel artwa 3,000 innga anyentelhilek kwertengerl ikwerenh-rnem-warl.

Angka tyaty-areny arrwekeleny-rnemek

⁴² Angkakert-rnem rernem-anem ingwer-rnem akaltyilek. Rerneman aleth-antey anyentirrenh, amern arlkwetyek, Akngey-warl-anem rernem angketyek.

⁴³ Akngey Inkartel kwertengerl-rnem akalty-ilek, rernem ilek-ilek mpwaretyek. Angkakert

rennem ilek-ilek mpwarek. Akngey Ingkart aremirrek, ikwer-rnem-warl, rlterrk ilkwakert. Ingwerel-rnem rlterrk-akert arek-penh, rennem ater-anem irrek.

⁴⁴ Rennem anyent irrenh, rennem mwerrant-arey anenh. Man-rnem-then rennem antherrenh arwa alhewer-antey, ampwal-rnem-then.

⁴⁵ Ampwal ingkerrenh rennem tharlemilek, arrangkwarl anenh-rnem-then ingkerrenh arwa rennem man antheke irrepenn-rnem.

⁴⁶ Arlta arrpanenh rennem anyentirrenh tyaty ilkwa Jew-rnem-kenh-warl, warl ilkwa anyent-itwek. Apmer ingwer-rnem-warl rennem alhenh, anyentirretyek amern arwa arlkwayntetyek.

⁴⁷ Rennem irrkngerney ingkerrenh anenh, Akngeyek inkwerelhemel. Ingwer-rnem ikwer-rnem inkwerelhek-antey arrpemar, rennemarl iylpareth anenhek. Arlta arrpanenhel Ingkartel ingwer-rnem pweytilenh, akngerram-akngerr ilemel, rennem Jesus ikwer-angkwarr iteth anayntetyek.

3

Peter-el artwa lerrp mwerrileyel

¹ Arlta ingwerel atwerrp 3 o'clock-el Peter-atherr John-atherr alhek, Jew-rnem-kenh tyaty ilkwewarl, Akngey-warl angketyek.

² Arlta arrpanenhel ingwer-rnemel artwa lerrp renh akngenh, arriw ikwer-warl renh arrrenenh. Iwerr keyt rennem itnewek Keyt Mwerr-angker. Iwerr-angkwarr alhenh-rnem artwa lerrpel ngkweltyek ayerney-ayntenh. Ratherr arek artwa lerrp renh.

³ Artwa ra John-atherr Peter-atherr ayerney-ayntek ngkwelty anthetyek, artwa lerrp renh, ratherr ikwer-angkwarr alhek warl kwen-warl.

⁴ Ratherr renh arek, atherrel-antey. Peter angkek ikwer-warl, "Aylenhanth ara!"

⁵ Artwa lerrpel renh-atherr arek, ratherr ngkwelty anthentyek-arrpantey.

⁶ Peter ikwer angkek, "Ayeng ngkweltyek arrangkw! Atha ngenh ileyel, Jesus Christ Nazareth-areny itnangkwarr rtnerl-alha!"

⁷⁻⁸ Peter-el ilya arraty-they renh anterrkwemel rnkernek. Ingkety rlterrk-anem irrek, ra atnarnpek inkwerelhemel, alhemel-anem. Ra Peter-atherr John-atherr-angkwarr alhek, atnarnperl-apemel, Akngeyek inkwerelhemel.

⁹ Ingwerel-rnem arek rarl Ingkartek inkwerelherl-apenh.

¹⁰ Rernem artwa renh aketh-antey alhengk-arek rarl iwerr ikwerel mpwelhemel artwernem manek arlkarewey-ayntenh Keyt Mwerr-angker-itwek. Rernem ywarn iterrek, "Nthakenh-anem artwa nhenh irrekan?"

Peter-el angka Jesus-kenh ileyel

¹¹ Artwa ra Peter-atherr John-atherr anterrkwenh-antey, akngerr ikwer-atherr-warl akarrirrek. Lywenty ra itna Solomon-kenh Lywenty.

¹² Peter-el renh-rnem arek, rernemarl ikwer-atherr-warl akarrirrenh, ra angkek, "Israel-kenh-rnemay, ilekek arrantherr aylenhanth artewentyel areyel, aylanth rlterrk-arrpantey?"

Arrantherr apek iterreyel aylanth mwerr-arrpantey?

¹³ Inkart Akngey irrkaty-antey aneyel. Abraham, Isaac, Jacob rernem ikwer inkwerelhekan-antey. Ra Jesus, alerikw ikwerenhek inkwerelhekan. Artwa irrkaty rey-antey ahelengkw-rnem-warl ahayiwek, renh ipmek atwetyek. Arrantherr ikwerety intwemelirrek. Pilate-el tyarlewetyek angkek, arrantherr ikwerety arlkarirrek.

¹⁴⁻¹⁵ Jesus ra arraty innga anenh. Arrantherr ikwerety arlkarirrenh. Arrantherr Pilate renh ayernekan, artwa apmwa tyarlewetyek, artwa mwerrant atwemel. Itethiley-angkerarlap ran. Artwa rarl arrenhantherr irrpelthel itethilek, renh arrantherr ipmek atwek. Akngeyel renh angkep itethilek. Anwantherr-anem akalty, anwantherr renh iteth arek-penh.

¹⁶ Artwa lerrp nhenhel Jesus tnakeyel rlterrk ilkwakert. Alakenh-anyem Akngeyel renh mwer-rilek, Jesus-kenh itnangkwarr. Kel yanhey-antey arrantherr arek.

¹⁷ Atyenh-rnemay, arrantherr Atyetyart-rnemel-then apalel Jesus renh ipmek atwek.

¹⁸ Akngeyel angkakert ingwer-rnem-angkwarr arrwekel-antey ilek, Jesus ra irrwampenty awelhey-alenty, artwa apmwel-rnem renh atwey-alenty. Akngey-kenh Angka ranem innga aynteyel.

¹⁹ Arrantherr Akngey-warl angkepirretyek apmwekety, rarl apmwa arrekantherrety iwem.

²⁰ Akngeyel rlterrk arrenhantherr antheyenh, ra Jesus arrekantherr thweneyenh.

²¹ Jesus ra alkerel-antey anem, Akngeyel

ahern nhenh lyertynyiletyek, angkakert arwekeleny ingwer-rnemarl awank-akerr ilek-angkwarr-antey.

²² Akngeyel renh-rnem Moses-angkwarr ilek, 'Angkakert ingwer-anem atha arrekanterr-warl thweneyenh. Ra Angkakert Moses-apeny anem, arranterr ikwer awelh-ayntetyek.

²³ Ingwer apek angkakert ikwer irrpelthirrenty, Akngeyel renh iwerl-alhem intem-antey.' Alakenh-anyem Akngey-kenh angka aynteyel.

²⁴ Samuel-then angkakert ingwer-then rernem Akngey-kenh Angka akalty-anthek, Artwa Impen nhenhey-antey. Angkakert rernem ingwer-rnem Moses-they ingkern akalty-anthek Akngey-kenh angka arrpemarl.

²⁵ Arranterr alakenh Akngey-angkwarr apentetyek. Angka Akngeyel arrernek arrwekeleny-rnemek. Angka ra Akngeyel Abraham ilek, 'Ngkwenh-rnem-angkwarr angka atyenh arlpimpirreyenh, apmer arrpanenh-angkwarr, ahern-areny ingkerrenhel ayenh iterl-arayntetyek-awaty.'

²⁶ Akngeyel alerikw ikwerenh arrekanterr-warl-tangkwel thwenek, arranterr ikwer-warl angkepirretyek apmwekety."

4

Jew-rnem-kenh atyetyart-rnemel Peter John ikwer-atherr ileyel, ratherr Jesus-kenh angka akalty-anthey-angenh anetyek

1-2 Peter-atherr John-atherr ratherr akngerr ingwer-rnem akalty-anthenh, Jesus ipmepenh akemirrekarl. Ratherr renh-rnem ilenh, ingwer-rnem angkep ipmepenh itethirreyenh, Jesus-apyeny. Artwa tyaty-areny ingwer-rnem, atyetyart ilkwa ahelengkw-rnem-kenh, Sadducee-rnem-then, rernem apetyek ikwer-atherr-warl. Rernem ikwer-atherr ahelirrek.

³ Ingkeny kwenirreynenh-anem, ahelengkwel-rnem renh-atherr anterrkwek, tyaylek-anem akwernemel, ingwepenhek-atwety.

⁴ Akngerr ingwer-rnem ratherrarl renh-rnem akalty-anthek, rernem Jesus tnakek. Inkart-rnem akngerr-anem irrek, 5,000.

⁵ Ingwepenh artwa ampwernem-then Moses-kenh angkakert-rnem-then Atyetyart Jew-rnem-then rernem Jerusalem-itwek akarrirrek.

⁶ Atyetyart tyaty-areny ilkwa Annas, Caiaphas, John, Alexander, Annas-kenh ingwer-rnem-then, rernem ingkerrenh akarrirrek.

⁷ Rernem Peter-then John-then akngetyek tyayl-they, renh-atherr ampep-itwek arrernek, rernem renh-atherr ayern-ayntetyek. Rernem renh-atherr ayernek, "Angwenhel mpwelenhanth rlterrkilek, artwa lerrp mwerriletyek? Angwenh-kenh itnangkware mpwelanth itethileyel? Angwenhel mpwelenhanth rlterrkilek, mpwelanth arntety-rnem mwerriletyek?"

8-9 Akngey-kenh Itnweng Rlwart-akertel Peter renh rlterrkilek. Peter-el renh-rnem ilek, "Atyetyart-rnemay, artwamp-rnem-then, arran-

therr aylernanth ayerneyel, nthakenh aylernanth artwa lerrp renh mwerrilek?

¹⁰ Aylernanth-anem arrenhantherr Israel-areny ingkerrenh iletiek. Aylernanth artwa lerrp renh mwerrilek, Jesus Christ Nazareth-areny-kenh itnangkwar. Arrantherr Jesus renh arwerl iylpeyl-atherrel atanthek ilwetyek-atwety. Akngey Ingkartel renh angkep ipmepenh itethilek.

¹¹ 'Arrantherr renh apmwek-athen arenh. Ran inngarl, anyent impen.'

¹² Jesus rant ingwer angkep itethilem. Jesus-kenh itnakertelant anwantherr itethirrem."

¹³ Atyetyart-rnem apatek, ratherrarl alhewer-antey ikwer-rnem-warl angkenh nyerrirrey-angenh, arnkaty innga. Rernem renh-atherr iterl-arenh, ratherr akwerrp anenh, akaltyirrey-angenh-antey awank. Artwa rernem iterl-arek, ratherrarl Jesus-itwek anenh awank.

¹⁴ Artwa lerrp-penh ra ikwer-atherr-itwek rtenh. Artwa ra aherrety 40-pel anenh, rarl mwerrirrek. Atyetyart-rnem apatek.

¹⁵ Atyetyart-rnemel Peter-then John-then aketh-warl irrentek. Rernem ament-anem angkerrenh,

¹⁶⁻¹⁷ "Nthakenh-anem artwa nhenh-atherr anwantherr ileman? Jerusalem-areny-rnemel kelarl iterl-areyel, ratherrarl renh mwerrilek. Anantherr nthakenh arrangkw iley-angenharl. Ingwer-rnemel awekerr, anwantherr renh-atherr menty iletiek Jesus-kenh angka ikwer."

¹⁸ Rernem ikwer-atherr yangkelhek, ratherr apetyetyek. Atyetyartel-rnem renh-atherr

artwerilek, “Mpwelanth Jesus-kenh Angka ingwer-rnem akalty-anthey-angenh anetyek.”

¹⁹ Peter-atherr, John-atherr ratherr artwa ingwer-rnem ayernenh, “Aylernanth Akngey Ingkartek awelhem apek, arrekantherr apek?”

²⁰ Nthakenh aylernanth akater aney-angenh. Aylernantharl Jesus renh awek-penh, arek-penh, aylernanth ingwer-rnem ilem.”

²¹⁻²² Rernem ywarn-antey iterrek, ilekek renh-atherr atweman. Ingkerrenh Akngeyek inkw-erelhek, rarl renh mwerrilek. Rernem renh-atherr menty-anem tyarlewek alpetyek, renh-atherr ilenh, “Mpwelanth apmwelhelentyan, anwantherr mpwelenhant atwemarl.”

Rernem Akngey ayernem, ra renh-rnem rlter-rkiletyek, rernem angka mwerr-angker arnkatyel iletyek

²³ Tyayl-they ratherr tyerrelhek-penh, ratherr Ingkart-areny-rnem-warl alpek. Ratherr angkanem iley-alpek, atyetyart rernemarl ilenh. Angkanem ilerl-apenh ingwer-rnem-warl.

²⁴ Ingkart-areny rernem awek-penh, rernem Akngey Ingkart-warl-anem angkek, “Atyetyartay, ahern-then alker-then, kwaty alay-then, antyarr-rnem-then, ahern-areny ingkerrenh ntwarrpmernek.

²⁵⁻²⁶ Nga arrwekeleny David-ek alakenh angkek, ‘Ilekek alethang-rnem ahelirreyel? Ilekek rernem atwerr-ayntetyek ilkelheyel? Atyetyart ahern-areny-rnem iterreyel, Akngey Ingkartek-then ikwerenh Christ-ek antengiletyek

arrkernelheyel-arrpantey?' David-el ilek
Itnweng Rlwart-akertel.

²⁷ Nhel apmer Jerusalem-itwek artwa Jew-
weny-rnem-then Atyetyart Herod-then Pontius
Pilate-kenh-rnem-then anyentirrek artwa Israel-
kenh-rnem-then, Jesus warrkenh arraty ngk-
wenh atwetyek.

²⁸ Rernem renh atwek ngarl arrwekel angkek-
angkwarr-antey.

²⁹ Ingkartay, anwantherr warrkenh ngkwen-
harl. Anwenhantherr rlterrila, anwantherr
arnkatyel angka ngkwenh ilerl-apayntetyek.

³⁰ Ntwa arntety-rnem aleth-antey mwerreri-
aynta. Anwantherr arntety-rnem mwerrile-
tyek Jesus-kenh itnangkwarr, anyent impen ngk-
wenh."

³¹ Warl akngelhek. Jesus-arl apentenh-rnem
mwerrant-arey anenh. Itnweng Rlwart ikwer-
rnem-warl apetyek, rernemap alhewer-antey
ilerl-apenh.

*Jesus-arl apentenh-rnem rernem mwerrant-
arey anetyek*

³² Rernem ilterrey-angenh mwerrant-arey
anenh Ingkart-angkwarr. Jesus-arl apentenh
ingwer-rnem rernem arwa alhewer antherrenh.

³³ Itnweng Rlwartel angkakert-rnem arnkaty-
ilek. Rernem ingkerrenh arnkatyel ilerl-apenh,
"Jesus ra ipmepenh itethirrek." Akngeyel renh-
rnem ingkerrenh arntarnt-arek.

³⁴ Rernem ampwal ingkerrenh warl-rnem-
then tharlemilek. Ingwer-rnemel ampwal

atnyeney-angenh, ampwal ingkerrenh warl-rnem-then. Man-rnem rernem inek, ampwal tharlemilek-penh.

³⁵ Artwa ingwer-rnem-warl antheynek, ar-rangkwarl anenh-rnemek, man-weny irreperr-rnem.

³⁶⁻³⁷ Joseph-el apmer amern weyt-angketyarr ikwerrenh tharlemilek, man ingkerrenh ra angkakert-rnem-anem antheek, man-weny-rnem anthetyek. Joseph Cyprus-areny artwa anenh. Itna ingweran rernem renh itnewek Barnabas, alakenh angkemel, "Ingwer-rnem irrkngerney anthey-angker".

5

Ananias Sapphira-atherr

¹ Anewart-atherr artwa Ananias-then, arelh Sapphira-then, ratherr apmer amern weyt-angketyarr tharlemilek arrpemar. Ratherr man ataperr ayerrpilek, ikwer-atherrant rather-rarl man ayerrpilek, ingwer-rnem-warl arraty ilelhey-angenh anyelkel-antey.

² Ananias ra man akely angkakert-rnem-anem antheek, irrtiyertel-antey. Ratherr irrtiyerremel ilelhenh, man ilkwa anthetyek-arrpantey.

³ Peter-el renh ilek, "Arrentyel ngenh anter-rkwek, nga ikwerant-anem awelhek. Ilek nga irrtiyerrekan Itnweng Rlwart Akngey-kenhek?"

⁴ Apmer amern-angketyarr ntwatharlemilek, man ntwathayerrpilek ngkweng-antey arrpemar. Ngap Akngeyekant irrtiyerrekan, ahern-areny-rnem-wenyek!"

5-6 Ananias ra awek-penh, ra aytnerl-alhemel ilwek-anem. Artwa anthety rernem apetyek, arrewaly renh ataperrelek, rernem akngekan akwernetyekant-anem. Ingwer-rnem aterirrek.

7 Atwerrp anewikw ikwerenh Sapphira aylpenhek, apal-antey.

8 Peter-el ayernek, "Ntwa amern-angketyarr tharlemilek man irrkaty ikwer-antey. Ananias-el man ingkerrenh-antey akngetyek?"

Sapphira-el ilek, "Ya, kel ra antheK, ingkerrenh-antey, lipwel-antey yanhan!"

9 Peter-el ilek, "Mpwelanth irrtywerremel Itnweng Rlwartek. Artwa yanh-rnem rtnenherreyel arriw-itwel. Rernem Ananias-tangkwek akwernek. Ikwer-penhan rernem ngenh-anem akwernem."

10 Sapphira aytnerl-alhek, ilwemel-anem. Artwa rernem aylpenhek, Sapphira arrewaly-anem arey-alhek. Rernem renh akngek, akwernetyek anewikw ikwerenh-itwek.

11 Tyaty-areny-rnem rernem-anem aterirrek. Akngerr ingwer-rneman aterirrek arrpemarl.

Rernem ilek-ilek mpwareyel

12 Ingkart-kenh angkakert-rnemel arntety-rnem mwerrilek Akngey-kenh Itnweng-akertel. Jesus-arl apentenh-rnem anyentirrenh Solomon-kenh Lywenty-itwek.

13 Artwa ingwer-rneman inkwerelhek. Rernemap ikwer-rnem-itwek anyentirrey-angenharl.

14 Akngerr ingwerel-rnem Ingkart-anem apentenh, artwernem-then, arelh-rnem-then.

15 Rernem arntety-rnem akngetyenh iwerrel-antey, panty-warl arrernemel. Rernem iterrek, lywenty ikwerenhel renh-rnem arnenty, rernem mwerrirretyek.

16 Ingwer-rnem tawen-el anenh-rnemel Jerusalem-ampenyel. Rernem arntety-rnem-then arrenty-akert-rnem-then atnwenhenh. Kwertengerl-rnemel renh-rnem mwerrilek.

Jew Atyetyart-rnemel renh-rnem alwerneyel, atwetyek

17 Atyetyart ilkwa Jew-kenh tyaty-areny-rnem-then Sadducee-rnem-then rernem ikwer-rnem-kety arlkarirrek.

18 Angkakert renh-rnem anterrkwek, tyayl-ek-anem akwernemel.

19 Ingwel Ingkart-kenh angel apetyek, ar-riw ikwer-rnem-anem altywerilek, renh-rnem tyarlewek tyayl-they.

20 Angel-el renh-rnem ilek, "Tyaty Jew-kenh-warl alhenherr-arey, renh-rnem iletiek, rernem arraty-angkwarr apentetyek."

21 Ingkeny tyerrelhenhey-alentyel, rernem alhek tyaty ilkwewarl, renh-rnem akalty-anthetyek. Atyetyart ilkwa warrkenh ikwerenhrnem-then rernem Council-rnem akarrilek, rernem angkerretyek. Rernem angkakert-rnemek yangkelhek.

22 Tyayl-areny iltyemwerney-rnem ikwer-rnem ywarek. Rernem ilek,

23 "Anantherr tyayl-warl alhek. Tyayl renh arey-alhek martekarl ra ayntenh. Tyayl arntarnt-arey-angker-rnem arriw ikwer-itwek

rtnenh. Anantherr arriw altywerilek, arrangkw-anem arey-alhek.”

²⁴ Ilyemwerney-rnem-kenh Atyetyartel angka awek-penh, ra ywarn iterrek. Jew-rnem-kenh Atyetyart-rnem ywarn iterrek arrpemarl.

²⁵ Artwa anyent angkakert apetyek, renh-rnem iley-alhek, “Artwernem ntwarl tyayl akwernek-rnem, rernem ingwer-rnem angka Akngey-kenh ilerl-apeyel, tyaty ilkwa Jew-rnem-kenh aketh-ampeny-itwek.”

²⁶ Ilyemwerney atyetyart ilkwa ilyemwerney ingwer-rnem-then rernem angkakert-rnem akngey-alpek, renh-rnem atwey-angenh, ingwer-rnemel ilyemwerney-rnem atwekerr, apwertel wekerr.

²⁷ Kwertengerl-rnem akngek Council-rnem-warl. Atyetyart ilkwa tyaty-arenyel renh-rnem ilek,

²⁸ “Anwantherr arrwekel-antey arrenhantherr ilek, ‘Jesus-kenh-angkwarr akalty-anthey-angenh.’ Arrantherr Jerusalem ingkerrenh-angkwarr akalty-anthenh. Anwenhantherr ayntarrp-ileyel, Jesus atwenty-arrpantey.”

²⁹ Peter kwertengerl ingwer-rnem-then angkek, “Ahern-arenyek awelhey-angenh, Akngeyekant awelheyel.

³⁰ Arrantherr Jesus renh atwek, arwerl iylpeyl-atherr-warl, aylparirremel. Arrwekeleny-rneman awelhenhan Akngeyek, rarl Jesus renh itethilemel ipmepenh akemelhilek, Akngey anyent rey-antey.

³¹ Akngey ra Atyetyart anwekantherr ar-rernek, itethiley-angker. Akngey Ingkartel

renh arrernek, Israel-kenh-rnem apmwekety angkepirretyek, apmwa ingkerrenh-kety iwe-tyek.

³² Arrantherr ileyel, Itnweng Rlwartel ileyel ar-ppemarl. Rernem Akngeyek awelhenty, rernem Itnweng Rlwart-akert-anem.”

³³ Council-rnemel awak, rernem ahelirrek, renh-rnem ipmek atwetyek.

³⁴ Anyent ingweran Pharisee anenh, itnan Gamaliel. Ingkerrenhel renh mwerr antwenh. Ra impen Moses-kenh angka akalty-anthenh. Ranem iltyemwerney-rnem ilantheh, kwertengerl-rnem aketh-warl akngetyek.

³⁵ Ra Council-rnem-warl angkek, “Artwa Israel-kenh-rnem mwantyel iletiek.

³⁶ Apmwerrkel artwa anyent Theudas, ra ilelhek ra akwel atyetyart ilkwa anetyek. Artwa 400 irlkenty ikwer-angkwarr anenh arrppemarl. Artwa ingwerel renh ipmek atwek, ikwerenhrnem anterrerrek, Artwa Impenarl atwek-kety.

³⁷ Artwa anyent ingweran Judas Galilee-areny apetyek, kapment-rnem-el artwernem countemileyel-angkwarr-antey. Artwa ingwerel renh ipmek atwek arrppemarl. Artwa ikwerenhrnem arlperryirrek arrppemarl.

³⁸ Alakenhaym-kety artwa renh-rnem mentyanem ipmenherr-arey. Angka nhenh apek ahern-areny-kenh anamerl ywerreyenh wethlkwer.

³⁹ Akngey-kenh angka rernemarl apek ileyelek, nthakenh arrkngert angkey-angengan.”

⁴⁰ Sanhedrin Council-rnem Gamaliel ikwer awelhek, rarl angka ilenhek, rernem angkakert-

rnemek yangkelhek, rernem ahelengkw-rnem ilantheek, renh-rnem whip-el atwetyek, renh-rnem ilek, Jesus-kenh angka iley-angenh anayntetyek. Renh-rnem menty-anem tyarlewek.

⁴¹ Rernem Council-rnem-kety alpek, irrkngerney-anem. Rernem inkwerelhek, Akngeyek warrkirretyek, ahelengkwel-rnemarl renh-rnem atwenh-kety.

⁴² Arlta arrpanenhel rernem anyentirrenh Jew-rnem-kenh tyaty ilkwitwek, warl ingwerek-ingwer ikwer-rnem-kenh. Rernem ipmelhey-angenharl, intem-antey Akngey-kenh angka ilenh, Jesus ran artwa, Akngeyel awank-akerr alhelek renh thwenetyek ahern nhewarl, ahern-areny ingkerrenh itethiletyek.

6

Rernem artwa 7-pel arrerneyel, Inkart-kenh-rnem arntarnt-aretyek

¹ Akngeyel akngerr ingwer-rnem pweytilek ikwerenh-rnem-warl. Angkakert ingwer-rneman angka Greek-arl angkenh. Ingwer-rneman angka Hebrew-arl angkenh. Rernem amern-they ilterrenh. Arelh Greek amperr-areny inpert-rnemel amern iney-angenh, ingwer-rnemel arrkngelek-kety. Ingwer-rnemel arelh inpert-rnem amernel wantey-angenh. Greek-arl angkenh-rnem arlkarirrenh Hebrew-arl angkenh-rnem-kety.

² Angkakert 12-el ingkerrenh anyentilek. Ikwer-penhan rernem ilek-anem, "Anwantherr

mwerr-angkwarr Akngey-kenh angka akalty-anthayntetyek ipmelhey-angenh, amern arlperryelhiletiek.

³ Alakenh-anyem arrantherr artwa 7-pel mwerr-rnem iylpareth-rnem rlwanetyek, artwa Akngey-kenh Itnweng Rlwart-akert-rnem. Artwa akwerrng mwerr-rnem. Anantherr renh-rnem rnkernetyek, amern rernem arlperryil-ayntetyek ingkerrenhek.

⁴ Anantherr Akngey ayern-ayntetyek ingkerrenhek, Akngey-kenh angka akalty-anthayntetyek.”

⁵ Rernem inkwerelhek, rernem-anem Stephen rlwanek. Itnwengel renh rlterrkiek. Artwa iylpareth Jesus-arl apenteyel. Ikwer-penhan rernem artwa ingwer-rnem-anem rlwaneynek, itnan ikwer-rnem-kenh Philip-akerr, Prochorus-akerr, Nicanor-akerr, Timon-akerr, Parmenas-akerr, Nicolaus-akerr. Nicolaus Antioch tawen-areny anenh, Jew-wenyarl ilkwerrek.

⁶ Rernem artwa renh-rnem angkakert-rnem-warl akngetyek. Angkakert-rnemel iltia akapwert-warl arrernemel, Akngey renh ayernek, renh-rnem rlterrkieketyek.

⁷ Ikwer-penhan Jesus-arl apenteyel-rnemel renh-rnem akalty-anthek. Akngeyel-anem ingwer-rnem ikwer-rnem-warl anyentilek. Jew-rnem-kenh Atyetyart ingwerel-rnem Jesus renh tnakek arrpemar.

Jew ingwer-rnemel Stephen renh anterrkweyel

⁸ Akngeyel Stephen renh rlterrkilek, renh arntarnt-arenh. Stephen ranem ilek-ilek mp-warek, arntety-rnem mwerrilek.

⁹ Artwa ingwer-rnem ikwerety arlkarirrek. Artwa rernem Jew-rnem anenh, apmer Cyrene-areny-rnem-then, Alexandria tawen-areny-rnem-then. Rernem ilelhenh, rernemarl arwa alhewer alhenh-rnem. Artwa ingwer-rnem apmer Cilicia-areny-rnem-then apmer Asia-areny-rnem-then. Rernem Stephen-akerr ilterrek.

¹⁰ Stephen-el renh-rnem irrpelthel antengilek, Itnweng Rlwart-akertel.

¹¹ Ikwer-penhan rernem artwa apmwernem thwenek, Stephen renh irrtwerremel ayntarrp-iletyek, "Anantherr Stephen renh awek, Moses-ek-then Akngyek-then irrpelthirrenh."

¹² Angka awek-penh Moses apentenh-rnem-then artwa ampwernem-then ahelirrek. Rernem-anem Stephen anterrkwemel Sanhedrin Council-warl-anem atnwenhek.

¹³ Artwa irrtwerrey-angker-rnemel Sanhedrin Council-angkwarr-anem renh irrtwerremel ayntarrp-ilek, "Artwa nhenh Akngyek-kenh tyaty ilkwa impenek apmwel-areth angkeyel, Moses-kenh angkek irrpelthirrenh.

¹⁴ Anwantherr renh awek, rarl ingwer-rnem ilenh, Jesus Nazareth-arenyelarl Akngyek-kenh tyaty ilkwa akaltheyenh. Moses-kenh angkek ra irrpelthirreyel."

¹⁵ Sanhedrin Council-rnemel Stephen renh artewentyel arek, rernem arek inngerr ikwerenh angel-kenh inngerr-apeny.

7

Stephen ilelheyel Sanhedrin Council-rnemek

¹ Atyetyart ilkwel Stephen renh ayernek, “Nthakenh nga iterreyel? Angka arraty-antey ngkweng rernem angkerreyel?”

² Stephen-el renh-rnem ilek, “Atyenh-rnemay, atyeng awelhenherr-arey. Akngey anwekanther-renh rarl rlterrk ilkwakert aneyel, rant Abraham ikwer aremirrek, rarl apmer Mesopotamia anenh-warl, ra apmer Haran-warl alpey-alenty.

³ Akngeyel renh ilek, ‘Apmer ngkwenh iwerl-alha, ngkwenh-rnem-then, nganem apmer ingwer-warl alpetyek, atharl ngkweng iylparrernem-warl.’

⁴ Kel apmer Chaldea renh iwerl-alhek, ra apmer Haran-warl-anem alpek, ikwerel-anem intem-antey aney-alpek. Aynikw ikwerenh kel ilwek-anem. Ikwer-penh Akngeyel Abraham renh apmer nhenh-warl arrernek, apmer nhenhel anwantherr lyert aneyel.

⁵ Akngeyel Abraham ikwerenh-rnem-akert arwa alhelekant apmer renh anthey-angenh-antey. Akngeyel Abraham renh alhelek-antey, Abraham-kenh ampa aney-angenh-antey arrangkw-antey.

⁶ Akngeyel Abraham renh ilek, ‘Aray, ngkwenh-rnem apmer ingwer-ampenyel aneyenh aherrety 400-ek-atwety. Rernem alethang-rnemek artewenty innga warrkir-reyenh. Alethang-rnemel renh-rnem warrk ilkwa antheyenh.

⁷ Atha alethang-rnem atweyenh ikwer-rnem-they. Ikwer-penhan ngkwenh-rnem apmer ikwer-they alpeyenh, nhenh-warl-anem apey-alpeyenh, Akngeyek inkwerelhetyek.'

⁸ Akngeyel Abraham renh ilantheke, ra angkep alheletyek, 'Ngkwenh-rnem artwiletiek ingkerrenh-antey rernem arlta 8-ek-atwety ilkwerrekarl.' Alakenhaym avey ikwerenh Isaac artwilek, arlta 8 ikwerel. Isaac-kenh alerikw Jacob. Avey 12 Jacob-kenh ingkerrenh-antey.

⁹ Joseph-kenh awayikw-rnem ikwerety arlkarirrek. Rernem-anem renh artwa alethang-rnem-warl tharlemilek. Rernem-anem renh apmer Egypt-warl akngeynek. Akngeyel Joseph renh arntarnt-arek-antey.

¹⁰ Akngeyel renh arntarnt-arek, ingwerel renh atwekerr. Akngeyel renh akaltyilek innga. Atyetyart Egypt-areny Joseph ikwer inkwerelhenh, ranem renh Atyetyart ilkwa arrernek apmer Egypt-itwek, ampwal ingkerrenh ra arntarnt-aretyek.

¹¹ Amern akngerr lyapey-angenh-anem Egypt-itwek, Canaan-itwek. Amern-wenyel rernem angayakw-anem irrek.

¹² Jacob-el awek Egypt-itwek amern akngerr ayntek. Ra anaynwekantherrenh 12 thwenek Egypt-warl.

¹³ Ikwer-penhan angkep arrpemarl amernek alpek Egypt-warl, Joseph ra ikwer-rnemek ilelhek-anem, ra ayteyikw ikwer-rnem-kenh anenh. Atyetyart Egypt-arenyel angka awek arrpemarl.

14 Joseph ranem aynikw ikwerenhek awayikw ikwer-rnemek-then ingkerrenh ingwer-rnemek-then yangkelhek, rernem Egypt-warl alhetyek. Ikwerenh-rnem akgerr anek, 75-pel.

15 Jacob Egypt-warl alhek, apmer ikwer-itwek-antey ilwek, arrwekeleny-rnem ilwek arrpemar apmer Egypt-itwek.

16 Rernem-anem Jacob-kenh-rnem arrewaly-rnem inteyek akwernek apmer Shechem-itwek. Hamor-kenh-rnem-they payemelekarl.

17 Israel-kenh-rnem akgerr-anem irrek. Akngey iterrek renh-rnem akngeynetyek apmer ikwer-warl, Abraham renharl alhelek-warl.

18 Ikwer-penhan Atyetyart anyent ingwer Egypt-itwek anenh, ranap Joseph-kenh angkek akwerrparl, iterl-arey-angenh.

19 Ra ingkerrenh irrtwyerremel ilenh, Israel-kenh-rnem ilantheek, rernem ampa ikwer-rnem-kenh aketh-warl arrernetyek, rernem menty ilwetyek.

20 Moses-anem ampa akely mwerr-angker ayn-tenh. Ra ilkwerrekarl. Amikw ikwerenhel aynikw ikwerenhel renh arntarnt-arek alkent irrptyek-atwety.

21 Ikwer-penhan rernem akethek-anem renh arrernek, Pharaoh-kenh alerikwel-anem renh arek, apmer-warl-anem renh akngeyneek, renh ilkwilek-anem.

22 Egypt-arenyel-rnem Moses renh akalty-antheek. Ra akalty inngirrek. Ranem Atyetyart ilkwanem anenh.

23 Moses ra aherrety 40-anem anenh. Ra iterrek ikwerenh-rnem Israel-kenh-rnem-warl

awangk alhetyek, renh-rnem aretyek.

²⁴ Ra artwa anyent arek, Egypt-arenyel artwa Israel-kenh anyent atwenharl. Ranem artwa Egypt-areny ipmek atwek, artwa Israel-kenh renh itethilek.

²⁵ Moses ranem iterrek apalel, 'Nhenh-rnemel ayenh iterl-areyel, Akngeyel ayenh arrernekarl, renh-rnem arntarnt-aretyek.'

²⁶ Arlta ingwerel ra arek artwa Israel-kenh atherr atwerrerrl-anenty arrpemar. Ranem renh-atherr arrkngertewek. Ra renh-atherr ilek, 'Mpwelanth apmer anyent-areny atherran. Ilekek-anem mpwelanth atwerreyelan?'

²⁷ Artwa retangkwelel ahelirrek-penhel renh ayernek, 'Angwenhel-anem ngenh arrernek, nga atetyart anwekantherr anetyek, anwenhantherr ayern-ayntetyek?'

²⁸ Nga ilkelheyel ntwal ayenh ipmek atwetyek, ntwarl artwa Egypt-areny apmwerrkel atwek-apeny.'

²⁹ Moses ra awek-penhelel aterel apmer Midian-warl anterrek, ikwerel aney-alpek. Awey-atherr-anem ikwerenh Midian-el anak.

³⁰ Ra aherrety 40-ek-atwety Midian-el anenh. Ikwer-penhan angel anyent-anem ikwer aremirrek, apmer arlpawel, apwert Sinai-itwek. Angel ranem arwerlel ampekarl-itwek aremirrek.

³¹ Moses-el arwerlel ampekarl renhelel arek, ranem ywarn iterrek. Ra arrer irremel-anem arwerlel-anem arek. Inggart-anem ikwer-warlel angkek,

³² 'Ayeng Akngey ngkweng anem, Abraham-kenh Isaac-kenh, Jacob-kenh Akngey anem.'

Moses-anem aterel arrewek. Ranem akapwert kwenirrek, arwerl renh arekerr.

³³ Inkartel-anem renh ilek, 'Ngarl yanh rtneyel amek-amek-itwel! Pwet ngkwenh ingketythey lhelha!

³⁴ Atha arek Egypt-arenyel-rnemarl atyenh-rnem irrwampenty mpwareyel. Ayeng apetyek, renh-rnem itethiletyek. Atha ngenh apmer Egypt-warl thwenem.'

³⁵ Moses Egypt-warl alpek. Ikwerenh-rnem ikwerety arlkarirrenh. Rernem renh ilek, 'Angwenhel ngenh rnkerne, anwekantherr atyetyart anetyek, anwenhantherr ayernetyek?' Akngey rant Moses renh arrernek, ikwerenh-rnemek Atyetyart anetyek, renh-rnem itethiletyek. Akngey Moses-ek angkek angel ikwerenh-angkwarr angel rarl Moses-warl aremirrek arwerl ampekarl-itwek.

³⁶ Moses-el aherrety 40-ek-atwety renh-rnem arntarnt-arek. Akngeyel renh rlterrilek, Moses-el ilek-ilek mpwarenh, Egypt-itwel, alay Apenng-angketyarr-itwel, aherrety arlpaw-itwek-anem. Ingkerrenhel Akngey renh iterl-arek, rarl rlterrkinngan.

³⁷ Moses rey-antey Israel-rnemek ilelhek, 'Ingwer-inger Akngeyel angkakert arrekantherr-warl thweneyenh, ra ayeng-apenyarl aneyenh. Ra artwa Israel-kenh arrpemarl aneyenh.'

³⁸ Moses rantey arrpemarl ingkerrenh-akert anenh, apmer arlpawel. Angel ra angkek Moses ikwer-warl Apwert Sinai-itwel, Moses-el-anem Akngey-kenh angka anwekantherr-warl ilettyek.

39 Arrwekeleny-rnem Moses-ek awelhey-angenh, rernem Egypt-warl alpetyekant ilkelhenh.

40 Rernem Aaron renh ilek, 'Akngey anwekantherr mpwaray, anwenhantherr atnwenhetyek. Moses-el anwenhantherr nhenh-warl atnwenhey-alhek. Moses ranem nthakenh irrek? Anwantherr akwerrparl.'

41 Rernem altyerr-arrpantey mpwarek, pwelek akely-apeny. Ikwer-penhan rernem altyerr-arrpantey ikwer inkwerelhek, tyenkerr anthemel, rernemarl mpwarek.

42 Akngey ikwer-rnem-kety intwemelirrek, ra renh-rnem ipmek. Rernem antyarr-rnemek inkwerelhek, Akngey-kenh angkakert arrwekeleny aynteyel: 'Israel-kenh-rnemel ayenh tyenkerr anthey-angenh aherrety 40-ek-atwety.

43 Ampwal ikwer-atherrant inkwerelhek, Molech, Rephan. Apmwekantarl apwert-penh, ikwer-atherrant inkwerelhek. Arrantherr ikwer-atherrant mpwarekarl-kety. Alakenh-anyem atha arrenhantherr apmer Babylonia-they anthenayn irrenteyenh.'

44 Akngey Moses ikwer kalikw lywetangkwel lwewarrerne. Ikwer-penhan ra Moses renh ilanthe kalikw renh mpwaretyek, rarl renh ilek-angkwarr-antey. Akngey-kenh ampwal-rnem kalikw ikwerenhel ayntek. Akngey arrwekeleny-rnemel kalikw impen nhanyem arrpemar atnyenhenh.

45 Joshua-el-anem arrwekeleny-rnem apmer Canaan ikwer-warl atnwenhek. Akngeyel

apmer-areny-rnem irrentek. Rernem Akngey-kenh kalikw renh ikwer-rnem-angkwarr akngek. Kalikw ra anenh, David-arl atyetyart anenek-atwety.

⁴⁶ Akngey ra David-ek inkwerelhek. David-el-anem renh ayerne, 'Mwerr tyaty ilkwa anwantherr ngkweng artetyek?'

⁴⁷ Solomon rant Akngey-kenh warl artek ingkern.

⁴⁸ Akngey irrwerl-areny nthakenh warl ilkwa aney-angenh, ahern-arenyelarl mpwarek-itwek. Akngey-kenh angkakert arrwekelenyel alakenhaym aynteyel:

⁴⁹ 'Alker-itwek apmer ikwerenh aneyel. Angka anwekantherr ahernek arrernem. Ahern nhenh akely ikwer. Warl ilek-apeny arrantherr atyeng arteman, ayeng ltyerreyek, ikwer-itwel?' Alakenh Ingkart angkem.

⁵⁰ 'Aray, athantey arrpemar alker-then ahern-then ingkerrenh arrpmernekarl.' Alakenh-anyem Akngeyel ilenh."

⁵¹ Stephen-el renh-rnem ilek, "Arrantherr iyypel away-angenh intem-antey aneyenh. Arrantherr Itnweng Rlwart-kety intwemelirreyel, arrwekeleny-rnem intwemelirrenh-apeny. Rernem Akngeyek awelhey-angenh.

⁵² Rernem Akngey-kenh angkakert-rnem ipmek atwek. Angkakert-rnemel ilek artwa araty ra apetyeyenh. Ikwer-penhan arrantherran artwa arraty renh ahelengkw-rnemek ahayiwek, renh ipmek atwetyek.

⁵³ Akngeyel angka arrekanterr anthek, angel-rnem-angkwarr, arrantherr angka ikwerenhek

awelhey-angenh.”

Rernem Stephen renh apwertel weyel

⁵⁴ Rernem awek-penh, Sanhedrin Council rernem-anem ahelirrek.

⁵⁵ Itnweng Rlwartel Stephen renh rlterrk-ilek. Alker-warl-athek itnywenek, ranem Akngey renh arek rlterrk ilkwakert, Jesus akwa arraty-ampenyel rtnerl-anenty.

⁵⁶ Stephen-el renh-rnem ilek, “Aray, atha alker renh altywerirrekarl itnyweneyel, Artwa Impen Akngey-kenh Akngey akwa arraty-ampenyel rtnerl-anenty.”

⁵⁷ Rernem awek-penh rernem arlkek, iylpa martelhemel iltyel. Rernem Stephen-warl anterremel. Rernem renh anterrkwek.

⁵⁸ Rernem renh Jerusalem-they iytarr-akngek. Ikwer-penhan rernem apwertel-anem wek. Artwa ilenh-rnem Stephen-arl rernem ayntarrp-ilek, rernem arnkwa arlpenty iylwemel, artwa anthety antheke arntarnt-aretyek, itnan ikwerenh Saul.

⁵⁹ Rernem Stephen renh apwertel wenh-antey, Stephen-el Akngey ayerneke, “Inkart Jesus-ay, ayeng ilwentyan, itnweng atyenh ina!”

⁶⁰ Ampwethel alernelhemel ra arlkek, “Ingkarta, renh-rnem ayntarrp-iley-angenh anetyek.” Alakenh angkemel, ra kel ilwek-anem.

8

¹⁻³ Artwa mwerr irrputyapel Stephen renh arrewaly inerl-alhek, renh arraty-angkwarr aweng-warl akwernetyek. Rernem ikwer amperrngirrek. Saul-el arek, rernemarl Stephen

renh ipmek atwek. Ra inkwerelhek. Saul ra Jesus-arl apenteyel-rnem-kety arlikarirrenh, renh-rnem-anemarl atwetyek ra alwernek. Saul ilkelhek, Jesus-arl apenteyel-rnem ywerrelhiletiek. Inkart-areny rernem aterel anterrek ikwerety, arlperryirremel alpek apmer ingwerek-ingwer-warl, apmer Judea-warl, apmer Samaria-warl. Angkakert rernemant-anem apmer Jerusalem-itwek anenh. Ra warl arrpanenh-warl alhek, arelh-rnem-then artwernem-then ra renh-rnem anterrkwek, tyayl-warl akwernemel.

Philip-el renh-rnem angka mwerr-angker akalty-antheyel apmer Samaria-el

⁴ Jesus-arl apenteyel-rnem apmer arrpanenh-warl arlperryirrek Jerusalem-they. Rernem apmer-areny-rnem akalty-anthey-alhek, angka Jesus-kenh.

⁵ Philip apmer Samaria-warl alhek, tawen anyent-warl. Ranem ikwer-rnem angka anayntilek, Jesus anyent renhey-antey Akngeyelarl arwekel weth alhelek awank-akerr, renh thwentyek ahern nhewarl, ingkerrenh itethiletiek.

⁶ Tawen-arenyel-rnem Philip-kenh angka awek. Rernem arek, Philip-elarl ilek-ilek mpwarenh.

⁷ Rernem arek, rarl arrenty-akert-rnem mwer-rilek. Arrenty-rnem ikwer-rnem-they artewentyel arlkemel tyerrelhek. Rernem arek, artwa lerrp-rnem mwerrirrekarl.

⁸ Alakenh aremel, tawen-areny-rnem irrkngerney innganem anenh.

⁹ Tawen ikwerel artwa ingwer anenh, itnan Simon. Samaria-areny-rnemel renh apatemel arek, rarl ilek-ilek-angkwarr mpwarenh ahern-areny ngangker-akertel. Ranem tnakelhek.

¹⁰ Ingkerrenhel renh tnakenh, artwa apmwamwam-rnem-then, artwa atyetyart-rnem-then. Rernem angkerrenh, “Ranap nhenhey altyerr-apenyarl, rlterrk inngarl.”

¹¹ Rernem Simon renh tnakenh, ilkwerl-alhek ywarn iterremel, rarl ilek-ilek-angkwarr itethilenh, arntety-rnem mwerrilemel.

¹² Philip-el-anem tawen-areny-rnem akalty-anthemel ilek, “Akngey rant ingkerrenh-angkwarran arntarnt-areyel, Akngey rant Ingkart ingkerrenhek aneyel.” Ra renh-rnem Jesus-kenh angka ilek arrpemar. Artwernem-then arelh-rnem-then Philip-warl apetyek, renh-rnem baptise-emeletyek.

¹³ Simon-el Akngey renh tnakek arrpemar. Ranem Philip-warl apetyek, renh baptise-emeletyek. Ikwer-penhan ra Philip-angkwarr alhenh. Simon ra apatek Philip-el-arl ilek-ilek-angkwarr itethilenhek, arntety-rnem-then mwerrilenhek.

¹⁴ Jerusalem-itwek kwertengerl-rnemel awek, Samaria-areny-rnemelarl Akngey-kenh angka tnakek. Alakenh-anyem rernem Peter-then John-then thwenek, apmer Samaria-warl.

¹⁵ Samaria-itwek-anem ratherr Akngey renh ayernek Itnweng Rlwart renh Ingkartarl apenteyel-rnem-warl thwenetyek.

¹⁶ Itnweng Rlwart ra ikwer-rnem-warl antelhey-angenh-antey, Jesus-kenh itnangkwarr.

Philip-el renh-rnem baptise-emelek itnan Jesus-angkwarrant.

¹⁷ Ratherr itep arrernek akapwert-warl. Itnweng Rlwart ranem ikwer-rnem-itwek anenh.

¹⁸ Simon-el arek kwertengerl ratherr iltya ikwer-atherrenh akapwert ikwer-rnem-warl arrernek, Itnweng Rlwart ikwer-rnem-warl antelhek-anem.

¹⁹ Ranem Peter-atherr man anthetyek ilkelhek. Ra alakenh angkek, “Ayenh rlterrkilay, athanem iltya ingkerrenhek arrernetyek Itnweng Rlwart ikwer-rnem-warl antelhetyek.”

²⁰ Peter-el renh ilek, “Nthakenh ntwa Akngey-kenh rlterrk manel payemeley-angenh. Arrangkw-kety alha, Akngeyel ngenh atwekerr.

²¹ Nga Akngeyek apmwangkware iterreyel. Alakenhaym-they nga Akngey-warl anwekantherr-angkwarr alhey-angenh.

²² Kel apmwekety angkepirra Inkart-warl, Inkart ayernay akwerrng arratyiletiek apmwa ngkwengety iwetyek.

²³ Ayeng akalty nga iwerr apmwangkware alheyel, apmwangkware iterremel.”

²⁴ Simon-el-anem renh-atherr ilek, “Inkart ayernenherr-atherr, ra ayenh ipmek atwekerr, mpwelanth ayenh ilek-angkwarr-antey.”

²⁵ Ratherr ingkerrenh Akngey-kenh angkek akalty-anthek arrpemar. Ikwer-penhan ratherr Jerusalem-warl-anem alpek, Samaria ikwer-angkwarr. Ratherr tawen akely-rnem-itwek ingwer-rnem Akngey-kenh angka akalty-anthetyek.

Philip-then artwa Africa-areny-then

²⁶ Ingwer-inger, Akngey-kenh angel-el-anem Philip renh ilek, “Antekerr alha, iwerr ilenharl, apmer arlpaw-angkwarrarl aynteyneyelwarl Jerusalem-they apmer Gaza-ek-atwety.”

²⁷ Philip ra kel alhek. Ra artwa anyent Africa-areny arek. Artwa ra Ethiopia-areny Queen-kenh warrkenh, rarl man arntarnt-arenh, arelh ilkwekenh. Ra kel Akngeyek inkwerelhemel arraty apentenh apmer Jerusalem-itwek.

²⁸ Ranem alpek pakey ikwerenhel anerl-aperl-anemel, Akngey-kenh angka angkakert Isaiah-kenh pipek reytemilenhey-alpenh, Akngey-kenh angka arrwekeleny-akert.

²⁹ Akngey-kenh Itnwengel Philip renh ilek, “Pakey ilenhangkwarr antelherl-alha!”

³⁰ Pakey ikwerenhangkwarr arerrirremel, Philip ra awek Akngey-kenh angkakert Isaiah reytimilerl-anenty. Philip-el renh ayernek, “Angka nhenh ntwia iterl-areyel?”

³¹ Artwa Africa-arenyel ilek, “Nthakenh atha iterl-areman, ingwerentyel atyeng anayntiley-angenh-antey?” Ra Philip renh ilek, “Atyeng-angkwarr apetya!”

³² Artwa ra angka nhanyem reytemilek, “Rernem artwa anyent renh akngek, yep-yep atwetyek-apeny. Alakenhangwenh renh atwetyek akngek. Ra akater anenh, angkey-angenh, rerner-marl yep-yep alta aketyek-apeny.

³³ Alerikw ikwerenhrnem arrangkw, rerner-marl renh arwa atwek-kety.”

³⁴ Artwa ranem Philip renh ayernek, “Atyeng anayntila, rernem angwenh atwem, rernem yep-

yep atwem-apeny? Angkakert arrwekeleny apek, artwa ingwerenty apek?”

³⁵ Philip-el Isaiah-kenh pip renh-tangkwel anayntilek. Ikwer-penh angka mwerr-angker-angkwarr-anem Jesus-akert akalty-anthek.

³⁶ Rernem alhenhelarl-antey, rernem kwaty arek. Artwa ranem Philip renh ayernek, “Aray, kwaty nhenhel ntwā ayenē baptise-emeletyēk.”

³⁸ Pakeyek-artwey renh-anem ra ilek, “Pakey rnkerna!” Ikwer-penh ratherr atwarrek kwaty ikwer-warl, Philip-el-anem renh baptise-emeletyēk.

³⁹ Ratherr kwaty ikwer-they tyerrelhek. Inkart-kenh Itnwengel Philip renh akngek. Artwa Africa-arenyel renh arey-angenh arrpemarl. Ra apmer ikwerenē-warl irrkngerney innga alpek, aleth-antey ywerrenhek.

⁴⁰ Philip aremirrek tawen Azotus-itwek. Tawen ingwer-rnem-warl alhek, Caesarea-ek-atwety, Jesus-kenh angka akalty-antherl-apayntetyek.

9

Jesus aremirreyel Saul-ek

¹ Saul ra ilkelhek, Inkart-areny-rnem ywerrel-hilettyek. Ranem Jew-rnem-kenh tyaty ilkwewarl alhek.

² Ra ilkelhenh Damascus ikwer-warl alhetyek, tyaty anyentam-anyent-warl alhetyek, Jesus-arl apenteyel-rnemek nthwetyek, artwa apek, arelh apek, anterrkwemel Jerusalem-warl

akngeynetyek. Ra Atyetyart ilkwa renh ilek, “Pip ingkwernay, atyetyart Damascus tyaty-areny-rnemek, tawen-areny-rnemek, anwantherr Inkart-areny-rnem anterrkwetyek.”

³ Saul-rnem kel Damascus-warl arrer-anem irrek. Lyenenty ilkwel renh alker-they artewentyel alhernek.

⁴ Saul ranem ahern-warl aytnek. Ranem awek renharl itnewek, “Saul-ay, Saul-ay! Ilek ntwa ayenh atwetyek alwerneyel?”

⁵ Ra awek-penh Saul angkek, “Inkartay, angwenh ngan?”

Ra ikwer ilelhek, “Ayengan Jesus-arl, ntwa ayenh atwetyek alwerneyel.

⁶ Kel akemirremel tawen-warl alha, artwa anyentek-anem awelheyenh.”

⁷ Artwa rernem apatemel rtnenh, rernemarl awek-penh. Angkentyant rernem awek, ingwerenty ikwer-rnem-itwek aremirrey-angenh.

⁸ Saul akemirrek, ywarn-antey arek, anngel arey-angenh, aparrng-anem. Artwa rernem-anem renh Damascus-warl atnwenhek.

⁹ Arlta irrptyel ra anenh, amern arlkwey-angenh, kwaty antywey-angenh.

¹⁰ Apmer Damascus ikwer-itwek, Jesus-kenh kwertengerl ingwer anenh, itnan ikwerenh Ananias. Inkart ikwer yangkelhek, rarl altyerr arenh-angkwarr. “Ananias-ay!”

Ananias angkek, “Ilek Inkartay?”

¹¹ Inkartel renh ilek, “Iwerr nhenh-warl alha, itnan ikwer Iwerr Arraty. Judas-kenh apmer-warl alha, ntwa Saul Tarsus-arenyek ayerna. Saul ra Inkartek angkeyel.

¹² Lyert ra altyerr arek, artwa ra apetyenh ikwer-warl, itnan ikwerenh Ananias. Ranem arek iltya ikwer-warl arrernek annga ikwerenh-angkwarr mwerrirreynek.”

¹³ Ananias arrkngert angkek, “Inkartay, atha angka awek ingwer-rnem-they, Saul-elarl Inkart-areny ingkerrenh alwernemel ipmek atwek apmer Jerusalem-itwek.

¹⁴ Atyetyart ilkwernemel renh thwenek pipakert, Inkart-areny ingkerrenh anterrkwetyek.”

¹⁵ Inkartel renh ilek, “Kel alha, atha renh rlwanek, atha renh thweneyenh Jew-weny-rnem-warl, atyetyart ilkwernem-warl Israel-kenh-rnem-warl-then, ra renh-rnem angka atyenh akalty-anthetyek.

¹⁶ Ingwer-rnemel renh arntety antheyenh. Ra irrwampenty awelhemel atyeng warrkirreyenh.”

¹⁷ Ananias kel alhek. Iltya ikwerenh Saul akapwert arrernemel, “Saul-ay, Inkart Jesus ngkweng aremirrek, ngarl iwerrel alhenh-warl. Rarl ayenh thwenek ngkweng-warl annga mwer-rileyek. Itnweng antelheyenh ngkweng-warl.”

¹⁸ Ikwer-penhan Saul tywen angethey irnyapeny aytnek. Ra arek arrpemar, mwerranem. Ra kel akemirrek. Ikwer-penhan Ananias-el renh kwatysel baptise-emelek.

¹⁹ Saul-el amern arlkwek, rlterrkirrek arrpemar. Saul kwertengerl-rnem-itwek anenh apmer Damascus-itwek.

Saul-el renh-rnem akalty-antheyel apmer Damascus-itwek

²⁰ Ikwer-penhan ra Jew-rnem-kenh tyaty ilk-wewarl alhek, ingwer-rnem ilek, “Jesus Akngey-kenh alerikw inngarl aneyel.”

²¹ Rernem awek-penh rernem apatek. Rernem ilerrenh, “Artwa nhenhel Jesus-arl apenteyel-rnem alwernemel atwek. Ra arrpemarlhewarl apetyek Jesus-arl apenteyel-rnem anterrkwe-tyek, atyetyart ilkwernem-warl akngeynetyek.”

²² Akngey-kenh Itnwengel Saul renh rlterrk-ilek, Jew Damascus-areny-rnem ikwer ywarn-antey irrpelthirrek. Ra renh-rnem ilek, “Jesus Akngey-kenh alerikw inngarl.”

²³ Ingwer-ingeran, Jew-rnem angkerrenh renh ipmek atwetyek.

²⁴ Jew-rnemel-anem tawen arriw-rnem-itwel ikwer mpwelhenh. Intem-antey Saul ikwer mpwelhenh, ingwel, arltel. Rernem ilkelhenh, renh anterrkwemel ipmek atwetyek.

²⁵ Ingwa ingwerelan Saul-kenh-rnemel renh paketenp rwepel irrwerl-they atwarrelhilek. Aketh-warl-anem tyarlewek.

Saul alheyel apmer Jerusalem-warl

²⁶ Saul alhek apmer Jerusalem-warl. Saul ra ilkelhenh angkakert ikwer-rnem-warl pweytir-retyek. Rernem ikwerety aterirrekarl, ikwer irrpelthirrek, rarl ikwer-rnem ilelhek, ra Jesus-kenh kwertengerl anenh.

²⁷ Barnabas-el-anem angkakert-rnem-warl at-nwenhek. Renh-rnem ilek, “Saul-el Ingkart arek, rarl Damascus-warl alhenhel. Ingkart ra

Saul-warl angkek. Saul-el renh-rnem akalty-anthek Jesus-kenh angel, apmer Damascus ikwer-itwek.”

²⁸ Saul ra angkakert-rnem-warl anyentirrek. Ra arternp, Ingkart Jesus-kenh akalty-anthenh.

²⁹ Saul-then ilterrek, Jew arleng-areny Greece atnyenekar-rnem-then. Rernem ilkelhek, rernem Saul renh ipmek atwetyek.

³⁰ Jesus-arl apenteyel-rnem rernem renh Caesarea tawen-warl akngek, ingwer-rnemel renh atwekerr. Tarsus tawen-warl-anem thwenek.

³¹ Ikwer-penhan rernem mwerrant-arey-anem anenh, Galilee-areny-rnem-then Samaria-areny-rnem-then. Akngerr antelhek Ingkart-areny-rnem-warl. Itnweng Rlwartel renh-rnem rlterrk-ilek, Akngeyel arrpemarl renh-rnem anyentilek, rernem Ingkart-angkwarr arraty anetyek.

Peter-el Aeneas mwerrileyel, Tabitha renh ipmepenh itethileyel

³² Peter ra tawen ingwer-rnem-warl alhek, Ingkart-areny ingwer-rnem akalty-anthetyek Akngey-kenh angkek. Ra arrpemarl Lydda tawen-warl alhek inwekel.

³³ Tawen ikwer-itwek artwa arntety ilkwa ayntek, itnan ikwerenh Aeneas. Ra aherrety 8-pelel pantyeyel ayntenh arlelp akngelhey-angenh.

³⁴ Peter-el renh ilek, “Aeneas, Jesus Christ-el ngenh mwerrilek. Panty ngkwenh inerl-alhemel, kel alpa!” Aeneas kel akemirrekant.

³⁵ Lydda tawen-areny-rnem-then apmer Sharon-areny-rnem-then rernem Ingkart tnakek.

³⁶ Joppa tawen ikwerel kwertengerl arelh anyent anek itnan ikwerenh Tabitha. Greek-kenh itnan Dorcas-arl. Arelh ra ingkerrenhek inkwerelhek. Rantey arrpemarl amern-rnem-then arnkwernem-then anthey-angker.

³⁷ Tabitha ranem arntetyirremel ilwek. Ikwerenhel-anem arrewaly renh lhewek, room irrwerleng-ampenyek arrernek.

³⁸ Apmer Joppa Lydda-they arrer-antey anenh. Kwertengerl-rnemel awek Peter Lydda ikwer-itwek anenh. Rernem artwa atherr renh thwenek, Peter renh ikngwerl-alpetyek, "Anamerl apetyay!" Peter kel ikwer-atherr-angkwarr alhek.

³⁹ Ratherr Peter renh atnwenhek room irrwerl-warl, arrewaly rarl ayntenh-warl. Inpert-rnem room ikwerel artnalhelhirrenh. Rernem Peter arnkwernem ikwer lwewarrernek, arelh weth-larl antheke itethankel.

⁴⁰ Peter-el arelh ingkerrenh aketh-warl thwenek. Ampwethel alernelhemel, ra Akngey-warl angkek. Ikwer-penh ra arrewaly renh ilek, "Tabitha, kel akemirra!" Tabitha ranem annga rlkenhey-alpek. Peter aremel ra akemirrek.

⁴¹ Peter-el iltyethey renh anterrkwemel rnrkernek. Ikwer-penhan Peter ra ingwer-rnemek-then inpert-rnemek-then yangkelhek, rernem arek Tabitha iteth-anem anerl-anenty.

⁴² Joppa-arenyel-rnem awek-penh rernem In-gkart renh tnakek.

⁴³ Peter-anem Joppa tawen-itwek anek, artwa Simon-itwek. Simon ra yenp mpwarey-angker, warrkenh weth-ikwer.

10

Peter Cornelius-atherr

¹ Caesarea tawen-itwek artwa anyent anenh, itnan Cornelius. Atyetyart ikwerenh irlkenty-rneman akgerrarl anenh ahelengkw 100. Rernem Italy-areny-rnem anenh.

² Cornelius ra artwa iyipareth anenh. Ra Akngeyek awelhenh, ikwerenh-rnem-then. Rernem Akngey-warl angkenh. Anew ikwerenh-then alerikw ikwerenh-rnem-then warrkenh ikwerenh-rnem-then akgerr ingwer-rnem-then, iyipareth-antey awelhenh. Rernem Akngeyek inkwerelhenh, rernem Jew-wenyarl.

³ Arlta ingwerel 3 o'clock-apeny Cornelius-el altyerr arek. Ra aketh innga Akngey-kenh angel arek. Akngey-kenh angel arrer irremel Cornelius ikwer yangkelhek.

⁴ Cornelius aterirrek, angel renh ayernek, "Ilekek Atyetyart?"

Angel ranem renh ilek, "Akngeyel ngenh arek, ngarl ikwer angkenh, ntwarl man-weny-rnem-then ilek-ilek anthenh.

⁵ Ntwanem lyert-antey angkakert-rnem thwena Joppa tawen-warl, Simon ikwer-anem yangkelhemel. Simon ra itna ingweran Peter.

⁶ Simon Peter aneyel Simon yenp mpwarey-angker-itwek, apmer Joppa-itwek, kwaty impalthelarl warl artelhenh."

⁷ Alakenh angkek-penh angel ra kel alpek-anem. Cornelius warrkenh atherrek yangkelhek, artwa anyent ingwer-then, arnkwa ikwerenh arntarnt-arey-angker.

⁸ Cornelius-el angel-kenh angka ikwer-rnem ilek. Ikwer-penhan ra renh-rnem Joppa tawen-warl thwenek.

⁹ Arlta ampepel rernem apetyenhel-antey apmer Joppa-warl. Peter nganek warl irrwerl-warl Akngey-warl angketyek.

¹⁰ Ra angayakwirrek, amern arlkwetyek iterrek. Ankwel renh atwek, ingwer-rnemel amern ampennenhel-antey. Ra ankwayntek, apelp-anem.

¹¹⁻¹² Ranem altyerr arek. Ra itnywenek, panty ilkwa atnwenth ingwerek-ingwer-akert, thip ingwerek-ingwer-then, ahernel alheyel-rnem-then alker-they atwarrerl-alhenty.

¹³ Ra awek, renharl ilek, "Peter-ay, aker atwemel arlkway!"

¹⁴ "Inkartay, atha nthakenh aker apmwa yanh-rnem arlkwey-angenh!"

¹⁵ Ranem awelhek arrpemar, renharl ilek, "Akngey angkek mwerr ntwal alhewer arlkwetyek, aker ilek-ilek ntwal alhewer arlkwetyek. Nhopenh apmwel-areth angkey-angenh. Akngeyel menty antheke, ntwal arlkwetyek."

¹⁶ Irrpety-inger Akngeyel alakenh ilek. Ikwer-penhan Angel ra panty renh atnwenth ilek-ilek-akert alker-warl-anem akngey-nek.

¹⁷ Peter ywarn-antey iterrek altyerr arek-penh. Artwal akngerr ingwer-rnem Cornelius-elarl thwenek, rernem arriw-ampenyel rtnek. Rernem nthwek Simon ikwer.

¹⁸ Rernem ingwer-rnem ayernenh Simon ikwer.

19 Peter ywarn iterrek, ra arek-penh. Itnweng Rlwartel-anem renh ilek, "Aray, artwa irrpety ingwer-rnem ngkweng nthwerl-apeyel.

20 Akemirra anamerl alhant ikwerenh-rnem-angkwarr! Atha renh-rnem ngkweng-warl thwenek."

21 Peter-el renh-rnem ilek, "Ilekek atyeng arrantherr nthwerl-apeyel? Nhanyemap ayengan. Ilekek arrantherr apetyekan?"

22 Artwa rernem renh ilek, "Cornelius artwa irlkenty-akert atyetyartel anwenhantherr thwenek. Jew-rnem ingkerrenh akalty ra artwa arraty-angkwarr mwerr innga aneyel. Rantey arrpemarl Akngey renh iterl-areyel. Apmwerrkel Akngey-kenh angel apetyek ngkweng yangkelhetyek, ngenh awetyek."

23 Peter-el renh-rnem ilek, "Ingwa anyentel arrantherr ayntetyek."

Ingwepenh-anem rernem anperl-alhek, Joppa-areny-rnem-then.

24 Arlta ingwerelan rernem Caesarea tawen-warl irrey-alhek. Cornelius ra kel mpwelhek ikwerenh-rnem-akert.

25 Peter ra Cornelius-kenh warl-warl aylpenhek. Cornelius ra kwenirremel ikwer-itwek, ikwer inkwerelhek.

26 Peter-el renh ilek, "Atyeng inkwerelhey-angenh rtnerl-alha! Ayengan ahern-areny ar-warl."

27 Ratherr angkerrenhel, ra warl kwen-warl aylpek. Rap akngerr arek.

28 Ra renh-rnem ilek, "Arrantherr kel akalty. Artwa Jew-rnem artwa Jew-weny-rnem-kety ar-

lkarirreyel. Akngey atyeng angkek, Jew-weny-rnemek irrpelthirrey-angenh anetyek.

²⁹ Ayeng ikwer awelhek. Alakenh-anyem ayeng apetyek, Cornelius atyeng yangelhek-warl. Ayenh ilay, ilekek nga atyeng yangelhek?”

³⁰ Cornelius-el renh ilek, “Apmwerrkel 3 o'clock-el-antey, artwa arnkwa arlter inngakert-anem atyeng-warl aremirrek.

³¹ Ra ayenh ilek, ‘Cornelius-ay, Akngeyel ngenh awek, ntwarl ikwer-warl angkek. Akngeyel ngenh arek, ngarl ikwer angkenh, ntwarl man-weny-rnem arntarnt-arenh.

³² Ntwanem thwena Simon Joppa tawen-warl, itnan ingweran ikweran Peter. Ra lyertan yempwarey-angker-itwel aneyel, Simon ingwerkenhan warl artelhenh kwaty impalth-itwek.’

³³ Athanem angkakert thwenek, ngkweng yangkelhek. Anwantherr ngkweng inkwerelhem, ngarl anwekantherr-warl apetyek. Anwantherr-anem akarrirrek, Akngeyek arraty inkwerelhemel awelhetyek. Inggart-kenh angkek, rarl thwenek renh iletiek.”

³⁴ Peter-anem angkek, “Ayeng akalty Akngeyan Jew-rnemekant inkwerelhey-angenh. Ra ingkerrenhek inkwerelhem.

³⁵ Rernem ikwer arraty awelhenty, ra ikwer-rnem inkwerelhem.

³⁶ Arrantherr akalty, Jesus Christ-angkwarr Israel-kenh ingkerrenh anyentirremarl. Jesus ra Inggart ingkerrenhek aneyel.

³⁷ Arrantherr akalty Judea-itwek John-el renh-rnem ilek, rernem baptise inetyek Galilee-itwek, Judea-itwek.

³⁸ Arrantherr akalty arrpemarl Akngeyel Itnweng Rlwart renh Jesus Nazareth-areny-warl thwenek, renh rlterr-kilek.

³⁹ Jesus ra apmer arrpanenh-itwek mwerrilek, ra arrenty-akert-rnem mwerrilek, Akngeyarl ikwer-itwek anek, Akngey-kenh Itnweng rlterr-akert. Anwantherr arek ra ingwerek-ingwer Jew-rnem mwerrilek Jerusalem-itwek. Rernem renh ipmek atwek, arwerl iylpeyl-atherr-itwek.

⁴⁰ Ingwa atherr-penh Akngeyel renh akemel-hilek ipman ayntekarl-penh. Anwantherr renh aytarek arrpemarl.

⁴¹ Ingwer-rnemel renh arey-angenh-antey. Ikwer-itwek arlkwek-rnem-then antywek-rnem-then anwantherr ikwer akalty, awenng-they akemirrekarl-penh.

⁴² Jesus Christ-el anwenhantherr ilantheke, angka mwerr-angker akalty-anthetyek. Anwer-nantherr renh iletiek, Akngeyarl renh ar-rernek, ra ikwerenh-rnem akngaketyek ingwer-rnem-they, ahern-areny ingkerrenh, itetharl aneyel-rnem-then ipmernem-then.

⁴³ Akngey-kenh angkakert arrwekeleny-rnemel ilek, rerneman Akngey renh tnakenty Akngeyel kel apmwa ikwer-rnem-kety iwem.”

⁴⁴ Peter ra angkenhelarl-antey Itnweng Rlwart ra ikwer-rnem-warl antelhek, Cornelius-rnem-warl.

⁴⁵⁻⁴⁶ Rernem angka ingwerek-ingwer-anem angkerrenh awerrey-angenhant-arey, Akngey ikwer inkwerelhek arrpemarl. Jesus-arl apenteyel irrpety Rernem apatek Akngeyarl Itnweng Rlwart thwenek apmer arrpanenh-warl, artwa

alethang-rnem-warl.

⁴⁷ Peter angkek arrpemarl, "Itnweng Rl-wart ra artwa nhernem-warl antelhek, rarl anwekantherr-warl antelhek-apeny.

⁴⁸ Alakenhaym-they arrantherr arraty baptise inetyek." Rernem Jesus Christ-kenh itnel kwatyel baptise-emelek. Ikwer-penhan arlta irrpety Peter ikwer-rnem-itwek anek, rernemarl renh ayernek-angkwarr.

11

Jerusalem-warl apey-alpeyel, Peter-el ingwer-rnem ileyel

¹ Apmer Judea-itwek Jesus-arl apenteyel ingwer-rnem anenh. Inkart-areny-rnem-then rernem ingkerrenh awek. Rernem awek Jew-weny-rnemelarl Akngey-kenh angka tnaekarl arrpemarl.

² Peter-anem Jerusalem-warl alpek. Jew-rnem anenh Jesus-arl apenteyel-rnem. Rernem Peter rethen tnhwerant-arey ilterrenh.

³ Rernem Peter renh ayntarrp-ilek, "Nga alethang-rnem-kenh warl-warl aylpek, ikwer-rnem-itwek amern arlkwek."

⁴ Peter-el-anem angka ikwer-rnem ilek,

⁵ "Ayeng Joppa tawen-el anenh. Arlta ingwerelan ayeng Akngey-warl angkek, ayeng ankwanem aynterl-arrernek, atha altyerr-anem arek. Atha arek angel-el ampwal kalikw ilk-wapeny alker-they atwarrelhilek atyeng-warl.

⁶ Kalikw-apeny kwen-itwek, atha atnwenth ingwerek-ingwer arek, ahernel alheyel-rnem-then thip-rnem-then.

⁷ Athanem awek ayenharl ilek, 'Peter-ay, akemirray! Aker atwemel arlkwa!'

⁸ Ayeng angkek, 'Inkartay, atha aker nthakenh arlkwey-angenh, ngarl weth arrwekel atnwenth arlkwekerr arrkngert angkek.'

⁹ Athanem awek Akngey alker-they angkek, 'Aray, Akngeyel alakenh-anyem ilenty, kel mwerr. Irrpelthirrey-angenh ikwer, ntw aker arlkwetyek arwa alhewer.'

¹⁰ Alakenh-anyem atyeng ilek irrpety-inger. Ikwer-penh Akngeyel kalikw-apeny alker-warlanem aleth-antey akngeynek.

¹¹ Ikwer-penh artwa irrpety warl arriw-itwel rtneyarr-alhek. Caesarea tawen-they rernem apetyek.

¹² Itnweng Rlwartel ayenh ilek, ayeng alhewer alhetyek. Artwa Jesus-arl apenteyel 6-pel Joppa-areny-rnem atyeng-angkwarr alhek arrpemarl Caesarea tawen-warl. Aley rernem anwekantherr-itwel aneyel. Cornelius-kenh warl-warl anwantherr aylpenhek.

¹³ Cornelius ranem anwekantherr ilek angel-elarl ikwer-warl aremirrek. Angel-el renh ilan-theke, 'Angkakert Joppa-warl thwena, Simon ikwer yangkelhetyek. Simon itna ingweran Peter-arl.

¹⁴ Simon Peter ranem ngkweng angka Akngey-kenh iletyek, ntw a angka Akngey-kenh iterlaretyek. Akngeyel arrenhantherr ingkerrenh itethileyen.'

¹⁵ Ayeng Cornelius-kenh-rnemek angkek. Itnweng Rlwart ra ikwer-rnem-warl antelhekanem, ra arrwekel anwekantherr-warl antelhek-

apeny.

¹⁶ Ayeng iylpangkek-anem, Ingkartarl anwenhantherr arrwekel ilek, 'John-el ingkerrenh kwatyelant baptise-emelem. Akngeyel arrenhantherr Itnweng Rlwartelant baptise-emelem.'

¹⁷ Athanem iterl-arek, rernemarl Ingkart Jesus Christ tnakem, anwantherr renh tnakeyel-apeny. Akngeyel-anem Itnweng Rlwart renh thwenek ikwer-rnem-warl, rarl renh anwekantherr-warl arrwekel thwenek-apeny. Alakenhaym ayeng nthakenh Akngeyek irrpelthirrey-angenh."

¹⁸ Rernem Peter awek-penh rernem akateyelpek-anem ilterrey-angenh. Rernem Akngeyel-anem tnakek. Rernem angkerrenh, "Innganem Akngey Jew-weny-rnemek yangkelhek, rernem ikwer-warl angkepirretyek, rernem-anem iteth intem-antey anetyek."

Jesus-arl apenteyel-rnem apmer Antioch-itwek

¹⁹ Stephen ipmek atwek-penh, Jew-rnemel Jesus-arl apenteyel-rnem atwetyek alwernek. Jesus-arl apenteyel-rnem Jerusalem-angkwarr apmer arrpanenh-warl arlperryirrek, Akngeykenh angka ilerl-apayntetyek, Jew-rnemekant, apmer Phoenicia-itwek, apmer Cyprus-itwek, apmer Antioch-itwek.

²⁰ Ikwer-penhan Jesus-arl apenteyel irrpety apmer Cyprus-areny Cyrene-areny-rnem-then tawen Antioch-warl alhek, angka Jesus-kenh akalty-anthetyek artwa Greek-arl angkeyel-rnemek.

²¹ Ingkartel renh-rnem rlterrilek. Akngerrel-anem Ingkart renh tnakek, ikwer-warl angkepirremel.

²² Jerusalem tyaty-areny ingwer-rnemel awek, rernemarl Ingkart-warl angkepirrek, rernem-anem Barnabas renh thwenek Antioch tawen-warl.

²³ Antioch-itwek Barnabas ra iterl-arek, Ingkartelarl renh-rnem arntarnt-arek, ranem inkwerelhek. Renh-rnem ilek, Ingkart-angkwarr aleth apenterl-ayntetyek.

²⁴ Barnabas ra artwa mwerr anenh. Itnweng Rlwartel renh rlterrkillenh. Ra Ingkart tnakenh. Renh awek-penh akngerr ingwer-rnem Ingkart-angkwarr apenterl-ayntetyek angkepirrek arrpe-marl.

²⁵ Barnabas Tarsus tawen-warl alhek, Saul-ek nthwetyek.

²⁶ Renh arey-alhemel ra ikwer-akert Antioch tawen-warl tyaty-areny-rnem-warl anyentirrek. Ratherr-anem renh-rnem akalty-anthek aher-rety anyentel. Antioch-arenyel-rnem Jesus-arl apenteyel-rnem itnewek Christian-rnem.

²⁷ Ratherr Antioch tawen-itwek anenharl-antey, Akngey-kenh angkakert irrpety Jerusalem-the y apetyek.

²⁸ Artwa anyent Agabus Jesus-arl apenteyel-rnem ilek, aherrety amern-wenyarl aneyenh apmer arrpanenhek. Renh-tangkwel Itnweng Rlwartel ilek aherrety arrer-anem amern-weny. Kel alakenh-anyem innga ayntek Claudius Atyet-yart ilkwa Rome-itwel anenh-angkwarr.

²⁹ Akngerr ingwer-rnemel-anem man iweynek Jesus-arl apenteyel ingwer-rnemek, Judea-itwel anenh-rnemek. Anyentel-anyentel rernem man thwenek, irrepern-rnemek.

³⁰ Rernem man renh Barnabas-atherr Paul-atherr antheh, ratherr atyetyart tyaty-areny-rnemek man anthetyek, ingkart Judea-areny-rnem man anthetyek.

12

Akngeyel Peter tyarleweyel tyayl-they

¹ King Herod-el-anem ahelengkw-rnem thwenek, rernem tyaty-areny atwetyek. Ingwer-rnem anterrkwek.

² Ranem ahelengkw ikwerenh-rnem thwenek, James John-kenh ayteyikw akapwert arternetyek napp arlpenty arreylpel.

³ Herod-el awek Jew-rnemarl ikwer inkwerelhek. Alakenh-anyem ra ahelengkw-rnem thwenek Peter renh anterrkwetyek. Arlta ikwerel Jew-rnem akarrirrek amern ilperr-ilperr thwet-weny arlkwetyek, Akngeyek inkwerelhetyek.

⁴ Rernem Peter renh anterrkwek tyayl-warlanem akwernek. Herod-el ahelengkw akngerr thwenek, rernem renh arraty innga arntarntaretyek. Ra iterrek Peter renh court-emiletyek angka akngerr ayernetyek amern tyenkerr arlkwenty-penh.

⁵ Alakenh-anyem Peter tyayl-itwek anenh. Tyaty-arenyel-rnem Akngey ayernenh Peter ikwer, Akngeyel renh arntarntaretyek tyayl-itwel.

⁶ Ingwa ingwerel-anem Herod ra iterrek, "Ingwepenh atha Peter renh ayerneyenh, court-emiletyek." Peter ahelengkw-atherr-they ampepel ankwayntenh, tyayl kwen-itwek. Ahelengk-

wel renh tyeyn atherrel arertnek. Ahelengkw ingwer atherr arriwelarl rtnenh.

⁷ Inkart-kenh angel kwen-itwek aremirrek. Lyenentyel-anem renh-atherr arrtyernek tyayl kwen-itwek. Peter rlta arnemel, angkek-anem, “Anamerl akemirra!” Tyeyn ratherr-anem Peter iltyethey lhelhelhek.

⁸ Angel ranem renh ilek, “Arnkwa ngkwenhel aylperl-alha, pwet sandal ngkwenh-atherrelthen.” Peter arnkwel-anem aylpek. Ikwerpenhan angel-el renh ilek, “Arnkwa kwet ngkwenhel aylpa, ayenh-anem apentemel ingkernthey!”

⁹ Peter-el-anem angel renh apentek. Ra iterrek ra altyerr renh arerl-anenty-arrpantey.

¹⁰ Ratherr ahelengkw-atherr-angkwarr rwaylpenhek. Ikwerpenhan ahelengkw ingwer-atherr rwaylpenhek arrpamarl. Ikwerpenh ayen keyt arriw ikwer-warl apetyek. Keyt ament altywerirrek. Ratherr-anem aketh-warl tyerrelhenhek iwerr anyent-angkwarr. Ikwerpenhan angel-el Peter renh iwerl-alhek-anem.

¹¹ Peter-el kel iterl-anem-arek. Ra angkek, “Atha kel iterl-areyel-anem. Akngeyel angel ikwerenh thwenek, ayenh Herod-kety itethilyek. Herod-then Jew-rnem-then ilkelhek, rernem ayenh ipmek atwetyek-arrpantey.”

¹² Peter Mary-kenh apmer-warl alhek. Mary John-kenh amikw anenh. John itna ingweran ikwerenh Mark. Mary-kenh warl-itwek Jesus-arl apenteyel ingwer-rnem arrwekel akarrirrek Akngey-warl angkayntetyek.

13 Peter ra arriw renh rltar-atwek. Kwey war-kenh anyent itnan ikwerenh Rhoda ra arriw-warl alhek aretyek.

14 Peter ra angkek. Warrkenhel renh alhengk-awek inkwerelhemel. Peter ikwer arriw-anem altyweriley-angenh. Kel anamerl-antey ingwer-rnem ilek, "Peter yanh arriw-itwek rtneyel!"

15 Rernem renh ilek, "Kwey, ngan arwengk-warl!" Ra angkek arrpemarl, "Peter yanhey arriw-itwek rtneyel!" Rernem apal angkek, "Kel, itnweng arrewaly ikwerenharl yanh." "

16 Peter-el arriw renh rltar-atwek arrpemarl. Arriw renh altywerilemel Peter-anem rernem arek rtnerl-anenty. Rernem ywarn iterrek.

17 Peter-el renh-rnem akaterilek, ranem ikwer-rnem ilelhek angel-elarl renh tyayl-they tyarlewek. Ikwer-penh ra renh-rnem ilek, "James-rnem-then ilenherr-arey, ayeng tyayl-they tyerrelhek." Renh-rnem iwerl-alhemel, Peter ra apmer ingwer-warl-anem alhek.

18 Ingwepenh-anem tyayl-areny ahelengkw-rnem ywarn iterrek. Rernem Peter ikwer ywarek.

19 Herod-kenh-rnem ikwer ipantey nthwenh. Ranem ahelengkw-rnem ilek, "Arrantherr Peter renh mwantyel arntarnt-arey-angenh tyarlewek." Ikwer-they rernem renh-rnem ipmek atwek-anem. Ikwer-penhan Herod apmer Judea-they Caesarea tawen-warl alhek, ikwerel aleth-antey aney-alpek.

Herod ilweyel

²⁰ Herod ingwer-rnem-then ahel ilterrenh, Tyre-areny-rnem-then Sidon-areny-rnem-then. Rernem Herod-kenh apmer-itwek amern payemelenh apmelerr. Rernem amern-they ilterrenh. Alakenh-anyem rernem angkakert thwenek Herod-warl. Angkakert rernem artwa Blastus ikwer-itwek angkerrenh. Blastus ra Herod-kenh apmer arntarnt-arey-angker anenh. Rernem Blastus renh ilek, rernem mwerrant-arey anetyek Herod-akerr tawen-areny-rnem-then ingkerrenh.

²¹ Arlta ingwerel rernem apetyek, rernem angkerretyek. Herod-anem Atyetyart ilkwekenh arnkwe warl aylpek. Chair ilkwa ikwerenhel-anem arrernelhek. Ranem ingkerrenh-warl angkek.

²² Renh awemel, ingkerrenh rernem arlkek, “Akngey anwekantherr angkeyel, artweweny!” Rernem altyerrek-arrpantey inkwerelhek Herod ikwer.

²³ Herod ingkart-arrpantey tnakelhenh. Ikwerthey, Ingkart-kenh angel-el renh atwek. Tyerrapenyel-anem arlka ikweren arlkwek, ra ilwek-anem.

²⁴ Jesus-arl apenteyel-rnemel apmer arrpanenhek Akngey-kenh angka akalty-anthek. Akngerrel Jesus renh tnakek.

²⁵ Barnabas-atherr Saul-el-atherr tyenkerr man Jerusalem-el-antey iwerl-alhek, ratherr Antioch tawen-el-antey aney-alpek. John Mark ikwer-atherr-angkwarr alhek arrpemar.

Tyaty Antioch-arenyel-rnem Barnabas-then Saul-then thweneyel Jew-weny-rnem-warl

¹ Antioch tyaty-areny-rnem rernem angkakert-rnem-then akalty-anthey-angker-rnem-then anenh. Barnabas, Simeon itna ingweran itnewenh Irrpwerl, Lucius Cyrene tawen-areny. Manaen, renharl Herod ingwerel ilkwilek. Saul anenh arrpemarl.

² Ingwer-inger artwa rernem Ingkartek ikwerelhek, amern-weny anemel, Akngey-ayteng iterretyek Itnweng Rlwartel renh-rnem ilek, "Ayeng-anem ilkelheyel Barnabas Saul-atherr thwenetyek, angka mwerr ilerl-apayntetyek apmer arrpanenh-itwek. Arrantherr-anem renh-atherr thwenetyek."

³ Rernem-anem Akngey iterl-aremel amern-weny aleth anenh, Akngeyekant iterretyek. Ikwer-penhan rernem Saul Barnabas-atherr akapwert-warl iltiya arrernek renh-atherr thwenemel-anem. Akngey ayernek, renh-atherr arntarnt-aretyek.

Barnabas Saul-atherr apmer Cyprus-warl alheyel

⁴ Itnweng Rlwartel-anem Saul Barnabas-atherr Cilicia-warl thwenek. Tawen ikwer-itwek rernem rtnwewarl nganerl-alhek Cyprus-warl-anem artarnpenhek. Cyprus ra akwerlp ilkwa innga ayntenh, kwaty alay amep-itwek.

⁵ Salamis tawen-itwek apmer Cyprus-itwek rernem Akngey-kenh angka Jew-rnem akalty-anthek tyaty ikwer-rnem-kenh-itwek. John

ikwer-atherr-itwek anek arrpemar. Ra ikwer-atherr-angkwarr ilkwatherr alhek.

⁶⁻⁸ Cyprus-angkwarr artarnpenhemel rernem tawen ingwer-warl apetyek, itnan ikwerenh Paphos. Bar-Jesus ra artwa Jew anenh. Elymas Bar-Jesus Greek-kenh itna. Ra arrangkwelth mpwarenh tnakelhemel, Akngey-kenh angkakert-arrpantey. Artwa ra Sergius Paulus Roman kapment-kenh artwa Atyetyart. Sergius Paulus ra artwa akalty innga anenh. Ra awek ratherrarl Paphos ikwer-itwek aney-alhek. Ranem ikwer-atherr yangkelhek, ratherr renh Akngey-kenh angka akalty-anthetyek. Sergius Paulus-el Jesus renh tnakek. Elymas arrkngert angkek ikwer-atherr. Elymas-el renh-atherr irrentetyek arrk-ernelhek, Sergius Paulus Inkart-kety angkepilyek.

⁹ Itnwengel-anem Saul renh rlterrkilek. Saul itna ingweran Paul. Rernem renh itnewenh Paul.

¹⁰ Paul ranem Elymas renh artewentyel aremel ilek, “Ngan arrenty-kenh ampan aneyel, nga mwerr-rnemek apmwan aneyel. Ntwa Akngey-kenh angka ilpertileyel.

¹¹ Akngyel ngenh atweyenh, aparrngileyenh. Ingwer-ingerant ntw areyenh arrpemar.” Elymas kel aparrngirrek-anem. Ranem artwa ingwer ikngwek atnwenheyn-ayntetyek.

¹² Sergius Paulus-el arek-penh Akngyel Elymas aparrngilekarl, ra Akngey renh tnakek. Ra Paul renh awek, rarl ingwer-rnem Inkart-kenh angka akalty-anthenh. Sergius Paulus-el apatemel awek, Inkart-kenh angka inngarl ayntek.

Paul Barnabas ratherr akngerr akalty-antheyel

¹³ Paul-kenh-rnem rtnwewarl nganek artarn-penhetyek, apmer Perga-warl Perga ra tawen Pamphylia-itwek anenh. John-el renh-rnem iw-erlelpek, Jerusalem-warl-anem alpetyek.

¹⁴ Paul Barnabas-atherr Perga tawen ikwer-they Antioch tawen ikwer-warl-anem alhek. Antioch ra apmer Pisidia-itwek ayntenh. Ikwer-penhan arlta Saturday-el ratherr alhek Jew-rnem-kenh tyaty akely-warl. Ratherr kel arrernelhek-anem.

¹⁵ Artwa ingwer-rnem Moses-kenh angka Akngey-kenh angkakert-rnem angka reytemilek. Tyaty-areny Atyetyartel-anem Paul-atherr ayernek, “Artwa atyenh-atherray, mpwelanth apek ilkelhenty. Akngey-kenh angka anwekantherr anayntiletyek, anwantherr arraty-angkwarr apenterl-ayntetyek.”

¹⁶ Paul akemirrek ikwer-rnem iltyerrek, akateriletyek. Ra renh-rnem ilek, “Artwa Israel-kenh-rnemay, arrantherr atyeng awelhenherry-arey!

¹⁷ Artwa Israel-kenh-rnem-kenh Inkart Akngey anwekantherrenh-rnem riwanek. Ranem renh-rnem akngerram-akngerrilek Egypt-itwel anetyek. Ikwer-penh Egypt-areny-rnemel akngey anwekantherrenh atwemel. Akngeyel renh-rnem Egypt-they atnwenhek.

¹⁸ Ranem renh-rnem aherrety 40-ek-atwety arntarnt-arenh, rernem ikwer aleth tyel-angkenh.

19-20 Arrwekeleny anwekantherrenh-rnem aherrety 450 mpwelhenh apmer alhelekarl anetyek. Akngeyel Canaan-areny-rnem angka 7 angkenharl-rnem atwek, anwekantherrenh-anem ikwer-rnem antheke apmer renh. Rernem apek Canaan-itwek anenh-antey Akngeyel artwa atyetyart ikwer-rnem-warl thwenek, renh-rnem itethiletyek, Samuel apey-alpetyek-atwety. Samuel ra Akngeyel-kenh angkakert anenh.

21 Ikwer-penh akngerrel Akngey ayernek, atyetyart ilkwa ikwer-rnem rnkernetyek. Akngeyel-anem Saul renh rlwanek atyetyart ilkwa ikwer-rnem anetyek. Saul ra Benjamin-kenh arrpemarl anenh, Kish-kenh alerikw. Ra atyetyart ilkwa anenh aherrety 40-ek-atwety.

22 Akngeyel renh irrentek intem-antey, ingwer-anem aney-alkenh. David-anem rnkernek, atyetyart ilkwa ikwer-rnem anetyek. David ikwer-penh alakenh Akngeyel ilek, 'David, Jesse-kenh alerikw, ayeng ikwer inkwerelheyl, rarl atyeng-gant awelheyl.'

23 Akngeyel Israel-kenh-rnemek alhelek artwa anyent thwenetyek, ra renh-rnem itethiletyek. Artwa ranap David-kenh arrpemarl. Jesus ran artwa itethiley-angker aneyel.

24 Jesus-they arrwekel-antey John apetyek. John-el Israel-kenh-rnem ilek, rernem Akngey-warl angkepirretyek, ranem renh-rnem baptise-emeletyek.

25 John ra warrk ikwerenh ywerrelhiletyek arrer-anem irrek, ra ingkerrenh ayernek, 'Angwenharl ayengan? Nthakenh arrantherr atyeng iterreyel? Atha arrenhantherr iley, ayeng

itethiley-angker inngewenyarl. Arrantherr ikwer mpwelheyel. Aray, itethiley-angker ingweringerant apetyeyenh. Ayengan riterrk-wenyarl, artwa apmwamwamarl. Ayeng arrangk, arwarl warrkenh ikwerenh aneyel.'

²⁶ Artwa atyenh-rnemay, anwantherr Abraham-kenh-rnem aneyel, arrantherrap atyeng awelhenherr-arey! Artwa Inkartareny ingwer-rnem arrantherr awelhenherr-arey, Akngeyek inkwerelhetyek. Akngeyel anwenhantherr ilek, rarl anwenhantherr itethilek.

²⁷ Aray, Jerusalem-areny-rnem atyetyart rernem iterl-arey-angenh akwerrparl, Jesus ikwer, rarl itethiley-angker aneyel. Pip rernem reytemilenh akwerrpel, Saturday arrpanenhel.

²⁸ Rernem Jesus renh ywarn-antey ayntarrpilek. Rernem Pilate renh ayernek, ra Jesus renh ipmek atwetyek.

²⁹ Akngey-kenh angka arrwekeleny alakenh aynteyel: 'Itethiley-angker ra ilwetyek.' Kel arraty-angkwarr aynteyel. Rernem-anem renh arwerl iylpeyl-atherr-they atwarrelhilek, awenng intey-warl akwernek.

³⁰ Akngeyel Jesus renh ipmepenah akemelhilek.

³¹ Rernem renh arrwekel apentenh Galilee-they Jerusalem-ek-atwety, rernem renh arek angetherr arrpemar, iteth-antey Ingkerrenhel alakenh ileyel, angka nhenh arraty innga aynteyel.

³²⁻³³ Anwantherr-anem arrekantherr angka mwerr-angker ilem. Akngeyel arrwekeleny-rnem alhelekarl, ingwer-inger itethiley-angker

thwenetyek. Akngeyel kel itethiley-angker anwekantherr-warl thwenek. Jesus ra itethiley-angker Jesus anem. Akngeyel renh ipmepenh akemelhilekarl. Psalm 2-el Jesus-penh ileyel, 'Nga alerey atyenh aneyel. Lyert ayeng Akngey ngkwenh aneyel.'

³⁴ Akngeyel Jesus renh ipmepenh akemelhilek arlka ikwerenh apmwirrey-angenh. Akngey-kenh angka alakenh aynteyel: 'Atha arraty innga alheleyel atharl David alhelek-apeny.'

³⁵ Akngey-kenh angka arrwekeleny ingwerel aynteyel: 'Akngeyel nthakenh renh iwerl-alhey-angenh arlka ikwerenh apmwirrey-angenh.'

³⁶ David-arl iteth anenh ra Akngeyek awel-henh. Ra kel ilwek. Rernem renh akwernek, arrwekeleny-rnem ikwer-itwek-antey. Arlka ikwerenh apmwirrek-anem.

³⁷ Akngeyel Jesus renh ipmepenh akemelhilek, arlka ikwerenh apmwirrey-angenh, arrangkw.

³⁸ Atyenh-rnemay, atha arrenhantherr ileyel, Jesus-angkwarr apententy, Akngeyel apmwa ar-rekantherrety iwem.

³⁹ Arrantherr atyeng-angkwarr arraty-angkwarr aneyel, Moses-kenh angka arrangkwarl aynteyel. Arrantherr Jesus renh tnakenty, arrantherr mwerr-angkwarr aneman. Moses-kenh angkekant awelhenty, arrantherr arraty apentey-angenh.

⁴⁰ Arrantherr mwanty anetyek. Anwantherr mwanty arntarnt-arelhetyek, apmwewarl irrek-err. Akngey-kenh angka arrwekeleny-rnem alak-ench aynteyel.

⁴¹ Akngeyel renh-rnem ilek, 'Arrantherr apek atyeng irrpelthirrenty, arrantherr ilweyenhan. Aray, atha ilek-ilek-angkwarr mpwareyel. Arrantherr ayenh tnakey-angenh ingwer-rnemel arrenhantherr ileyel-angkwarr.' "

⁴² Paul-atherr Barnabas-atherr tyaty ikwerthey tyerrelhek. Ingwer-rnem ikwer-atherr yangkelhek, ingwer-rnem-warl apetyetyek, renh-rnem Akngey-kenh angka akalty-anthetyek arlta Saturday-el.

⁴³ Jew ingwer-rnem-then rernem Akngey renh tnakek, ratherr ingwer-rnemek angkek. Ratherr renh-rnem ilek, rernem Akngey rlterrk innga tnaketyek, rarl renh-rnem arntarnt-arenh.

⁴⁴ Saturday ingwerel-anem ingkerrenh anyentirrek Akngey-kenh angka awetyek.

⁴⁵ Jew-rnemel akngerr aremel, Paul-kety arlkarirrek. Rernem-anem ingkerrenh angetherr Paul-ek irrpelthirrenh.

⁴⁶ Paul-atherr Barnabas-atherr arnkaty ikwer-rnemek angkek, "Akngey ilkelheyel aylanth arrekantherr-tangkwel Akngey-kenh angka iletiek. Arrantherr Akngey-kenh angkek irrpelthirreyel, intem iteth aney-angenh ilkelhey-angenh. Alakenh-anyem aylanth Jew-weny-rnem-warl alerl alheyel, Akngey-kenh angka ikwer-rnem iletiek.

⁴⁷ Ingkartel anwenhantherr ilantheek, 'Atha arrenhantherr rnkernek, Jew-weny-rnem atnwenhetyek atyeng-warl, angka atyenh iletiek arrpe-marl. Akngey ilkelheyel arrenhantherr itethiletiek.' "

⁴⁸ Angka awek-penh Jew-weny-rnem ikwerelhek. Inkart renh tnaek arrpemar. Inkerrel Akngeyelar rlwanek itethiletyek, rernem Inkart tnaek arrpemar.

⁴⁹ Jesus-arl apenteyel ingwer-rnemel ingkerrenh Akngey-kenh angka akalty-anthek arrpemar apmer Pisidia-ampenyel.

⁵⁰ Antioch tawen-itwek, arelh ilkwernem-then artwa ilkwernem-then rernem Akngeyek inkwerelhemel anenh. Jew-rnem-anem ikwer-rnem yangkelhek, Paul Barnabas atherrek anngern-tirretyek. Rernem Paul-then Barnabas-then irrentek.

⁵¹ Paul Barnabas ratherr ahern ingkethey tertangkwelhilek, rernem iterl-aretyek apmwangk-warrarl rernem renh-atherr irrentek. Ratherr Iconium-warl alhek.

⁵² Inkart-areny-rnem irrkngerney aleth-anem anenh. Itnweng Rlwart ikwer-rnem-itwek anenh.

14

Paul Barnabas-atherr tawen Iconium-warl alheyel

¹ Ikwer-penh Iconium-itwek Paul Barnabas-atherr Akngey-kenh angka ikwer-rnem ilek Jew-rnem-kenh tyaty-itwek. Renh-atherr awek-penh, Jew-rnem-then Greek angkeyelar-rnem-then Jesus renh tnaek arrpemar.

² Jew ingwer-rnemel Jesus renh tnakey-angenh arrangkw. Ikwer-atherrety arlkarirrek arrpemar. Rernem irrwernek. Alethang ingwer-rnem ahelirrek-anem.

³ Paul Barnabas-atherr Iconium tawen-el anenh-antey, ratherr Akngey-kenh angkek arnkatyel akalty-anthek, Ratherr ilek, “Ingartel ingkerrenh arntarnt-areyel.” Ingartel renh-atherr rlterrkilek, ratherr ilek-ilek mpwarek, arntety-rnem mwerrilek. Alakenh-anyem Ingartel Paul atherrek anayntilek, ratherr arraty innga akalty-anthek.

⁴ Iconium tawen-areny-rnem ywarn iterrek. Ingwer-rnem Jew-rnemek inkwerelhek. Ingwer-rnem ikwer-atherr inkwerelhek.

⁵ Ikwer-penh Jew-weny-rnem-then Jew-rnem-then Atyetyart ilkwernem-then angkerrenh, Paul-atherr Barnabas-atherr apwertel wetyek.

⁶ Ratherrarl angka awek-penh, ratherr aterel-anem anterrek apmer Lycaonia-warl. Lystra tawen-itwek Derbe tawen-itwek-anem intem-antey-anem aney-alpek.

⁷ Ratherr ingwer-rnem-anem Jesus-kenh angka mwerr akalty-anthek.

Paul Barnabas-atherr Lystra-el, Derbe-el

⁸ Lystra tawen ikwer-itwek artwa thapel anyent anenh. Alakenh-antey ra ilkwerrek, ingkel alhey-angenh.

⁹ Ranem Paul awek rarl ingwer-rnem akalty-antherl-apenh. Artwa renh aremel Paul ra iterl-arek rarl Jesus renh tnakenh, renh irrpelthel mwerriletyek.

¹⁰ Paul-el artwa renh ilek, “Ingka atherrel, rtnerl-alha.” Kel ra alpek-anem.

¹¹ Ingwer-rnem angkerrenh, altyerr ingwer-rnem irrwerl-they apetyenty-arrpantey ikwer-rnem-warl, Zeus, Hermes-atherr.

¹² Apalel rernem Barnabas renh itnewek Zeus, Paul-arl rernem itnewek Hermes. Rernem ingwer-rnem angkerrenh, Hermes, Zeus-kenh angkakertarl anenh.

¹³ Zeus-kenh tyaty ilkwa tawen-they aketh-ampenyel artelhekarl arrer-antey. Atyetyart tyaty-areny ilkelhenh Paul-ek-atherr Barnabas-ek-atherr inkwerelhetyek, tyenkerr-anem renh-atherr anthetyek. Pwelek-rnem-then alperr-rnem-then akngek ikwer-atherr-warl.

¹⁴ Paul-atherrel angka awek-penh, ratherr ahe-lirrek, arnkwa arlpenty-anem ilterrek. Akngerr ampep-warl ratherr arlkemel anterrek,

¹⁵⁻¹⁶ “Artwernemay, aylernanth ahern-areny arrpemar, arrekantherr-apeny. Aylernanth angka mwerr arrekantherr ilerl-apeyel. Irrtywerrey-angker altyerr ahern nhareny ipmay! Akngey iteth-warl angkepirrenhey-alpenherr-arey! Akngey ikwer-warl, rarl alker-then ahern-then kwaty alay-then arrpmernekarl, thip-rnem-then irrpeng kwaty-areny-rnem-then ingkerrenh-antey. Ingkerrenh anenh apatemel awank-akerr, Akngey iterl-arey-angenh. Aleyan Akngey ilkelheyel, ingkerrenh ikwer-warl angkepirretyek, altyerr irrtywerrey-angker apmwekety ipmelhetyek, renhant anyent iterl-aretyek.

¹⁷ Akngey innga ikwer-rnem anayntelhilek, rarl innga aneyel, ikwer-rnem inkwerelhemel kwaty aparew renh-rnem amern ingwerek-ingwer-then anthek. Alakenhaym ra ingkerrenh wantek, irrkngerney anthemel.” Alakenh ratherr renh-rnem ilek.

18 Innganem ratherr renh-rnem arternpilemel ilek.

19 Jew-rnem Antioch tawen-they Iconium tawen-warl apetyek. Rernem-anem Iconium tawen-areny-rnem ilantheek, Paul renh apwertel wemel ipmek atwetyek. Apwertel wek rernem. Rernem ikwer iterrek renh ipmek wentyeka-athen. Tawen-they aketh-ampeny-warl-anem iytarr-akngemel iwerl-alpek.

20 Kwertengerl ikwerenh-rnem ikwer-warl apetyek. Paul ra akemirrey-ayntek. Paul ikwer-rnem-angkwarr tawen-warl alpek arrpe-marl. Ingwepenh-anem Barnabas-atherr Paul-atherr Derbe tawen-warl alpek.

21 Tawen ikwer-itwek-anem ratherr ingwer-rnem Jesus-kenh angka akalty-antheek, Jesus renh tnakemel. Derbe tawen ikwer-they Lystra tawen-warl alpek. Ikwer-penhan Iconium tawen-warl-anem Antioch tawen-warl alhek.

Paul Barnabas-atherr Antioch-warl alpeyel

22 Ratherr-anem kwertengerl-rnem rterrkilek, renh-rnem ilek rernem Jesus renh tnaketyek aleth-antey. Ratherr renh-rnem ilek, "Aray, anwantherr artewentyel irrwampeyenh, Akngey-kenh ingkerrenh aneyel."

23 Paul Barnabas ratherr artwernem anyentarl-anyentarl arrerneynek, rernem tyaty-areny ingkerrenh arntarnt-aretyek. Ratherr amern arlkwey-angenh, Akngey renh ayernek, ra artwa arntarnt-arey-angker renh-rnem aleth-antey atnyenetyek.

24 Paul Barnabas ratherr apmer Pisidia-angkwarr alhek. Pamphylia-warl apetyek.

25 Perga tawen-areny-rnem Akngey-kenh angka akalty-anthek. Ikwer-penhan ratherr Attalia tawen-angkwarr-anem anper-alhek.

26 Attalia ikwer-itwek rtnwewarl nganerl-alhemel, ratherr Antioch tawen-warl alpek. Antioch-arenyel-rnem Akngey renh ayernek, ra renh-atherr arntarnt-aretyek. Antioch-arenyel-rnem renh-atherr thwenek, angka mwerr-angker ilerl-apayntetyek ingwer-rnemek, rerne-marl akwerrp anenh. Ratherr akwerrp ingwer-rnemek angka Akngey-kenh ilerl-apayntetyek. Ratherr kel warrk ikwer-atherrenh ywerrelhilek.

27 Antioch-itwek ratherr Jesus-arl apenteyel-rnem anyentilek. Ratherr-anem Inkart-areny-rnem ilek, "Aylanth Akngey-kenh angka Jew-weny-rnem akalty-anthenh, Akngeyel renh-rnem rlterrkiletiek, rernem Jesus renh tnaketyek."

28 Ratherr-anem kwertengerl-rnem-itwek aleth-antey aney-alpek.

15

Tyaty-areny atyetyart-rnem apmer Jerusalem-itwek angkerretyek

1 Antioch-areny ingwer-rnem Jesus-arl apenteyel-rnem rernem Jew-weny anenh. Arlta ingwerel Inkart-areny Jew ingwer-rnem apmer Judea-they apetyek apmer Antioch-warl, ingwer-rnem akalty-anthetyek, atherr-angkwarr-penh. Rernem Inkart-areny-rnem akalty-anthek, rernem Moses-kenh angka arrweleny apenterl-ayntetyek-arrpantey. "Akngeyel arrenhantherr

atnyeney-angenh, Moses-kenh angka apentey-angenharl arrantherr aneyelan.”

² Rernem ilenh, Paul-then Barnabas-then. Antioch-areny-rnemel Paul Barnabas-atherr artwa ingwer-rnem-then rlwanek, Jerusalem-warl alhetyek, rernem Akngey-kenh angka arratyilerretyek, Akngey-kenh angkakert-rnem-then tyaty-areny-rnem-then.

³ Tyaty-arenyel-rnem renh-rnem kel thwenek. Rernem alhek, Phoenicia-angkwarr, Samaria-angkwarr. Rernem tyaty-areny-rnem ilek, “Akngeyel Jew-weny-rnem kel atnyenek, itethilek.”

⁴ Paul-kenh-rnem Jerusalem-warl alhek. Rernem ikwer-rnem inkwerelhek. Paul-el renh-rnem ilek, “Aray, Akngeyel Jew-weny-rnem itethilek. Anwantherr ikwer-rnem Akngey-kenh angka renh-rnem akalty-anthetyek.”

⁵ Artwa Jesus-arl apenteyel ingwer-rnem Pharisee-rnem-arl anenh. Rernem-anem rtnerl-alhemel angkek, “Aray, Jew-weny-rnem rernemarl Jesus tnakem artwirretyek-tangkwel, Moses-kenh angkek-anem awelhey-alenty.”

⁶ Kwertengerl-rnem-then arntarnt-arey-angker-rnem-then anyentirrenh, angkerretyek.

⁷ Rernem intem-antey ilerrenh. Peter-anem rtnerl-alhemel angkek, “Arrantherr kel akalty, Akngeyel ayenh rlwanek atha apmer arrpanenh-angkwarr angka mwerr-angker ilerl-apayntetyek Jew ingwer-rnemek, rernem-anem Jesus tnaketyek.

⁸ Akngey kel ingkerrenhek akalty. Akngey kel lwewarrernelhek Jew-weny-rnemek.

Ikwer-rnem inkwerelhek ra anwekantherr inkwerelheyel-apeny. Akngeyel Itnweng Rlwart renh ikwer-rnem-warl thwenek, anwekantherr-warl thwenek-apeny.

⁹ Ranem Jew-weny-rnem-kety apmwan iwek rernem renh tnakenty, rarl anwekantherrety apmwa iwek-apeny. Anwantherr renh tnakem aleth-antey.

¹⁰ Ilek-ketyarl arrantherran awerr aneyel ikwer-rnem, rernem Akngey-kenh angka apentekerran? Iterl-aray, anwantherr Moses-kenh angkek ywarn apentetyek arrkernelheyel. Arrwekeleny-rnem ywarn arrkernelhenh arrpemarl.

¹¹ Akngeyel ingkerrenh anwenhantherr atnyenem, anwekantherr inkwerelhemel anwantherrarl Jesus tnakenty, Jew-rnem-then, Moses-kenh angka iterl-arey-angenh-rnem-then.”

¹² Barnabas Paul-atherr angkenharl tyaty-arenyel-rnem renh-atherr akatemel awenh. Ratherr renh-rnem ilek Akngeyelarl renh-atherr rlterrkilek, ilek-ilek mpwaretyek, arntety-rnem mwerriletyek, Jew-weny-rnem-itwek.

¹³ James-el-anem ilek, “Atyenh-rnem, atyenganem awelhenherr-arey!

¹⁴ Simon-el ayenh ilek, ‘Akngeyel renh-rnem arrwekel rlwanek, rernem ikwer-areny-rnem-anem anetyek.’

¹⁵ Akngey-kenh angkakert arrwekeleny-rnemel ilerl-apenh, alakenh arrpemarl. Akngey-kenh angka arrwekeleny alakenh-anyem aynteyel.

16 Ingkart ra angkek, 'Ingwer-ingeran ayeng apey-alpeyenh, atha David-kenh-rnem aknger-riletyek, rernemarl irrpetyapant aneyel-kety.

17 Ikwer-penhan Jew-weny ingwer-rnem Ingkart-warl-anem angkepirreyenh, Ingkartel renh-rnem arrwekel rlwanek-angkwarr.'

18 Ingkart ra awank-antey alakenh angkek.

19 Alakenh-anyem anwantherr arrkngert angkey-angenh, rernem menty Akngey-warl angkepirretyek.

20 Anwantherr ikwer-rnem ingkwernetyek pip ikwer-rnem-warl thwenetyek, rernem angka arraty iterl-aretyek. Anwantherr mwerrant-arey anayntetyek, Moses-kenh angka arrwekeleny aynteyel-angkwarr, rernem irrtwyerremel altyerr-arrpantey-rnem-itwek tyenkerr amern-then aker-then arlkwey-angenh anayntetyek, rernem ingwer-kenh anew ikngwey-angenh anayntetyek, rernem aker arrkngangketyarr arlkwey-angenh anayntetyek, arrknga antywey-angenh anayntetyek.

21 Aray, awank-they apmer arrpanenh-itwek Moses-kenh angkangkwarr akalty-anthenh. Rernem arlta Saturday arrpanenhel anyentel-anyentel reytirrek Jew-rnem-kenh tyaty akely-rnem-itwek."

*Jerusalem-areny-rnemel pip thweneyel
Antioch-areny-rnem-warl*

22 Ikwer-penh angkakert-rnem-then arntarnt-arey-angker-rnem-then tyaty-areny ingkerrenh rernem artwernem-anem rlwanek, Paul Barnabas-atherr-angkwarr Antioch tawen-warl

alhetyek. Judas itna ingwer Barsabbas-an. Artwa ingweran Silas.

²³ Kel rernem pip ingkwernek thwenetyek ikwer-atherr-angkwarr. Rernem alakenh ingkwernek pip-warl, Antioch tyaty-areny-rnemek, "Atyenh-rnem, Jesus-arl apenteyel-rnem akngerr, angkakert-rnem-then tyaty-areny atyetyart-rnem-then! Arrantherrarl Jew-weny-rnem, arrantherr Antioch tawen-itwek aneyel apmer Syria-el apmer Cilicia-el-then.

²⁴ Anwantherr awek ingwer-rnemarl arrekantherr irrpelthirreyel. Anwantherr awek artwa tyaty-areny irrpety arrekantherr-warl alhek, rernem-anem arrenhantherr ilpertiley-alhek. Anwernantherran renh-rnem thweney-angenharl, anwernantherr arlarl.

²⁵ Anwernantherr angkerrenh, Barnabas-atherr Paul-atherr ingwer-rnem-then arrekantherr-warl thwenetyek. Anwernantherr Barnabas Paul ikwer-atherr inkwerelhemel.

²⁶ Ingwer-rnem ikwer-atherr irrpelthirrenh, irrwampenh anthenh, ratherrarl Jesus Christ-kenh angka ilerl-apenhek.

²⁷ Anwernantherr-anem Judas-atherr Silas-atherr ikwer-atherr-angkwarr thwenem. Rernem pip ikwer-penh angka anayntilem, angka anyent renhey-antey.

²⁸ Itnweng Rlwartel ra anwekantherr ilek, arrekantherr angka irrpetyapant anayntiletiek.

²⁹ Arrantherr amern-then aker-then arlkweyang anetyek, ingwer-rnemel altyerr-arrpantey tyenkerr anthekarl-kety. Arrantherr arrknga antyweyang anayntetyek aker

arrkngangketyarr. Arrantherr apmwel-areth mpwarey-angenh, ingwer-kenh anew ikngwey-angenh. Arrantherr mwerr-angkwarr anetyek, nhekant awelhemel.”

³⁰ Tyaty-areny-rnemel artwa renh-rnem thwenek, apmer Antioch-warl. Rernem Antioch tyaty-areny-rnem akarrilek. Pip-anem rernem antheke. Artwa anyentel-anem reytemilek.

³¹ Angka renh awemel tyaty-areny-rnem inkw-erelhek, angka mwerr-angkerarl reytemilekek.

³² Judas-atherr Silas-atherr ratherr Akngey-kenh angkakert akalty atherr anenh. Ratherr-anem Jesus-arl apenteyel-rnem akngerr akalty-antheke rlterrkilemel-anem.

³³ Ratherr arleng-alenty aney-alhek. Ikwer-penhan Jesus-arl apenteyel-rnemel Antioch-areny-rnem thweney-alpek Jerusalem-warl,

³⁴⁻³⁵ Paul Barnabas-atherr Antioch-el anenh. Ratherr renh-rnem Akngey-kenh angka akalty-antheke, ikwer-rnem anayntilek angka renh. Ingwer-rnemel angka akalty-antheke arrpemarlarl.

Paul Barnabas-atherr

³⁶ Ikwer-penhan Paul Barnabas-warl angkek, “Ntwa tawen nheng-rnem iterl-areyel? Aylanth renh-rnem aretyek, akngerr ingwer-rnem arwekelarl aylanth akalty-antheke-rnem Akngey-kenh angka.”

³⁷ Barnabas ilkelhenh artwa John atnwen-hetyek arrpemarlarl. John itna ingweran Mark.

³⁸ Mark ikwer-atherrety arrwekel arlkarirrek, aleth ikwer-atherr-angkwarr warrkirrerl-anekerr. Alakenh-they renh-atherr Pamphylia-

they iwerl-alhek. Paul ilkelhey-angenh renh atnwenhetyek, rarl arlkarirremel alpek-kety.

³⁹ Ratherr Mark ikwer-they ilterrek. Ywarn arratyilerremel ratherr kel ipmelhekant-anem. Barnabas-el-anem Mark renh ikngwerl-alhek. Ratherr rtnwewarl nganerl-alhek apmer Cyprus-warl alhek.

⁴⁰ Paul-el Silas rlwanek ilkwatherr alhetyek. Tyaty-areny-rnem ikwer-atherr Ingartart-warl angkek, Ingartart renh-atherr arntarnt-aretyek.

⁴¹ Ikwer-penh ratherr Syria-angkwarr Cilicia-angkwarr alhek. Ratherr tyaty-areny ingwer-rnem rlterrkilek-anem.

16

Paul yangkelheyel Timothy ikwer; ikwer-angkwarr alhetyek

¹ Paul Derbe tawen-warl alhek. Ikwer-penhan Lystra tawen-warl-anem anperl-alhek. Tawen ikwerel artwa Timothy anenh arrwekel. Ra Jesus-kenh kwertengerl anenh. Timothy-kenh amikw Jew arrpemarl anenh, ra Jesus-arl apenteyel arpemarl. Aynikwarl ikwerenh Greece-arenyarl anenh.

² Jesus-arl apenteyel Lystra-areny-rnem-then Iconium-areny-rnem-then rernem ingkerrenhel Timothy tnakek, Timothy-ek inkwerelhek.

³ Paul ilkelhenh Timothy ikwer-angkwarr alhetyek. Jew ingkerrenh akalty anenh aynikw ikwerenh Greece-areny anenh. Alakenhaym-they Paul-el Timothy renh artwa mpwarek artwa Jew-rnem ahelirrekerr.

⁴ Rernem tawen arrpanenh-angkwarr alhek. Rernem Jesus-arl apenteyel-rnem Akngey-kenh angka ilerl-apenh Jerusalem-areny angkakert-rnem-then tyaty-areny atyetyart-rnem-then arrwekelarl antheke, rernem arraty-angkwarr apenterl-ayntetyek

⁵ Jesus-arl apenteyel-rnem akalty innganem irrek, ingwer-rnem Akngey-warl angkepirrek. Alakenh-anyem ingwer-rnem tyaty-areny-rnem-warl antelhek-anem Akngeyel ingwer-rnem anyentilek tyaty-areny-rnem-warl.

Paul-el altyerr areyel, artwa apmer Macedonia-arenyarl ikwer yangkelheyel

⁶ Itnweng Rlwart arrkngert angkek Paul ikwer-rnem, apmer Asia-itwek Akngey-kenh angka akalty-anthekekerr. Alakenh-anyem rernem Phrygia-itwek ingwer-rnem akalty-anthey-alpek apmer Galatia-itwek-then.

⁷ Apmer Mysia-arl arey-alhek-penh, rernem ilkelhek apmer Bithynia-warl alhetyek. Jesus-kenh Itnweng arrkngert angkek ikwer-rnem.

⁸ Rernem Mysia-angkwarr anper-alhek Troas tawen-warl.

⁹ Apmer ikwer-itwek Paul-el altyerr arek ingwel. Ra artwa Macedonia-areny arek, ikwer yangkelhekarl, "Macedonia-warl apetyay anwekantherr-warl, anwenhantherr akalty-anthetyek."

¹⁰ Ingwepenh-antey anwantherr rtnwek nthwey-ayntek apmer Macedonia ikwer-warl artarnpenhetyek kwaty-angkwarr. "Anwantherr

iterl-arek Akngey anwekantherr yangkelhek, Macedonia-areny-rnem akalty-anthetyek.”

Lydia-el Jesus renh tnakeyel

¹¹ Troas-itwek anwernantherr rtnwewarl nganek. Anwernantherr Samothrace ikwer-warl artarnpenhek. Ikwer-penhan arlta ingwerelan Neapolis ikwer-warl-anem.

¹² Tawen ikwer-they anwernantherr ingkel-anem alhek apmer Philippi-warl. Philippi ra tawen ilkwa anenh apmer Macedonia-itwek. Tawen ikwer-itwek Rome-areny akngerr anenh. Tawen ikwer-itwek anwernantherr arlta irrpty-inger anenh.

¹³ Arlta Saturday ikwerel anwernantherr tawen ikwer-they anperl-alhek, lher kwaty-akert-warl. Anwernantherr iterl-arek kwaty-angkwarr lher ikwer-itwek Jew-rnemar akarrir-renh Akngey-warl angkayntetyek. Apmer-itwek anwernantherr aney-alhek. Anwernantherr-anem arelh akngerr-itwek angkerrenh.

¹⁴ Arelh anyent rarl Paul awenh, itnan Lydia. Thyatira tawen-arenyarlap ran. Ra arnkwa mwerr-angker rnter-rnter payemelenh ingwer-rnem-warl tharlemilenh. Lydia ra Akngey-angkwarr apentenh. Inggartel iyipa ikwer alty-werilek, ra Paul arraty awetyek, Akngey-anem tnakemel.

¹⁵ Paul-el-anem renh baptise-emelek, ikwerrenh-rnem-then. Ikwer-penhan Lydia-el anwernenhantherr ikngwerl-alhek, “Arrantherr iterl-areyel, athan Inggart innga tnakeyelarl. Kel apetyenherr-arey, apmer atyenhel anetyek.”

Anwernantherr kel ikwer inkwerelhek, apmer ikwerenhel-anem anenh.

Paul Silas-atherr Philippi tyayl-itwek

¹⁶ Arlta ingwerel anwernantherr apmer irkaty ikwer-warl-antey alhek, Jew-rnemarl tyatyek akarrirrenh-warl, Akngey-warl angkaynteyek. Kwey aleyak warrkenhel anwernenhantherr arek. Ra arrenty-akert anenh. Arrentykenh rlterrk-akertel ra arrwekel-antey ilenh nthakenharl irreyenh, ngangker-apeny. Kwey warrkenhel renh-rnem ilenh. Ingwerel-rnem renh man antheke, angka ra tyakarl arrwekel-antey ilenh, nthakenh irreyenh. Alakenh-anyem atyetyart ikwerenh-rnemel man akngerr mpwarenh ikwer-they.

¹⁷ Kwey ranem anwernenhantherr apentek arkemel, "Artwa akngerr nhenh-rneman Akngey inngekenh angkakert-rnemarl. Rernem arrenhantherr kel arraty innga ilem, arrantherrarl Jesus renh tnakenty, Akngeyel arrenhantherr itethilemarl."

¹⁸ Kwey ra anwernenhantherr aleth-antey apentenh. Angka anyent ikwerel arlkerl-apenh. Ra Paul renh arwengkilek. Paul ranem rtnek arelh renh aremel, Paul-el arrenty renh ilek. "Jesus-kenh rlterrk-akertel atha ngenh ilem, kwey aleyak ikwer-they tyerrelha!" Arrenty ranem kwey ikwer-they kel tyerrelhek.

¹⁹ Atyetyart-rnem ahelirrek ikwer-atherrety, man kwey ra mpwarey-angenh-anem anenh-kety. Rernem Paul Silas-atherr anterrkwek tawen-warl akngek, court-el angketyek.

20 Ikwer-penh rernem renh-atherr atyetyart-rnem-itwek aytarrp-ilek, "Artwa nhenh-atherr Jew-atherr aneyel. Ratherr-antey arrpemar. Tawen nhareny-rnem ingkerrenh arwengkiley.

21 Ratherr anwenhantherr ilem anwantherr Jew-kenh-angkwarr apentetyek. Rome-areny-rnem anwantherr alakenh apentey-angenharl."

22 Artwa akngerr akarrirrek Paul renh-atherr aytarrp-iletyek. Atyetyart court-areny rernem ahelengkw-rnem ilantheek Paul-atherr Silas-atherr arnkwa lheletyek, whip-el atwetyek.

23 Rernem renh-atherr artewentyel atwekarl-penh, rernem renh-atherr tyayl-warl-anem akwernek. Rernem tyayl-areny artwamp ilantheek, renh-atherr mwantyl arerl-ayntetyek.

24 Alakenh-anyem tyayl-areny artwampel-rnem renh-atherr tyayl kwen inngewarl akwernek, arlaw atherr-anem tyeynel arertnek.

25 Ingwa ampepel Paul-atherr Silas-atherr Akngey-warl angkek Akngey tnakemel aylel-hemel. Tyayl-areny ingwerel-anem renh-atherr awek arrpemar.

26 Ahern ranem artewenty innga akngelhekar-lel, tyayl renh akngenhelhelek arrpemar. Tyayl arriw ingkerrenh altywerirrek, tyeyn lhelhek ingkerrenh-they.

27 Tyayl-areny atyetyart artwamp ranem atyekirrek, ranem arek tyayl arriw altywerirrekarl. Ra iterrek tyayl-areny-rnem ingkerrenh anterrenty-arrpantey. Alakenh-anyem ra nays arlpenty inek, ipmek atwelhetyek antwerrel.

28 Paul-anem ikwer arlkek, “IpmeK atwelhey-angenh, anwantherr ingkerrenh nhel aneyel-antey, tyerrelhey-angenh!”

29 Tyayl-areny atyetyart ranem lyenentyek yangkelhek arlkemel, ra anaynt aretyek. Ranem tyayl ikwer-warl aylpek. Ra aterirrek innga, Paul-atherr-kety, Silas-atherr-kety. Ampwethel arrernelhek kwenirremel.

30 Akemirremel ra renh-atherr aketh-warl atnwenhek. Ra renh-atherr ayerneK, “Artwamp atherray! Nthakenh athan ilem, ayenh Akngeyel itethiletyekan?”

31 Ratherr-anem ilek, “Inkart Jesus tnakay! Ikwer-penhan Akngeyel ngenh itethileyen ngkwenh-rnem-then warrkenh ngkwenh-rnem-then ingkerrenh-antey.”

32 Tyayl-areny artwamp ra Paul Silas-atherr atnwenhek warl ikwerenh-warl. Ikwer-penhan Paul Silas ratherr renh Akngey-kenh angka akalty-anthek warl-areny ingwer-rnem-then ingkerrenh-antey,

33 Tyayl-areny artwamp ra tywen renh-atherr anterel apernek, mwerriletyek. Ikwer-penhan Paul-atherrel renh baptise-emelek, ikwerenh-rnem-then warrkenh-rnem-then ingkerrenh-antey.

34 Ikwer-penhan tyayl-areny artwamp ra renh-atherr apmer ikwerenh-warl atnwenheynek, renh-atherr amern anthetyek. Tyayl-areny artwamp inkwerelhek ikwerenh-rnem-then ingkerrenh-antey Akngey tnakemel.

35 Kel ingwepenh-antey Atyetyart court-areny rernem iltyemwerney-rnem thwenek angkakert

angka tyayl-areny atyetyart ikwer-warl. “Artwa renh-atherr kel tyarlewetyek!”

³⁶ Tyayl-areny atyetyart ranem Paul renh ilek, “Atyetyart court-arenyel angka thwenek, mpwelenhant tyarlewetyek. Mpwelanth-anem arternp alpenherr-atherr aterirrey-angenh.”

³⁷ Paul-el angkakert-rnem thwenek, “Rernem aylenhant arrwekel court-emiley-angenh-antey. Aylant arlarl, Rome-areny arrpemar. Rernem aylenhant whip-el atwek akngerr-itwek, tyayl-warl akwernemel. Lyert-anem rernem arrker-nelheyel aylernanthenh anyelkel tyarlewetyek. Arrangk-w-kety alha! Rernemarrp apetyey tyayl-they aylernanthenh tyarlewetyek.”

³⁸ Ilyemwerney angkakert-rnem alpek angka court-areny-rnem iley-alpek. Atyetyart court-arenyel awek Paul Silas-atherr Rome-areny arpemar anenh, rernem aterirrek.

³⁹ Tyayl-warl alhemel rernem renh-atherr arternpilek, renh-atherr tyayl-they tyerrek. Ikwer-penhan rernem renh-atherr ilek, apmer ingwer-warl-anem alhetyek.

⁴⁰ Tyayl-they tyerrelhemel Paul Silas-atherr Lydia-kenh apmer-warl alhek. Jesus-arl apenteh akngerr apmer ikwerel anenh arrpemar. Ratherr ikwer-rnem Akngey-kenh angka ilek warl ikwer-itwek, renh-rnem rlterrkilemel. Ikwer-penhan ratherr kel alpekant-anem.

17

Paul Silas-atherr Thessalonica tawen-warl alheyel

¹ Rernem Amphipolis tawen-they Apollonia tawen-angkwarr arntarnpenhek Thessalonica tawen-warl apetyek. Tawen ikwerel Jew-rnemenh tyaty arrwekel artelhenh.

² Arlta Saturday-el Paul tyaty ikwer-warl alhek. Saturday arrpanenhel wik 3-ek-atwety, ra tyaty ikwer-warl alhenh Akngey-kenh angka arrwekeleny anayntiletyek, Jew-rnemek.

³ Ra renh-rnem akalty-anthek Akngeyelarl arrwekel alhelek Jesus renh ahern nhewarl thwenetyek. Jesus rey-antey Akngey-kenh impen, Christ-an. Jesus ra irrwampemel ilwetyek, Ra itethirremel akemirreyenh arrpemar. Jesus Christ rarl arrwekel ilwek rarl angkep arrpemar itethirremel akemirrek. Jesus ingantey ipmepenh itethirremel akemirrek Akngey-kenh pip arrwekeleny aynteyel-angkwarr-antey. Akngey-kenh angka alakenh aynteyel, arrwekelenyel Akngey-kenh angka ingkwernek-angkwarr.

⁴ Jew ingwer-rnemel Akngey-kenh angka tnakek, Paul-atherr Silas-atherr-angkwarr antelhek, artwa Greece-areny iylpareth-rnem Paul-atherr-angkwarr antelhek, arelh atyetyart-rnem-then.

⁵ Jew-rnem arlkarirrek Paul ikwer-atherrety. Rernem-anem artwa apmwernem akarrilek apmer-areny-rnem arwengkilek. Rernem-anem irrwernek, Jason-kenh apmer-warl alhek Paul Silas-atherr anterrkwetyek.

⁶ Ratherr Jason-kenh apmer-itwek aney-angenh. Alakenh-anyem rernem Jason renh anterrkwek, Jesus-arl apenteyel irrpety

ingwer-rnem-then. Rernem-anem Paul-atherr atnwenhek, artwa ampwernem-warl ayntarrp-ilemel-anem ilek. "Paul-then Silas-then ratherr, apmer arrpanenh-warl apetyek, apmwangkarr ilpertilityek. Ikwer-penhan ratherr nhenh-warl-anem apetyek.

⁷ Jason-el renh-atherr arntarnt-arek. Rernem anwenhanterr ilek, 'Jesus Atyetyart ilkwa aneyel.' Alakenh rernem Atyetyart anwekantherrenh Caesar-ek irrpelthirreyel."

⁸ Angka awek-penh, ingkerrenh anyentirrek, rernem ahelirrek-anem.

⁹ Artwa ampwernemel-anem Jason ilek, man ra anthenhey-alpetyek. Ikwer-penhan renh-rnem iletiek-anem tyarlewek.

Paul Silas-atherr Berea tawen-warl alheyel

¹⁰ Ingwa ikwerel-antey Jesus-arl apenteyel-rnemel Paul Silas-atherr Berea tawen-warl-anem thwenek. Berea ikwer-itwek ratherr Jew-rnem-kenh tyaty-warl alhek.

¹¹ Jew Thessalonica tawen-areny-rnem arlkarirrenh. Berea-areny-rnem iylpareth-rnem anenh. Rernem inkwerelhek innga Paul-kenh angkek. Arlta arrpanenhel Akngey-kenh pip arrwekeleny reytemilek, rernem aretyek Paul-el apek renh-rnem arraty-angkwarr akalty-anthetyek.

¹² Jew akngerrel Jesus renh tnakek, arelh atyetyart Greece-areny Jesus renh tnakek arrpemar Greece-areny artwernemel-then.

¹³ Jew Thessalonica-areny akngerrel awek-penh Paul-el tawen Berea-itwek Akngey-kenh

angka innga akalty-anthek, rernem Berea-warlanem alhek. Rernem irrwernek.

¹⁴ Alakenh-anyem Jesus-arl apenteyel akngerrrel Paul renh anamerl-antey thwenek ament kwaty alay-angkwarr arntarnpenhemel alpetyek ingwer-rnem-kety Silas Timothy-atherr apmer Berea-el-antey anenh.

¹⁵ Artwa akngerr ingwer-rnem rernem Paul-atherr-angkwarr ilkwatherr alhek rernem renh Athens tawen-warl artengewek. Rernem alpey-angenh-antey, Paul-el renh-rnem ilek Silas-atherr anamerl ikwer-warl apey-alpetyek.

Paul alheyel Athens tawen-warl

¹⁶ Paul Silas ratherr Athens-itwek mpwelhenh ingkart-arrpantey mpwarekarl akngerr, ranem ahelirremel arey-alhek.

¹⁷ Alakenh-anyem ra tyaty-itwek Jew akngerr-itwek angkerrenh Greece-areny-rnem-itwek, rernemarl Akngey innga arraty iterl-arenh. Arlta arrpanenhel apmer-areny-rnem-itwek angkerrenh, tawen ampep-itwek.

¹⁸ Artwa irrpety ingwer-rneman Epicurus ikwer kwertengerl anenh, artwa irrpety ingwer-rneman Zeno-kenh kwertengerl anenh. Paul-then artwa ingwer-rnem-then rernem angkerrenh, "Artwa arwengk ilenhelan irrtywerremel anwenhantherr ileyel. Ilekek ra anwenhantherr ilem?"

Irrpety ingwer-rneman alakenh angkek, "Ra ingwer-rnem-kenh Akngeyek angkeyel."

Rernem alakenh angkek. Paul-el renh-rnem Jesus-kenh angka akalty-anthek, "Jesus ipmepenh akemirrekarl."

¹⁹ Artwa rernem Paul renh akngek Areopagus Council-warl. Rernem renh ayerne, "Ntwa apek anwenhantherr ilem angka renh ntwarl akngerr akalty-antheyel?"

²⁰ Rernem ilkwerl-alhek, "Angka aleyantarl anwenhantherr awek." Rernem Paul renh ilek, "Lyertant anwantherr awek angka renh anwekantherr anayntila!"

²¹ Athens-areny-rnem akngerr arlta arrpanhenhel angkek awelherlenty-akngenh, angka ingweram-ingwer ikwer-penh angkerretyek.

²² Paul akemirrek Areopagus Council ikwer-rnem-warl, rap angkek, "Artwa Athens-areny-rnemay, atha areyel arrantherr altyerr akngerr-akert aneyel.

²³ Ayeng tawen-angkwarr alhenhel, athan arek altyerr-arrpantey ingwerek-ingwer arrekantherrenh. Anyent ingwerekant arrantherr ikwer akwerrp-antey aneyel. Akngey inngarrpantey arrantherr apentenh apalel, arrantherr iterremel altyerr renh-arrpantey, iltyelarl mpwarek gold-penh. Akngey innga ikwer-penh atha arrekantherr iletiek.

²⁴ Akngey anyent innga ra alker-then ahernthen arrpmernek, arwerl-rnem-then atnwenthrnem-then artwernem-then ingkerrenh-antey. Ranem ingkerrenhek Inkart aneyel. Akngey warl iltyel mpwarekarl-itwel nthakenh aneyangenh.

²⁵ Akngey anyent innga ingwerel renh nthakenh iley-angenh. Rant ingkerrenh itethilem renh-rnem amern-then anthem, ingkerrenh-antey.

²⁶ Artwa anyent-they ingwerek-ingwer arpmernek, ranem renh-rnem arlperrtyilek. Ra anyentel-anyentel apmer renh-rnem antheynek. Ra ikwer-rnem akalty apmer nthenh-ampenyel rernem aneyel, ilengerarl rernem ywerreyenh.

²⁷ Akngey ingkerrenhek anayntelhilek, rernem ikwer nthwetyek, renh iterl-aretyek. Akngey ra anwekantherr-itwek arrer aneyel.

²⁸ 'Ra anwenhantherr iteth atnyenem, rlterrk-ilem, arntarnt-arem.' Artwa anyentel ilek, 'Anwantherr alerikw ikwerenh ingkerrenh aneyel!'

²⁹ Anwantherr Akngey-kenh alerikw-rnem aneyel. Nthakenh iterrey-angenh Akngey anwekantherrenh gold-penh thilp-penh mpwarey-angenh, apwert-penh mpwarey-angenh.

³⁰ Awank-akerran alhenh ament-warltangkwek, Akngey iterl-arey-angenh. Akngeyel renh-rnem menty atwey-angenh arntarnt-arenh. Aley-anem ra ilkelheyel ingkerrenh ikwer-warlanem angkepirretyek.

³¹ Ra kel akalty arlta ikwerel-antey ra ingkerrenh-antey arraty innga akngakeyenh. Ra artwa anyent rlwanek, ingkerrenh-they akngakeyenh. Anwantherr akalty ra arraty innga anem, rarl artwa renh ipmepen akemelhilekarl."

³² Rernem awek-penh Akngeyel artwa anyent ipmepen akemelhilek, ingwer-rnem atherrek, ikwer irrpelthirremel. Ingwer-rnemel Paul

renh ilek, “Ingwer-ingeran anwantherr ngkweng awelhetyek arrpemarl.”

³³ Paul Areopagus Council-they alpekant-anem.

³⁴ Artwa irrpetyel angka ikwerenh renh tnakek, kel renh ingkern-they apentek, alhek ikwer-angkwarr. Artwa anyent itnan Dionysius Areopagus Council-areny anenh. Arelh anyentel itnan Damaris ingwerel-rnem-then Ingart renh tnakek-anem.

18

Paul alheyel tawen Corinth-warl

¹ Paul tawen Athens-they anperl-alhek, tawen Corinth-warl alhek.

² Corinth ikwer-itwek ra Jew anyent arek itnan ikwerenh. Aquila apmer Pontus-areny. Anew ikwerenh Priscilla. Ratherr apmer Italy-el anenh, Rome tawen-itwek. Caesar Claudius-el. Jew-rnem ingkerrenh Rome-they irrentek. Ratherr Corinth-warl apetyek. Paul-anem ikwer-atherr-warl alhek.

³ Paul-el awek Aquila ra kalikw arnwarney-angker arrpemarl, ikwer-apeny. Paul anewart ikwer-atherr-itwek anenh. Arlta arrpanenhel Paul-atherr Aquila-atherr ratherr kalikw arnwarnenh.

⁴ Arlta Saturday ikwerel ra tyaty-warl alhek Jew-rnem-then Greece-areny-rnem-then angkerretyek, rernem arraty-angkwarr apenterl-ayntetyek.

⁵ Silas Timothy-atherr ratherr apmer Macedonia-they apetyek. Ikwer-penhan Paul

ran ipmelhek-anem, kalikw arnwarney-angenh-anem anenh. Arlta arrpanenhel Jew-rnem akalty-anthenh. Ra renh-rnem ilek, “Jesus renhey-antey Akngeyel awank-akerr alhelek ahern nhenh-warl thwenetyek, ingkerrenh itethiletyek.”

⁶ Jew-rnem Paul ikwer ahelirremel irrpelthirrenh. Paul-el ahern tertangkwelhilek arnkwa ikwerenh-they, renh-rnem ilek, “Akngeyel arrenhantherr irrenteyenh. Arrantherr atyeng awelhey-angenh-kety, atha arrenhantherr iwerl-alhemarl. Akngeyel arrenhantherr atweyenh, arrantherr ayenh aytarrp-iley-angenh anetyek? Lyert ayeng Jew-weny-rnem-warl alhetyek, atha ikwer-rnemekant-anem angka mwerr-angker iletiek.”

⁷ Paul-anem alhek apmer ingwer-warl, Titius Justus-kenh-warl. Titius Justus-kenh apmer Jew-kenh tyaty akely-ampeny-itwek artelhekarl. Titius Justus Akngey ikwer inkwerelhenh.

⁸ Artwa Crispus ra Jew-rnem-kenh tyaty-areny Atyetyart anenh, ikwerenh-rnem-then warrkenh ikwerenh-rnem-then, rernem Inkart renh tnakenh. Corinth-areny-rnem akngerr rernem Paul renh awek-penh rernem renh tnakek-anem. Ikwer-penhan rernem baptise inek, ingkerrenhel.

⁹ Ingwa ingwerelan Paul-el altyerr arek, ranem awek Inkartelarl renh ilek. “Paul-ay, aterirrey-angenh! Artewentyel renh-rnem akalty-antha! Akater nyerrirremel aney-angenh. Ayeng ngkweng-itwel aneyel.

¹⁰ Ingwer-rnemel ngenh nthakenh atwey-angenh aneyel. Akngerr ingwer-rneman atyenh-rnem nhel aneyel-antey, ngenh arntarnt-aretyek apmwernem-kety.”

¹¹ Paul alkent 18-ek-atwety anenh, Corinth ikwer-itwek. Ra akngerr ingwer-rneman akalty-anthenh.

¹² Gallio atyetyart Achaia-areny anenh. Jew-rnemel Paul renh anterrkwek, court-warlanem akngemel. Rernem renh ayntarrp-ilenty-arrpantey ilek,

¹³ “Ra angka Akngey-kenh-arrpantey anwenhantherr akalty-antheyel. Ra apmwel-areth akalty-antheyel anwantherr ikwerenh-angkwarr apentetyek.”

¹⁴ Paul angketyek irrek, Gallio retangkwek Jew-rnem ilek, “Jew-rnemay! Artwa nhel apek apmwel-areth akalty-antheyel.

¹⁵ Ayeng nthakenh atyetyart aney-angenh angka arrekantherrenh-angkwarran. Ayengan arlarl. Nthakenh ayeng arrkngert angkey-angenh. Arrantherrant arratyilerretyek.”

¹⁶ Kel ranem Jew-rnem court-they tyarlewek.

¹⁷ Court-they tyerrelhemel, rernem-anem artwa Sosthenes aketh-ampenyek atwek. Sosthenes ra atyetyart Jew-rnem-kenh tyaty akely-itwek anenh. Gallio ra menty renh arek.

Paul Antioch tawen-warl alpeyel

¹⁸ Paul ra aleth-antey Jesus-arl apenteyel-rnem-itwek anenh, apmer Corinth-itwek. Ranem alpek. Priscilla Aquilla alpek arrpemarlarl apmer Syria-warlarl. Cenchreae tawen-itwek Paul ra

alta akelhek akapwert ikwer-they, Akngey ikwer inkwerelhetyek, rarl renh mwerr arntarnt-arenh.

¹⁹ Ikwer-penhan rernem Ephesus tawen-warl apetyek. Paul-el Aquila-then Priscilla-then iwerl-alhek, ra anyent-anem alhek Jew-kenh tyaty akely-warl, rernem angkerrenh-warl.

²⁰ Jew-rnemel renh ayernek, ra ikwer-rnem-itwek arleng-alenty anetyek. Ra ilkelhey-angenh ikwer-rnem-itwel anakerr. Ra arrkngert angkek.

²¹ Alhey-alentyel ra renh-rnem alhelek, "Ayeng arrekantherr-warl ngwelemant apey-alpeyenh, Akngeyarl ilkelhem-angkwarr." Ra rtnwewarl-anem nganerl-alhek.

²² Caesarea tawen-warl irremel ra rtnwethey atwarremel Jerusalem-warl-anem anperirrek, tyaty-areny-rnem-itwek anetyek. Ikwer-penhan ra Antioch tawen-warl-anem anperirrek.

²³ Antioch-itwek aleth anenh-penh ra Galatia-warl Phrygia-warl-anem alhek kwertengerl-rnem rlterr-kilek.

Apollos-el apmer Ephesus-areny-rnem-then apmer Achaia-areny-rnem-then akalty-antheyel

²⁴ Artwa Jew itnan Apollos ra Alexandria tawen-areny anenh. Apollos Ephesus tawen-warl apetyek.

²⁵ Ra Akngey-kenh angka arrwekelenyek akalty anenh. Jesus-kenh angka iterl-arenh, angath-antey. Ranem aleny mwerr anenh, akalty-anthey-angker, ingwer-rnem akalty-anthek. Rant iterl-arenh angath-antey John

Baptise-emeley-angker-penhant, angka lyertyeny iterl-arey-angenh-antey akertek-atwety.

²⁶ Artwa ranem tyaty akely-itwek arnkatyey ingwer-rnem akalty-anthek. Priscilla Aquilla-atherr ratherr awek-penh ratherr renh apmer-warl-anem atnwenhek. Ratherr-anem renh artewentyel akalty-anthek, ratherr-anem ikwer Akngey-kenh angka anayntilek, akertek-atwety.

²⁷⁻²⁸ Apollos ra iterrek anper-antey alhetyek. Jesus-arl apenteyel-rnem pip ikwer ingkwernek. Pip ikwerel rernem Achaia-areny-rnem Apollos-ek ra inkwerelhemel anetyek. Apollos-then Jew-rnem-then ilerrek Akngey-rnem-kenh angkethey. Rantey arrpemarl Akngey-kenh angka arrwekeleny anayntilek, Jesus ra Christ inngarl aneyel. Inggart-areny Akngey-kenh angkek inkwerelhek, arnkaty-anem. Akngeyel kelarl renh-rnem rlterrkilek, rernem renh tnaketyek, arraty-angkwarr apenterl-ayntetyek.

19

Paul alheyel Ephesus-warl

¹ Apollos Corinth tawen-itwek anenharl-antey, Paul Ephesus tawen-warl apetyek, Jesus-arl apenteyel ingwer-rnem anenh-warl.

² Ranem renh-rnem ayernek, "Itnweng Rl-wart arrekantherr-warl apetyek, arrantherr Jesus renh tnakenharl-warl?"

"Arrangkwaw!" rernem ikwer ilelhek. "Itnweng Rlwartan angwenharl?"

³ Paul-el renh-rnem ayernek arrpemarl, "Angwenhel arrenhantherr baptise-emelek?"

Rernem ikwer ilelhek, “John-kenh kwertengerl-rnemel. Anwernantherr akaltyirrek John-angkwarrant.”

⁴ Paul-el renh-rnem ilek, “John-el anwenhantherr akalty-anthenh, Akngey-warl angkepirretyek. Rantey arrpemarl renh-rnem ilek, ‘Artwa ran ingkern-they apetyem, arrantherr renh tnaketyek.’ ”

⁵⁻⁷ Paul-el renh-rnem ilekarl-penh, Paul-el 12 renh-rnem itna Jesus-angkwarr baptise-emelek. Ikwer-penhan iltva ikwer-rnem-kenh arrernek Itnweng Rlwart ikwer-rnem-warl antelhek. Rernem angka ingwerek-ingwer angkerrenh. Ikwer-penhan rernem Akngey-kenh angka anayntilek ingwer-rnemek.

⁸ Paul al kent irrpetyek-atwety Jew-rnem-then angkerrenh, tawen Ephesus-itwek. Ra arnkatyel renh-rnem ilek, “Jesus Inkart ingkerrenhek aneyel.”

⁹ Jew ingwer-rneman ilkelhey-angenhhan Jesus-kenh angkek awalheyek. Irrpelthirrenh ingwer-rnem-itwek. Alakenh Paul Jew-rnem-kety amen-tirrek. Jesus-kenh kwertengerl-rnem alhek Tyrannus-kenh warl ilkwewarl. Arlta arrpanenhel ra akngerr ingwer-rnem akaltyiletyek.

¹⁰ Ra alakenh aherrety atherrel akalty-anthenh. Kel Asia-areny ingkerrenhel-anem Akngey-kenh angka awek, Jew-el-rnem-then apmer Greece-arenyel-rnem-then.

Artwa Sceva-kenh alerikw-rneman

¹¹ Akngeyel-anem Paul renh rlterr-kilek, ilek-ilek mpwaretyek.

¹² Arntetyel Paul-kenh arnkwa arnep-arrenty, ra kel mwerrirremarl. Artwa ra apek arrenty-akertarl aneyel, itnweng ikwer-they ywerremarl.

¹³ Jew irrpety apmer ingwer-rnem-warl alhenh, arrenty-akert-rnem mwerril-ayntetyek. Jew-rnem arrkernelhek arrenty-akert-rnem mwerriletyek Jesus-kenh itna itnewemel. Rernem itnweng apmwernem alakenh ilek, Jesus ikw-erenh itnangkware. Paul-el ingwer-rnem akalty-anthek angka Jesus-akert. "Itna ikw-erenhel-antey atha arrenhantherr ilem tyerrelhetyek."

¹⁴ Jew-rnem-kenh atyetyart tyaty-areny anyent anenh, itnan ikw-erenh Sceva. Artwa 7 alerikw ikw-erenh-rnem. Artwa 7-pel renh-rnem irrkaty-angkwarr arrkernelhek, Jesus-kenh itnel itnweng apmwernem irrentetyek rltarrk ikw-erenh-akertel.

¹⁵ Arrenty-akert angkenh, "Athan Jesus-then Paul-then iterl-areyellarl. Angwenharl arrantherr?"

¹⁶ Ikwer-penhan arrenty-akert-rnemel artwa 7-pel renh-rnem atwek. Artwa 7-pel warl-they tyerrelhemel aterel anterrek, arrkngwentemel anterrek, arnkweyeny.

¹⁷ Ephesus-areny-rnemel awek-penh Jew-rnem-then Greece-areny-rnem-then rernem-anem aterirrek ikwer-rnem-kety. Rernem Inkart Jesus renh tnakek.

¹⁸ Ikwer-penhan Jesus-arl apenteyel ingwer-rnem ilelhek rernemarl apmwangkwarr apenteh.

¹⁹ Jesus-arl apenteyel ingwer-rnem ilelhek, "Anwernantherr arwengeltharl mpwarenh."

Rernem pip arwengelth-akert akngetyek, rernem-anem ingkerrenhel-anem rwel arrtyek. Akngerr ingwer-rnemel arek. Pip arrwekel rernem man akngerrelarl payemelek.

²⁰ Jesus-arl apenteyel ingwerel-rnem-anem akngerr ingwer-rnem akalty-anthek, Akngeykenh rlterrk-akertel angka arlpimp-anem ilek, angka ingwerek-ingwer-warl.

Artwa Demetrius thilp mpwarey-angker

²¹ Ikwer-penh Paul iterrek Jerusalem-warl alhetyek apmer Macedonia-angkwarr Achaia-angkwarr. Ranem angkek, "Jerusalem-they atha apmer aretyek, Rome tawen."

²² Paul-el Timothy-then Erastus-then Macedonia-warl arrwekel thwenek, ra apmer Asia-itwek anenh-kety.

²³ Ephesus tawen-itwek rernem ilterrek, atwerretyek irrek, Jesus-kenh angkethey.

²⁴ Artwa thilp mpwarey-angker tawen ikwer-itwek anenh, itnan ikwerenh Demetrius. Ra tyaty akely thilp-penh mpwarenh. Artemis-kenh tyaty-apeny altyerr-arrpantey-kenh, rernem iylpangk-ayntetyek, ikwer inkwerelhemel, kwenirremel, alkenh-arrpantey Ra tharlemilek man akngerrek, artwa ingwerel-rnem-then.

²⁵ Demetrius ranem artwernem anyentilemel ilek, "Artwernemay, arrantherr akalty anwantherr man ilkwa ineyel warl renh-rnem tharlemilenty.

²⁶ Arrantherr apek awek Paul-elarl ingwer-rnem ilpertilek apmer Asia-itwek, nhel Ephesus tawen-itwek-then. Ra renh-rnem ilek, 'Artwa

ra altyerr mpwaretyek arrangkw. Altyerr-arrpantey iltyelarl mpwarekarl arrangwarl, ingwenyarl, arrangwarl.'

²⁷ Paul-elarl akalty-antheyel-rnem rernem anwekantherr irrpeltherreyenh apmwangkwar. Aray, lyert-anem apmer Asia-areny-rnem apmer arrpanenh-itwek rernem Artemis ikwer inkw-erelheyel."

Paul-el renh-rnem ilek, "Artemis Akngey-wenyarl ingwenyarl, arrangwarl."

²⁸ Awekarl-penhan artwa ingwer-rnem ahelirrek. Rernem arlkek, "Artemis Ephesus-areny-rnem-kenh Akngey innga aneyenh."

²⁹ Ingkerrenh-anem tawen ikwerel-anem ilterrek. Gaius Aristarchus-atherr anterrkwek aketh-itwek anyentilek. Gaius-atherr Macedonia-areny-atherr Paul-angkwarr ilkwatherr alhek apmer-they.

³⁰ Paul-anem ikelhek ikwer-rnem-warl alhetyek ikwer-rnem-warl angketyek. Kwertengerl-rnem ikwer arrkngert angkek,

³¹ Apmer-areny artwamp irrpety Paul-kenh-anem anenh. Rernem ikwer-warl angka thwenek ikwer arrkngert angketyek, akngerrkety, atwekerr.

³² Ephesus-areny-rnem akarrirrek, angkerretyek. Rernem-anem apatemel arlkek.

³³ Jew-rnemel Alexander arrwekel-warl rnkernek, arrwekel-ampeny-itwek rtnetyek akngerr-itwek. Ingwer-rnem aleth-antey arlkenh, "Artemis Ephesus-areny-kenh altyerr inngan." Alexander ikwer-rnem angkek akaterirretyek, ra ikwer-rnem-warl angketyek.

34 Ingwer-rnemel renh alhengk-arek ra Jew anenharl. Rernem aleth-antey ikwer arlkenh, "Artemis Ephesus-areny-kenh altyerr!"

35 Ikwer-penhan tawen-areny atyetyartel-anem akngerr akatelhilek, "Artwa Ephesus-areny-rnemay! Anantherr ingkerrenh akalty Artemis-kenh tyaty arraty arntarnt-areyel. Anantherr apwert aknganenty ikwerenh alkertheyarl aytnek arraty arntarnt-aretyek. Paul arlkarirrek, rernem altyerr anyent ikwerenh apentetyek, rernemarl arnwarnek.

36 Nhenh innga aneyel, arrantherr arternp awelhetyek, arrkngert angkey-angenh.

37 Arrantherr artwa yanh-rnem apalel anter-rkwemel atnwenhey-alhek nhenh-warl. Rernem arrangkwarl, Rernem arlarl ampwal ilenhek, Artemis ikwer irrpelthirrey-angenharl. Rernem man anyelkel iney-angenh tyaty ilenh-rnemthey.

38 Demetrius thilp mpwarey-angker artwa rernem renh-rnem ayntarrp-iletiek. Artwa court-areny kel aneyel, rernem ikwer ilelhetyek. Rernem renh-rnem court-warl atnwenhey-alhemer, court-itwek ayntarrp-ilemel iletiek.

39 Angka ingwer arrantherr iterl-areyel kel arrantherr arratyilerretyek.

40 Roman kapmentel ikwer-penh aweyenh anwantherr angkewarl irreyenh anwantherr apalel arlkek-penh."

41 Alakenh angkek-penh ra renh-rnem ilek, "Kel arrantherr arlperrtyirremel alpenherr-arey!"

20

Paul apmer Macedonia-warl alheyel, apmer Greece-warl alheyel

¹ Ephesus-areny-rnem arternp anenh. Paul-el kwertengerl ikwerenh-rnem yangkelhek. Ranem ikwer-rnem mwerr ilek, renh-rnem rlterrkiletyek. Ikwer-penhan ra anperl-alhek Macedonia-warl.

² Ranem Macedonia-warl artarnpenhek, Jesus-arl apenteyel-rnem rlterrkiletyek. Ikwer-penh ra apmer Greece-warl alhek.

³ Ranem alkent irrpetyel ikwer-itwek anenh. Paul ra apmer Syria-warl alhetyek-anem irrek, rap awek Jew-rnemarl ikwer angkerrenh renh ipmek atwetyek. Alakenhaym-they ra angkepantey Macedonia-warl alpek.

⁴ Artwa ingwer-rnem Paul-angkwarr alhek, Sopater, Pyrrhus-kenh alerikw, Berea tawen-areny anenh. Aristarchus, Secundus Thessalonica-areny Gaius, Derbe tawen-areny Timothy. Apmer Asia-areny-atherr Tychicus, Trophimus.

⁵ Artwa nhenh-rnem arrwekel alhek Troas tawen-warl. Troas ikwerel rernem anwekatherr mpwelhenh.

⁶ Paul-akerr anwantherr Philippi tawen-warl alhek. Anantherr tyenkerr amern ilperr- ilperr thwet-weny renh arlkwek, Akngey-kenh-angkwarr. Arlta 5-penh, kel anwantherr apmer Troas ikwerel aney-alhek-anem, arlta 7-ek-atwety.

Eutychus ipmepenh akemirreyel apmer Troas-itwek

⁷ Saturday ingwel anwantherr anyentirrek amern tyenkerr arlkwetyek. Paul-el-anem renh-rnem akalty-anthek, ingwa ampepek-atwety akalty-anthek, ingwepenh ra alhey-akenh.

⁸ Warl irrwerl-ampenyel anwantherr anyentirrek lyenenty impen-rnem-itwek.

⁹ Eutychus ra iwerr tyetel anenh, room irrwerl-ampenyel. Ankwel-anem renh atwek. Paul-el aleth-antey angka ilenh ra ankwayntenh. Ra irrwerl-they aytnerl-arrernek, ilwemel-anem. Arek-anem ingwerel-rnem ipmanem.

¹⁰ Paul ranem artwa renh atnarnpemel anter-
rkwek. Ra renh-rnem ilek, "Aterirrey-angenh anenherr-arey, ran iteth aneyel!"

¹¹ Paul ranem warl ikwerel aylpek. Amern-anem arlkwemel-anem. Paul-el renh-rnem akalty-anthek ingwepenhek-atwety. Ikwerpenhan ra alhek-anem.

¹² Jesus-arl apenteyel-rnem artwa anthety renh apmer ikwerenh-warl renh akngeynek. Rernem ingkerrenh inkwerelhek.

Paul Miletus tawen-warl alheyel

¹³ Rtnwewarl nganerl-alhemel anwantherr-tangkwek Paul renh iwerl-alhek, Assos tawen-warl artarnpenhek, Paul ra ilkelhek Assos tawen-warl ament alhetyek ingketyel.

¹⁴ Ingwer-ingeran, anwantherr renh rlwa-tek Assos tawen-itwek kel anwantherr renh rtnwewarl-anem tywenerl-alhek. Ingkerrenh-antey-anem renh Mitylene-warl-anem artarnpenhek.

¹⁵ Arlta ingwerelan anwantherr kel apmer Chios-itwek arey-alhek. Ikwer-penhan arlta ingwerelan apmer Samos-el-anem. Ikwer-penhan arlta ingwerel-anem Miletus tawen-el aney-alhek.

¹⁶ Paul ra arralty-anek Jerusalem-warl anper-alhetyek Pentecost tyenkerr rernem arlkwe-tyek. Alakenh-anyem ra ilkelhek ahern Asia-angkwarr anper-antey alhetyek, apmer Ephesus-itwek aney-angenh.

Paul ilelhey ingkart Ephesus-areny-rnemek

¹⁷ Paul-el-anem Miletus-they angka thwenek, Ephesus tyaty-areny-rnem-warl arntarnt-arey-angker-rnem-warl-then, rernem ikwer-warl apetyetyek.

¹⁸ Rernem kel ikwer-warl apetyek, ra renh-rnem ilek, "Arrantherr kel akalty, ayengarl anen-hel ahern Asia ikwerel, atha arraty-angkwarr innga apentenh.

¹⁹ Ayeng tnakelhey-angenh atha arrenhantherr Inkart-kenh angka akalty-anthek. Jew-rnemel ayenh ayntarrp-ilek-kety, ayeng amperrngirrek-anem, artnemel-anem. Ayeng ipmelhey-angenh intem-antey warrkirrenh.

²⁰ Atha Akngey-kenh angka anyelkel atnyeney-angenh arrekantherrety. Atha arrenhantherr akalty-anthek akertek-atwety, arraty innga akethek, akngerrel aretyek, apmer arrekantherrenh-itwek.

²¹ Atha Jew-rnemek Greek-rnemek angka arraty innga ilek, ingkerrenh Akngey-warl

angkepirretyek, Inkart anwekantherrenh Jesus tnaketyek.

²² Akngey-kenh Itnwengel ayenh thwenek Jerusalem-warl alhetyek. Ayeng alhenty nthakenh irretyek ayeng apmer ikwerel?

²³ Akngey-kenh Itnwengel ayenh ilek, ayengarl tawen arrpanenhel alhek, ingwer-rnem atyeng irrpelthirreyel-rnemel ayenh tyayl-warl akwerneiyenh renem, ayenh atweiyenh.

²⁴ Ayeng ikwer-rnem-kety aterirrey-angenh, ayeng ikwer-rnem-warl alhem. Warrk atiyenh atha arraty ywerrelhiletiek. Jesus-el ayenh thwenek Akngey-kenh angka arraty akalty-anthetyek, anayntiletiek, Akngeyelarl anwenhantherr mwerr arntarnt-areyel.

²⁵ Atha arrenhantherr akalty-anthek, Jesus Inkart anyent rarl anwekantherrenh aneyel. Ayengarl intem-antey-anem alpem, ingweringeran arrantherr ayenh arnarey-angenh-anem.

²⁶⁻²⁷ Ayeng arrekanterr ilelhem, arrantherr apmwangkarr apententy, ngkwenh-angkwarrarl, ayengan arlarl. Atha arrenhantherr Akngey-kenh angka ingkerrenh-antey arraty akalty-anthekarl.

²⁸ Arrantherr-anem mwantyel arntarnt-arellhetyek. Arrantherr-anem tyaty-areny-rnem arraty-angkwarr arntarnt-aretyek, Itnweng Rlwartel arrernek-angkwarr-antey, renh-rnem arntarnt-aretyek, Akngey-kenh tyaty-areny-rnem aleth-antey arntarnt-aray! Akngeyel alerikw ikwerenh thwenek katy ilwetyek ingkerrenhek, renh-rnem anyentelhiletiek.

²⁹ Ayeng akalty ayengarl alpemarl-kety artwa apmwernem arrekanterr-warl apetyeyenh rernem tyaty-areny-rnem ilpertilhileyenh, arengk artnwerel yep-yep-rnem tnhwemel ilpertilhilem-apeny.

³⁰ Arntarnt-arey-angker irrpety ingwer-rnem apmwangkarr akalty-anthey-angker rernem arrenhantherr apal-apal akalty-antheyenh. Rernem ilkelheyel arrantherr ikwer-rnemant awelhetyek.

³¹ Aray, atha arrenhantherr akalty-anthek aherrety irrpetyek-atwety, artewentyel amperrn-girrek artnemel Arrantherr mwentyel arntarnt-arelhenherr-arey!

³² Lyert ayeng Akngey-warl angkem, arrenhantherr arntarnt-aretyek, ra arrekanterr inkwerelhetyek, ranem arrenhantherr rliter-kiletyek angka ikwerenh-angkwarr. Ikwerpenhan arrantherr-anem Akngey-kenh apmerwarl alpeyenh, mwerr ingwer-rnem-then.

³³ Ayeng manek arnkwek iterrey-angenh.

³⁴ Mwerr arrantherr akalty innganem ayengan ampwal ingkerrenhek warrkirrey-angker, amern-rnem-then arnkwernem-then mpwarey-angker. Akngerr ingwer-rnem atha alakenhey wantek.

³⁵ Arrantherr ayenh apentetyek. Alakenh atha arrenhantherr akalty-anthek, Ingkart-areny ingwer-rnem-anemarl arntarnt-aretyek irrkaty-angkwarrarl. Ingkart Jesus-el akalty-anthek, 'Ampwal ayerrpiley-angenh ingwer-rnem alhewer anthetyek, arrantherrap irrkngerneyarl

intem-antey aneman.' Alakenh ikwerrenh-angkwarran."

³⁶ Ikwer-penhan, Paul Inkart-areny ingwer-rnem-rnem ampwethel alernelhemel, Akngey-warl angkek.

³⁷ Rernem ingkerrenh amperrngirrek ikwer, rernem renh atnyenek, arrwantyemel.

³⁸ Rernem amperrngirrek, rarl intem-antey ikwer-rnem-kety alpeyenhek. Ikwer-penhan rernem ikwer-angkwarr anperl-alhek rtnwewarl-anem.

21

Paul Jerusalem-warl alheyel

¹ Renh-rnem iwerl-alhek, anwantherr rtnwewarl nganerl-alhek apmer Cos-warl artarnpenhemel. Ikwer-theyan arlta ingwerel apmer Rhodes-warl anper-alhek. Ikwer-theyan anwantherr Patara tawen-warl alhek.

² Patara tawen ikwer-itwek rtnwa ingwer arey-alhek Phoenicia-warl alhetyek irrenharl. Anantherr rtnwa ikwer-warl nganek, apmer ikwer-warl-anem alhek.

³ Apmer Cyprus renh arey-alhek anwantherr alhek apmer Syria-warl. Anantherr tawen Tyre-itwek aney-alhek. Tawen ikwer-warl rtnwa apetyek, ampwal akngerr-akert.

⁴ Kwertengerl tawen-areny anwantherr arey-alhek. Akngey-kenh Itnwengel renh-rnem ilek, Paul renh iletyek, Jerusalem-warl alhey-angenh anetyek. Alakenh-anyem rernem Paul renh iley-ayntek. Anwantherr ikwer-rnem-itwek aney-alhek, arlta 7-ek-atwety.

5 Ikwer-penh anwantherr anperl-alhek arrpemar. Kwertengerl rernem-anem anwekantherr-angkwarr rtnwewarl apetyek anew ikwer-rnem-kenh-then ampernem-then. Anwantherr ingkerrenh-antey ampwethel alernelhemel Akngey ayernekwaty impalth ikwer-itwek.

6 Ikwer-penhan anwantherr renh-rnem iwerl-alhek rtnwel nganerl-alhem. Kel rernem angkep alpek apmer-warl.

7 Tyre tawen-they anwantherr kel anperl-alhek apmer Ptolemais ikwer-warl. Anwantherr arlta anyentel ikwer-rnem-itwek aney-alhek.

8 Arlta ingwerel anwantherr Caesarea tawen ikwer-warl-anem anperl-alhek. Artwa Philip artwa angka mwerr-angker akalty-anthey-angker tawen Caesarea-itwek anenh-warl. Tyaty-areny-rnemel renh rlwanek arrwekel artwa 6 ingwer-then, rernem amernel renh-rnem wantetyek. Anwantherr ikwer-itwek anenh.

9 Philip ikwerrenh aleyak-rnem 4-pel anenh. Alerikw rernem Akngey-kenh angka akaltyel ilenh.

10 Anantherr kel Caesarea ikwer-itwek anek, arlta irrpty-inger. Akngey-kenh angkakert-rnem apmer Judea-they apetyek. Angkakert ikwerrenh itnan Agabus.

11 Agabus ra Paul-kenh pilt lhelhek, ra akwarleny atherr arertnelhek, arlaw atherr arertnelhek. Ranem anwenhantherr ilek, "Akngey-kenh Itnwengel ilek, artwa Jerusalem-arenyel-rnem

piltek-artwey renh arertnemel artwa ingwer-rnem anthetyek.”

¹² Renh awekarl, anwantherr Paul-ek ar-kngert angkek Jerusalem-warl alhey-angenh anetyek. Apmer-areny-rnem-then ikwer ar-kngert angkek.

¹³ Paul-el anwenhanterr ilek, “Arrantherr artney-angenh anenherr-arey.” Ayeng ilwe-tyekan atyeng arrer arrpemarl.

¹⁴ Anwernanterr ywarn-antey Paul ikwer ar-kernelhek, renh anterrkwetyek Jerusalem-warl alhekerr. Kel anwantherr renh tyarlewek, “Kel alha, Ingkartel ngenh ilek-angkwarr.”

¹⁵ Ikwer-penhan anwantherr arnkwarnem anwekantherrenh ataperrelek Jerusalem-warl-anem alhey-alenty.

¹⁶ Kwertengerl irrpety anwekantherr-angkwarr alhek arrpemarl Jerusalem-warl, rernem Mnason-kenh warl-warl atnwenhek anwantherr ikwer-itwek anetyek. Mnason ra Cyprus-itwek arrwekel-antey Jesus renh tnakek.

Paul alheyel, ra James renh aretyek

¹⁷ Anwenhanterr arnaremél, ingkart Jerusalem-areny-rnem anwekantherr inkwerelhek.

¹⁸ Arlta ingwerelan Paul-akerr anwantherr James-anem aretyek alhek. Tyaty-areny-rnem arntarnt-arey-angker ingwer-rnem-then James-itwek anenharl.

¹⁹ Paul-el ilek ikwer-rnem Akngey-kenh angka mwerr-angker akalty-anthenh Akngeyel-anem Jew-weny-rnem Jesus-warl atnwenhetyek ikwerenh-angkwarr.

²⁰ Angka awemel, James-kenh-rnemel Akngey tnakek. Rernem-anem Paul ilek, "Jerusalem-itwek Jew-rnemel Jesus renh tnakeyel-anem. Rernem Moses-kenh angkek awelheyel-antey.

²¹ Rernem awek ingwerel apmer arrpanenhel ilek, Jew-rnemelarl Moses-kenh angka ipmek. Rernem awey ikwer-rnem-kenh artwa mpwarey-angenh-antey.

²² Rernem awenty, nthakenh apmer nhenh-itwek irreyenhan? Nga apetyentyel ntwarl Moses-kenh angka ilpertilek-penh. Nthakenh-anem nga irremman? Rernem apek ngenh atweyenh.

²³ Nga anwekantherr awelheyek. Artwa 4-pel nherneman anwekantherr-itwek aneyel, rernem Akngey alhelek, ngkwarl antywey-angenh anetyek, altethen akelhemel.

²⁴ Nga artwa nhernem-angkwarr tyaty ilkwe-warl alha, Ikwer-penhan arrantherr atyetyart tyaty-areny-warl ilelhey-alhemel, Akngey-anem tyenkerr anthenherr-arey. Artwa alta akelhentyel nga Moses-kenh angka apenteyel-antey ipmey-angenh-antey.

²⁵ Jew-weny-rnem ngenharl akalty-anthek-rnemel rernem Jesus renh tnakeyel. Anantherr kel pip ikwer-rnem-warl thwenek, rernem Akngey-kenh angka arraty-angkwarr apenterlayntetyek. Nthakenh rernem amern-then akerthen arlkwey-angenh akalty-anthenh-anthenh irrtwyerrey-angker-rnem-kenh. Rernem arrknga antywey-angenh aker arrkngakert antywey-angenh anetyek, rernem ingwer-kenh anew ikngwey-angenh anetyek."

²⁶ Arlta ingwerelan artwa 4-pel ikwer-rnem-angkwarr Akngey-kenh warl ilkwewarl alhek lhewelhetyek, Moses-kenh-angkwarr. Rantey arrpemarl alhek atyetyart tyaty-areny inetyek, rernem Akngey tyenkerr anthetyek. Rernem alhek atyetyart tyaty-areny, iletyek ilengerek-atwety rernem tyenkerr Akngey anthetyek.

Rernem Paul renh anterrkweyel

²⁷ Arlta 6-penh, Jew Asia-areny irrpety rernem Paul tyaty ilkwitwek arek. Rernem Paul renh anterrkwek. Akngerr ingwer-rnem Paul-they ahelirrek.

²⁸ “Artwa Israel-kenh-rnemay! Artwa nhenhey ra, apmer arrpanenh-warl Moses-kenh angka apmwangkwarr ilerl-apeyel, apmwangkwarr ileyel warl nhenhek Paul-el Jew-weny-rnem atnwenhek Jew-kenh tyaty ilkwewarl, nthakenh alhey-angenh-warl.”

²⁹ Rernem Trophimus arek, Paul-angkwarr anerl-alhenh, Paul-el tyaty ilkwa amek-amek-warl atnwenhenty-arrpantey rernem aytarrpilek. Trophimus ra Ephesus tawen-areny anenh.

³⁰ Tawen-areny akngerr ahelirrek. Rernemap Jew-rnem-kenh tyaty ilkwewarl anterrekan. Rernem apatemel arkalhelirrenh. Paul-anem rernem anterrkwek, tyaty ilkwethey aketh-warlanem iytarr-akngek. Kel keyt-anem martek.

³¹ Akngerr rernem renh ipmek atwetyek-arrpantey iytarr-akngek. Ingwerel Rome-areny ahelengkw atyetyart renh ilek, “Jerusalem-areny-rnem ahel atwerreyel!”

³² Ahelengkw-rnemek yangkelhek, ra renh-nrem artweriletyek irlkenty-akert. Ahelengkw-rnem rernem arnarek apetyenharl, rernem Paul renh atwey-angenh-anem, menty arek.

³³ Atyetyartel ahelengkw-rnem irrpety thwenek, rernem Paul renh anterrkwek, rernem renh tyeyn atherrel arertnetyek. Ranem renh-rnem ayernek, “Artwa angwenharlap ran nhenhey? Apmwel-areth apek mpwarek? Nthakenharl ran irrek wenh? İlek-they arrantherr atwetyek renh?”

³⁴ Artwamp ranem renh-rnem ywarn-antey awelhek, akngerr rernem ingkerrenh artewentyel arlkalhelirrekarl. Alakenh-anyem ra ahelengkw ikwerrenh-rnem ilantheek, rernem Paul ahelengkw-rnem-kenh tyayl-warl renh akngeynetyek.

³⁵ Rernem renh irrwerlap-aylpwer-akngkek tyayl-warl, ingwerel-rnem renh atwekerr.

³⁶ Akngerr ingwer-rneman arlkerl-apenh, “Renh ipmek atwenherr-arey!”

Paul ilelheyel ikwer-rnem

³⁷ Rernem Paul renh ahelengkw-kenh apmer-warl akngeynek, Paul-el ahelengkw atyetyart renh ayernek, “Mwerr ayeng ngkweng-warl angkem?” Atyetyartel renh ywemek. Rap tyernek, “Angka Greek ngan angkeyel.

³⁸ Atha ngenh iterl-areyel, ngan Egypt-areny, ntwarl apmwerrel ingkerrenh irrwernek, aha pweytilek. Nga yerlirrek irlkenty-akert artwa 4,000 ahern arlpaw-warl, ahel atwerretyek.”

³⁹ Paul ilelhek, “Arrangkw, ayeng artwa Jew-arl aneyel, tawen Tarsus-areny, tawen ilkwa apmer Cilicia-itwel. Ntwa apek ayenh tyarlewem, ayeng ilelhetyek artwa nhenh-rnem-warl?”

⁴⁰ Artwamp ra angkek, “Kel, angka!”

Paul-anem ikwer-rnem angkek, “Arrantherr akatemel awelhenherr-arey atyeng!” Rernem kel akatek, Paul ranem Hebrew angel ilelhek ikwer-rnem-warl.

22

¹ “Artwamp atyenh-rnemay! Atyeng-tangkwel awelhenherr-arey, ayeng ilelhetyek!”

² Akgerr rernem akater ikwer awelhek. Paul-anem ikwer-rnem ilelhek Hebrew-kenh angel,

³ “Ayengan artwa Jew-arl. Ayeng ampa akely ilkwerrek. Tarsus tawen-itwek, apmer Cilicia-itwek. Ikwer-penhan ayeng Jerusalem-itwek ilkwerrek. Alerl-antey ayeng Gamaliel-angkwarr akaltyirrek. Ra ayenh ikwerenh-angkwarr ingkerrenh arraty innga akalty-anthek, ayeng Akngey-kenh-angkwarr arraty awelhek, arrantherr Akngeyek awelheyel-apeny.

⁴ Athanem ingwer-rnem ipmek atwek, rerne-marl Jesus apentenh, ingwer-rnem atha tyayl-warlarl akwernek.

⁵ Atyetyart ra akalty anenh, Sanhedrin Council-rnem-then, rernemarl pip anthek, Jew-rnemek, Damascus-el. Ayeng-anem Damascus-warl alhek, Inkart-areny-rnem tyeynel arertnetyek, Jerusalem-warl akngeynetyek, ahelengkw-rnemel renh-rnem atwetyek.

⁶ Ayeng Damascus-warl arrer-anem irrek, lyenenty ilkwel ayenh arrtyernek alker-they.

⁷ Ayeng-anem ahern-warl aytnek. Athanem awek atyengarl yangkelhek. 'Saul-ay, Saul-ay, ilek ntwā ayenh alwerneyel atwetyek ngay?'

⁸ Athanem renh ayernek, 'Inkart, angwenharl ngan?' Ra ayenh ilek, 'Ayengarl Jesus Nazareth-arenyarl aneyel. Ntwā atyenh-rnem ipmek atwetyek alwerneyel.'

⁹ Artwa rernem atyeng-angkwarr alhek-rnem rernem kel lyenenty renh arek, rernem Jesus renh away-angenharl rarl anwekantherr angkek.

¹⁰ Athanem Jesus renh ayernek, 'Inkartay, ilek nga ilkelheyelan?' Ranem ayenh ilek, 'Kel, akemirray! Artwa anyent arey-alpa, Damascus tawen-itwek, ranem ngkweng ileyenh, nthakenharl nga irreyenhan.'

¹¹ Lyenenty ilkwel ayenh aparrngilek. Alakenh-anyem artwa atyeng-angkwarr apetyek-rnemel ayenh atnwenheynek Damascus-warl.

¹² Damascus-itwek artwa Ananias anenh, ra Moses-kenh angkek awelhek. Jew apmer ilenh-areny-rnemel renh iterl-arenh, ra artwa mwer-rarl.

¹³ Ananias ranem anwekantherr-warl apetyek. Ra anwekantherr-itwek rtnek, ayenh ilek arrpe-marl, 'Saul-ay atyenhay! Ntwā areyenh arrpe-marl!' Athanem renh innga arek.

¹⁴ Ananias-el-anem ayenh ilek, 'Arrwekeleny anaynwekantherrenh-rnem-tangkwel Akngey apentenh, rey-antey ngenh-anem rlwanek, ikwer warrkirretyek. Rantey arrpemarl ngenh

arrwekel rlwanek, artwa arraty impen renh ntwā aretyek awetyek-then.

¹⁵ Ntwa ingkerrenhek iletiek ntwā arekarl, awekarl.

¹⁶ Aleth-antei anngangelhey-angenh. Kel, akemirra! Kwenirremel ilelha, apmwa ngkwengety iwetyek. Atha ngenh baptise-emelem. Akngeyel apmwan ngkwengety iwem.' ”

Ingkartel Paul renh thweneyel arleng-areny Jew-weny-rnem-warl

¹⁷ “Ikwer-penhan ayeng Jerusalem-warl alpek. Arlta ingwerel ayeng tyaty ilkwewarl alhek, Akngey-warl angketyek. Athanem altyerr arek.

¹⁸ Athanem Ingkart arek, rantey arrpemarl ayenh ilek, ‘Kel, nga anamerl alpetyek apmer Jerusalem-thei, angka atyeharl ntwā ileyelek, artwa tawen Jerusalem-areny-rnem ngkwengety arlkarirreyel.’

¹⁹ Ayeng ikwer-warl ilelhek, ‘Ingkartay, rernem akaltyarl ayeng tyaty anyentam-anyent-warl alhenh. Rernem akalty, atha Ingkart-areny tyaylek akwernenh, renh-rnem-then atwenh.

²⁰ Rernem akalty arrpemarl atha arternpel arenh, rernemarl Stephen renh ipmek atwek. Stephen irrkaty renh rarl akngerrek arraty Akngey-kenh angka ilerl-apenh. Ayeng inkwerelhek rernemarl renh ipmek atwek. Athan aytarek arrpemarl. Atha arnkwernem ahelengkw-rnem-kenh arntarnt-arek.’

²¹ Ingkartel ayenh ilek, ‘Kel-anem alha, atha ngenh thwenem apmer arrpanenh-warl nga

alhetyek, arleng-areny-rnem-warl, Jew-weny-rnem-warl.' ”

Rome-areny atyetyart ilkelheyel, Paul renh whip-el atwetyek. Paul ikwer ilelheyel ra Rome-areny inngan

²² Akngerrel-anem awek angka ikwerenhey. Ikwer-penhan rernem arlkek-anem, “Kel, renh ipmek atwa! Ran artwa apmwarl!”

²³ Rernem aleth-antey arlkenh. Arnkwa ayler-nenh, ahern-anem iwemel alker-warl-athek.

²⁴ Atyetyartel ahelengkw-rnem ilantheek, warl rilterrk ikweren-h-warl akngetyetyek. Ikwer-penhan ahelengkw-rnem ilantheek, Paul renh whip-el atwetyek. Ra renh-rnem ilantheek, Paul renh ayernetyek, “Ilek-kety ngkweng Jew-rnem arlkarirreyel?”

²⁵ Rernem renh arwerl temp-warl arertnek whip-el atwey-alenty. Paul-el Atyetyart renh ay-ernek, “Arraty-weny ntwā Rome-areny atwetyek. Ayen court-warl-tangkwel akngemer! Arraty-wenyarl alakenhey wenh!”

²⁶ Angka awek-penh atyetyart ra artwamp-warl alhemel, renh ilek, “Atha ywarn-antey renh whip-el atwem! Ran ilelheyel ra Rome-areny aneyel.”

²⁷ Atyetyart ra alhek Paul-warl. Ra ayernek, “Ngan Rome-arenyarl?”

Paul-el renh tyernek, “Ya, ayeng apmer ikwer-arenyarl.”

²⁸ Atyetyartel renh ilek, “Atha kapment man akngerr payemelek, Rome-areny anetyek.”

Paul ikwer ilelhek, “Ayengan Rome-areny-kenh arrwekel ilkwerrekarl.”

²⁹ Atyetyart-rnemel Paul renh atwetyek irrek, rernem-anem anamerl-antey angkepirreynek. Atyetyart ra aterirrek innga, ra Rome-areny tyeynel arertnekerr.

Paul Sanhedrin Council-rnemek ilelheyel

³⁰ Arlta ingwerelan Atyetyart ra Sanhedrin Council-ek-artwey-rnem yangkelhek, rernem angkerretyek. Ra ilkelhek arraty innga awetyek, “Ilek-kety arrantherr Paul-kety arlkarirreyel?” Ra ahelengkw-rnem ilantheek tyeyn Paulthey lheletyek. Ikwer-penhan Sanhedrin Council-rnem anyentilek. Atyetyartel Paul-anem arrernek, ikwer-rnem-itwek angetherr rtnetyek.

23

¹ Paul-el-anem Sanhedrin Council-areny-rnem arek, artewentyel arlkemel, “Atyenh-rnem, ayeng Akngeyek arraty innga awelhenh.”

² Artwa irrpety Paul-itwek rtnek. Atyetyart Ananias-el renh-rnem ilantheek, Paul renh arrakert atwetyek.

³ Paul-el-anem Atyetyart ilkwa ilek, “Akngeyel ngenh atweyenh, ngan artwa irrtwyerrey-angker, Moses-kenh-angkwarr apentey-angengan, ntwarl artwernem ilantheek ayenh atwetyek.”

⁴ Rernem-anem Paul renh ilek, “Ntwa nyer-rirremel iley-angenh! Nga Akngey-kenh tyaty atyetyart ilkwel apmwel-areth angkeyel!”

5 Paul ilelhek, “Atyenh-rnemay, atha renh ywemek, alhengk-arey-angenh! Atyetyart ikwer Akngey-kenh angka aynteyel, atyetyartek apmwel-areth angkey-angenh.”

6 Paul-el artwa renh-rnem iterl-arek, rernem Sadducee-rnem-then artwa Pharisee-rnem-then. Paul ilelhek, “Ayeng artwa Pharisee. Akngey atyenh artwa Pharisee arrpemar. Ingwer-rnem ayenh atwetyek ilkelheyel, atharl Akngey renh tnakeyel-kety, ra ipmepenh akwentelhiley-angker.”

7 Sadducee-rnem-then Pharisee-rnem-then rernem awek-penh, rernem ilterrek-anem.

8 Artwa Sadducee-rnemel akalty-anthenh ingwer-rnem ipmepenh nthakenh akemirrey-angenh, angel-rnem aney-angenh arrangkw, itnweng-rnem aney-angenh arrangkw. Artwa Pharisee-rnemel akalty-anthenh, ipmepenh ingkerrenh akemirreyenh, angel-rnem inngarl aneyel itnweng-rnem inngarl aneyel arrpemar. Sadducee-rnem-then Pharisee-rnem-then artewentyel-anem ilterrek.

9 Ikwer-penhan artwa court-areny Pharisee-rnem, alakenh arlkek ikwer, “Artwa nhan arlarl, mwerrarl! Angel-el renh ilek apek, itnwengel apek renh ilek.”

10 Rernem inngan aleth-antey atwerrenharl-kety, atyetyart ra aterirrek. Alakenhaym ra ahelengk-rnem ilanthe, Paul renh inerl-alhemel warl rlterrk-warl ilarr-akwernetyek.

11 Ingwa ingwerelan Ingkart-anem Paul ikwer-itwel rtney-alhek, renh ilek, “Aterirrey-angenh ana! Nga kel Jerusalem-areny-rnem

angka atyenh ilek. Ngkweng-anem aynteyel Rome tawen-areny-rnem angka atyenh akalty-anthetyek.”

Jew-rnem angkerreyel Paul renh ipmek atwetyek

¹² Kel Ingwepenh-anem Jew-rnem anyentirrek, angkerretyek. Rernem ilerrek, “Arlkwey-angenh-antey antywey-angenh-antey alerl anwantherr Paul renh-tangkwel ipmek atwetyek. Atwenty-penhelant arlkwetyek, antywey.”

¹³ Artwa 40 alakenh angkerrenh.

¹⁴ Ikwer-penhan rernem tyaty-areny atyetyart-rnem artwa ampwernem-warl-then alhemel, “Aray anwantherr arlkwey-angenh antywey-angenh, Paul atwenty-penhant!

¹⁵ Arrantherr Sanhedrin Council-warl-then ahelengkw atyetyart ingwer-warl angka thwenetyek, Paul arrekantherr-warl atnwenhey-alhetyek, atyetyartel-anem Paul renh arraty-angkwarr ayernetyek. Rernem renh nhewarlanym atnwenhey-alenty, anwantherr renh ipmek-anem irrtyert-atwem.”

¹⁶ Paul-kenh ampelikw awek rernemarl ikwerarl tyel-angkerrenh, renh ipmek atwetyek. Ranem Atyetyart-rnem warl-warl aylpemel, Paul ikwer ilek.

¹⁷ Paul ranem atyetyart anyentek yangkelhek, renh ilek, “Anthety nhenh atnwenha, atyetyart irlkentyek-artwey Claudius ilkwewarl ra iletiek.”

18 Atyetyart ra anthety renh atnwenhek, ratherr angkerretyek. Ra atyetyart irlkentyek-artwey renh ilek, "Paul-el artwa anthety nhenh thwenek, atyeng-angkwarr, renharl Paul-el thwenek."

19 Ranem anthety renh anyelkel ayerne, "Ilek ntwatwa atyeng iletiek nga apetyek?"

20 Anthety ra atyetyart ilkwa renh ilek, "Jew-rnem angkerrenh, Paul renh ipmek atwetyek. Rernem-anem ingwepenh angka ngkweng-warl thweneyenh. Ntwatwa Paul renh Sanhedrin Council-warl atnwenhetyek, rernem renh arraty-angkwarr ayernetyek.

21 Nga ikwer-rnem awelhey-angenh anetyek. Aray, artwa 40 irlkenty ikwer mpwelheyel, renh ipmek irrtyert atwetyek. Artwa rernem angkerrenh arlkwey-angenh antywey-angenh anetyek, Paul rernem atwenty-penhelant arlkwetyek, antywey. Rernem lyert mpwelheyel angka ngkwenh awetyek."

22 Atyetyart irlkentyek-artwey ranem anthety renh ilek, "Angka nhenh ntwatwa atyeng ilek, nthakenh ingwer-rnem iley-angenh." Ranem anthety renh thwenek.

Atyetyartel Paul renh Felix-warl thweneyel

23 Atyetyart ranem atyetyart atherrek yangkelhek. Ra renh-atherr ilek, "Mpwelanth arrpemarl atnengkilem, ahelengkw atyetyart 70 nanthakert-rnem 200 ingwer-rnem irrtyart-awarr-rnem-then, ahelengkw 200 ingwer-rnem-then, napp arreylp-awarr-rnem-then. Mpwelanth Atyetyart-rnem Caesarea tawen-warl alhetyek.

²⁴ Ikwer-penhan Paul nanth-warl tywenemel renh atyetyart nhernem-angkwarr Felix-warl alhetyek, atyetyart ilkwewarl.”

²⁵ Atyetyart ranem pip renh ingkwernek, ratherr Felix renh anthetyek.

²⁶ “Felix-ay, atha ngenh tnakem. Ayengan Claudius, athan pip ngkweng ingkwerneyel.

²⁷ Jew-rnemel artwa nhenh renh anterrkwek. Rernem renh ipmek atwetyek irrek. Atha awek ra Rome-areny aneyel. Alakenh-anyem ayeng atyetyart-rnemek arrkngert angkek, renh itethilemel.

²⁸ Athanem renh Sanhedrin Council-warl atnwenhek, renh-rnem ayernetyek, ‘Ilek-they arrantherr artwa nhenh ipmek atwetyek ilkel-heyel?’

²⁹ Ayeng akalty, atharl renh-rnem awekarl, rernemarl ikwer angkerrenh ipmek atwetyek, tyayl-warl akwernetyek. Artwa ran arlarl.

³⁰ Atha awek arrpemarl rernem ipmek atwetyekarl angkerrenh. Alakenh-anyem atha renh ngkweng-warl thwenek. Athantey arrpemarl Jew-rnem Atyetyart-rnem-then rernem ngkweng-warl alhetyek, rernem ngkweng-itwekanem anngetherr ayntarrp-ilemel iletiek.”

³¹ Ahelengkw-rnem awelhek. Ingwel Paul rernem Antipatris tawen-warl akngek.

³² Ingwepenh ingkel apetyek-rnem rernem Jerusalem-warl-anem alpek. Ahelengkw nanth-akert-rnemel Paul renh anper-antey akngek Caesarea tawen-warl

³³ Rernem pip Felix renh antheke. Rernem Paul renh antheke ikwer-rnem.

³⁴ Pip renh reytemilek-penh, Felix-el Paul renh ayernek, “Apmer nthenh-areny ngan?”

Paul ilelhek ikwer-warl, “Ayeng ahern Cilicia-areny.”

³⁵ Felix-el-anem renh ilek, “Alerl-antey awetyek artwa ingwer-rnem apetyentyelant, ayntarrp-iley-angker-rnem.” Ranem ahelengkw ikwerenh-rnem ilantheek, rernem Paul Herod-kenh warl-itwek atnyenetyek alerl-antey.

24

Jew-rnemel Paul Felix-itwek anngetherr ayntarrp-ileyel

¹ Arlta 5-penhan, Ananias Caesarea tawen-warl apetyek Felix-warl. Ananias ra atyetyart ilkwa anenh. Ikwer-angkwarr atyetyart Jew irrpety apetyek arrpemar. Tertullus ra court-areny. Rernem Tertullus-itwek angkerrenh ra Paul Felix-itwek anngetherr iletiek.

² Felix-el-anem ahelengkw-rnem ilantheek, Paul renh court-warl akngetyetyek. Tertullus ranem Paul renh ayntarrp-ilek. Tertullus-el Felix renh tnakek, “Felix-ay, ngarl atyetyart arrwekel an-wernekantherr anenh-angkwarr, ntwanwenhantherr mwerr-angkwarr arntarnt-arek. Anwantherr mwerrant-arey anenh.

³ Anwantherr ngkweng awelheyel, arrwekel ntwanwenhantherr arraty-angkwarr arntarnt-areny.

⁴ Ayeng-anem arleng-alenty angkey-angenh. Angka akely arwa ayeng angkerl-ayney. Atha renh ayntarrp-ilem.

⁵ Paul ra artwa Jew-rnem apmer arrpanenh-itwek ilpertil-erl-apenh. Ikwer-penhan rernem ahel ilterrenh. Rantey arrpemar Nazarene-ek atyetyart aneyel.

⁶ Apmwerrkel ra tyaty ilkwewar aylpenty-arrpantey akwerrp-rnem-akert. Anwantherr renh anterrkwek-anem.

⁸ Arrantherr renh amentel ayernenherr-arey. Ikwer-penhan arrantherr renh iterl-arem-anem, ra apmwel-areth akalty-antherl-anenty.”

⁹ Jew-rnem Tertullus-angkwarrarl apetyek-rnem rernem irrkaty-angkwarr-antey angkek.

Paul Felix-itwek angetherr ilelheyel

¹⁰ Felix Paul-ek iltyerrek, ranem angketyek. Paul ra ilelhek, “Nga aherrety arrpanenhel mwerr-angkwarr arntarnt-arek, mwerr atha ngenh tyernem.

¹¹ Ingwer-rnemel ngenh ileman, ayeng apmwerrkel arwa Jerusalem-warl apey-alpek, Akngeyek inkwerelheyek.

¹² Nhenh-rnem akaltyarl tyaty ilkwa kwen-itwek ilterrey-angenh. Atha apmwel-areth akalty-anthey-angenh aketh-itwek, Jerusalem ikwer-itwek.

¹³ Rernem akalty, rernem ayenh apalel arwa ayntarrp-ileyel.

¹⁴ Ayeng ngkweng arraty ilelheyel, ayeng Akngeyek inkwerelheyel, renh tnakeyel. Jew-rnemel ayenh ayntarrp-ileyel, ayeng Akngeyek inkwerelhey-angenh-arrpantey. Athan angka Moses-kenh-angkwarr apentem, Akngey-kenh angkakert arrwekeleny-rnem-then.

15 Athan Akngey-kenh-angkwarr apenteyel arrpemarl, rernemarl apentenh-apeny. Akngeyel mwerr-rnem-then artwa apmwernem-then akemelhileyen.

16 Alakenhaym ayeng arrkernelheyel Akngey-angkwarr arraty ayeng anetyek ahern-areny ingkerrenhek arraty-angkwarr ayeng anetyek arrpemarl.

17 Aherrety arrpanenhel ayeng apmer arrpanenh-itwek anak. Ikwer-penhan ayeng Jerusalem-warl apey-alpek. Atha man ikwer-rnem akngey-alhek, tyenkerr anthetyek tyaty ilkwitwek.

18 Artwa Jew irrpetyel ayen tyaty ilkwitwek arek, atharl tyenkerr Akngey anthenh. Ayeng ament-areny atha akngerr irlkentyiley-angenh atwerretyek.

19 Artwa Jew Asia-areny irrpety tyaty ilkwitwek anenh arrpemarl. Rernem nhenh-warl apetyey-angenharl, ngkweng-angkwarr angetherr ilelhetyek.

20 Tertullus-rnemel ayen ayntarrp-ileyel atharl apmwangkwarr akalty-anthenty-arrpantey. Aray, rernem ayen Sanhedrin Council-itwek angetherr ayntarrp-ilek, ywarnantey.

21 Rernem ayen ayernek, atha ikwer-rnem ilek, 'Arrantherr lyert ayen ayntarrp-ileyel, atharl Akngey tnakeyel, ipmepen ingkerrenh itethiley-angker.' "

22 Felix ra arrwekel-antey Inkart Jesus-kenh angka awek. Ranem renh-rnem ilek, "Atyetyart Lysias alerl-antey apetyey-angenh-antey mpwel-

heyel. Ra aremirrenty, athanem Paul renh iley-ayntetyek-anem, nthakenharl ra irreyenh.”

²³ Felix-el-anem atyetyart ahelengkw anyent ilantheke, Paul renh arntarnt-aretyek. “Ntwa renh arntarnt-ara! Renh tyeynel arertney-angenh anetyek. Ntwa ikwerenh-rnem-then menty aretyek, rernemaril ilkwatherr ikwer-warl apetyem, amernel renh wantetyek.”

Felix-then Drusilla-then ratherr Paul renh aweyel

²⁴ Arlta irrpety-penh, Felix anew ikwerenh Drusilla-akert warl court-ek-arelh ikwer-warl alhek, Paul renh awetyek. Drusilla arelh Jew anenh. Ikwer-penhan Paul-el ikwer-atherr Jesus-kenh angka akalty-antheke, Jesus renh apentetyek.

²⁵ “Akngey-angkwarr arraty-angkwarr apentenherr-atherr! Apmwekety mwerranty irretyek, apmwekety ipmelhetyek. Arlta ingkernel Akngey ra ingkerrenh akngakeyenh.”

Paul renh awek-penh Felix ra aterirrek. Ranem Paul renh ilek, “Kel, ipmey, ingweringerant ayeng ngkweng yangkelhetyek.”

²⁶ Ra yangkelhenh, aweth-antey ratherr angkerretyek, arratyilerretyek Felix mpwelhenh, Paul-el renh man anthetyek, Paul ra man anthemel tyayl-the tyerrelhetyek.

²⁷ Aherrety atherr-penh, Rome-areny-rnemel Atyetyart artwa ingwer-anem rnrkerneke, itnan Porcius Festus. Jew-rnem ilkelhenh ra tyayl kwen anerl-ayntetyek, Felix-el Paul renh tyayl-the tyarlewey-angenh-antey.

25

Paul Festus-ek ilelheyel, "Ayeng ilkelheyel Caesar-warl alhetyek"

¹ Rernem Festus-anem rnkernek, atyetyart ilkwa anetyek. Ikwer-penh arlta atherr-penh, Festus Caesarea tawen-they Jerusalem-warl alhek.

² Atyetyart tyaty-areny-rnem-then Jew-kenh atyetyart ingwer-rnem-then Paul-ek angkerrenh.

³ Rernem Festus renh ayernek, ra Paul Jerusalem-warl akngetyetyek. Rernem ilkelhek Paul renh iwerr ampep-itwek-antey ipmek atwetyek.

⁴ Festus-el renh-rnem ilek, "Paul Caesarea-itwek aleth anetyek. Ayeng Caesarea-warl alerl alpeyenh ingwer-inger.

⁵ Arrantherr angkeyel, ra artwa apmwarl aneyel. Atyetyart irrpety arrekatherrenh atyeng-angkwarr apetyetyek, ngenh angetherr aytarrp-iletyek."

⁶ Festus-anem Jerusalem-itwek anenh wik anyentek-atwety. Ikwer-penhan ra Caesarea-warl alpek. Arlta ingwerelan court-warl-anem alhek, Paul ikwer-anem yangkelhek.

⁷ Paul ra court-itwek aney-alhek-anem, Jerusalem-arenyel-rnem renh aleth aytarrp-ilek. Rernem irrtwyerremel renh aleth-antey aytarrp-ilenh.

⁸ Paul-anem ilelhek "Atha Jew-rnem-kenh-angkwarr apmwel-areth mpwarey-angenh, Rome-areny-rnemek-then. Atha tyaty ilkwa Jew-rnem-kenh apmwel-areth mpwarey-angenh.

Ayeng Caesar Rome-areny Atyetyart ilkwek irrpelthirrey-angenh.”

⁹ Festus ra ilkelhek, Jew-rnem kwartewetyek. Alakenh-anyem ra Paul renh ayernek, “Nga apek Jerusalem-warl alhem, nga court-el angketyek ikwer-itwek apek, Jerusalem-itwek.”

¹⁰ Paul-el renh tyernek, “Ayengarl Rome-areny. Ntwa atyeng court mpwaretyek Rome-itwek-antey. Kel nga akalty atha Jew-rnem-angkwarr apmwel-areth mpwarey-angenh.

¹¹ Atha apmwel-areth mpwarentyan, atyengarl alakenh aynteyelarl, rernem ayenh ipmek atwetyekarl alhewerarl. Rernem irrywerremel ileyel. Ingwer-rnemel nthakenh ayenh ahayiwey-angenh Jerusalem-areny-rnem-warl. Atyetyart Rome-areny rant ayenh court-itwek ayernetyek.”

¹² Paul renh awek-penh, Festus artwa ingwer-rnem-then angkerrenh. Artwa rernem Rome-areny-rnem-angkwarr renh iterl-arenhan. Ikwer-penhan ra Paul renh ilek, “Ngarl ilkelheyel-angkwarr-antey, Atyetyart Caesar rant court-itwek ayernetyek.”

Paul Agrippa-warl Bernice-warl angkeyel

¹³ Ingwer-ingeran, King Agrippa Caesarea-warl apetyek anew ikwerenh-then-antey Bernice-then. Ratherr ilkwatherr apetyek Festus-warl, renh aretyek.

¹⁴ Ratherr kel arlta irrpety ikwer-itwek anek-penh, Festus-el King renh Paul-ek ilek. Ra renh ilek, “Felix-el artwa anyent tyayl-itwek iwerl-alhek.

15 Ayeng Jerusalem-itwek anenh-antey, tyaty-areny atyetyart-rnem-then Jew-rnem atyetyart-rnem-then rernem atyeng-warl apetyek. Rernem ayenh ayernek, atha anyent renh ipmek atwetyek.

16 Atha renh-rnem ilek, 'Anwekantherrenh-angkwarr angka ingweran aynteyel arrpemar. Anwantherr nthakenh ingwer ipmek atwey-angenh. Arrantherr renh angetherr court-itwek ayernetyek. Ikwer-penhan ra ilelhenty, renh ipmek-anem atwetyek.'

17 Jew-rnem-anem nhenh-warl apetyek atyeng-warl. Arlta ingwerelan ayeng Paul-ek yangkelhek, atha renh ayernetyek, rernem renh angetherr ayntarrp-iletyek.

18 Rernem-anem ayntarrp-ilek, athanem iterlarek rernemar. Apalel renh ayntarrp-ilek, atha renh nthakenh ipmek atwey-angenh.

19 Rernem ilterrek, Akngey ikwer-rnem-kenhthey. Rernem ilterrek Jesus-they, rar. Arrewaly ayntek. Paul ra ilek, 'Jesus ra iteth aneyel.'

20 Ayeng-anem ywarn iterrek athanem Paul renh ayernek, 'Nga Jerusalem-warl alhetyek? Atha ngenh court-emileyek.'

21 Paul ilelhek, 'Ayeng ilkelheyel, Caesar-itwek ayenh court-emileyek.' Alakenh-anyem atha renh tyayl-itwek atnyeneyel, Rome-warlant renh thwenetyek."

22 Ikwer-penhan Agrippa-el-anem Festus renh ilek, "Ayeng ilkelheyel atha artwa renh awe-tyek." Festus-el renh ilek, "Ntwa kel ingwepenh renh awetyek."

23 Kel arlta ingwerel Agrippa Bernice-atherr Festus-kenh warl-warl apetyek, arnkwa mwerr-angkerel aylpemel. Ahelengkw Atyetyart ingwer-rnem-then, artwa ingwer-rnem-then warl ikwer-itwek anyentirrek. Ikwer-they Festus Paul-ek yangkelhek.

24 Festus-anem angkek, “King Agrippa-ay, atyetyart-rnemay, arrantherr artwa nhenh arenherr-arey! Jew nhenh-arenyel-rnem-then Jerusalem-areny-rnem-then rernem artwa renh ayntarrp-ilek. Rernem-antey ilantheek, atha renh ipmek atwetyek.

25 Ran artwa mwerrarl, arlarl. Atha renh-rnem arternpel awek, nthakenh atha renh ipmek atwey-angenh, menty-anem. Ikwer-penhan Paul rantey angkek, Caesar-el renh court-emiletyek. Alakenh-anyem atha renh Caesar-warl thwentyek.

26 Nthakenh atha renh arwa thweney-angenh, renh court-emiletyek. Alakenh-anyem ayeng ikwer yangkelhek, arrantherr King Agrippa-el akngerr ayernetyek. Anantherr-anem pip thwenetyek atyetyart Caesar-warl.

27 Arrantherr mwerrant-arey angkerrenty, atha renh thwenemarl.”

26

Paul Agrippa-itwek angetherr ilelheyel

¹ Ikwer-penhan King Agrippa-el Paul renh ilek, “Nganem ikwer-rnem-warl ilelha.”

Paul ilterremel renh-rnem akaterilek, rap ikwer-rnem ilelhek,

² “King Agrippa, Jew-rnemel ayenh ayntarrp-ileyel. Ayeng-anem inkwerelheyel, ngkweng-warl anngetherr ilelhetyek.

³ Nga akalty Jew-rnem-kenh-angkwarr ayeng ngkweng-warl angkeyel. Atyeng awelha!

⁴ Jew-rnem atyeng akalty, ayeng arraty-angkwarr anenharl ampa akely-they. Ayeng alakenh lwewarrernelhek apmer Jerusalem-itwek.

⁵ Rernem ayenh arrwekel-antey iterl-arenh, ayeng Pharisee-arl anenh. Alakenh-anyem athan arraty-angkwarr apentenh.

⁶⁻⁸ Awank-akerr Akngeyel arrewaly anwekantherrenh-rnem alhelek. Ayeng kel akalty nhenh arraty innga. Arrantherr irrpeltherreyel, Akngey rarl arrewaly ingkerrenh ipmepenh akwentelhileyenh. Israel-kenh ingkerrenh akalty-wenyarl rernem mpwelheyel Akngey-kenh angka arrwekeleny renh arratyirretyek. Rernem Akngey renh aleth-antey ayerneyel. Lyert Jew-rnem ilkelheyel ayenh ipmek atwetyek. Atyetyart, renh-rnem atha ileyel, Akngey-kenh angka arrwekeleny arraty aynteyel.

⁹ Awank-akerr ayeng iterrenh Jesus Nazareth-arenyekarl irrpelthirretyek.

¹⁰ Alakenh atha mpwarek apmer Jerusalem-itwek. Jew-kenh tyaty-areny Atyetyart rernem ayenh thwenek, atha Ingkartarl apenteyel-rnem tyayl-warl akwernetyek, ingwer-rnem ipmek atwetyek, Ingkart-angkwarrarl apenteyel-rnem.

¹¹ Ayeng Ingkart-areny-rnemek tyaty akely-rnem-itwek nthwenh, atha renh-rnem atwetyek.

Atha renh-rnem apentey-angenh anetyek ilek. Ayeng apmer arleng ingwer-ampeny-warl alhek, atha renh-rnem alwernemel atwetyek.

¹² Ingwer-ingeran, ayeng Damascus-warl-anem alhek, tyaty-areny atyetyart ilkwernemel ayenh thwenek, Jesus-arl apenteyel-rnem Damascus-itwek anterrkwetyek.

¹³ King-ay, lyenenty ilkwel ayenh arrtyernek alker-they. Ayenh artwa ingwer-rnem-then.

¹⁴ Anantherr ingkerrenh-antey ahern-warl aytnek. Ra ayenh Hebrew-kenh angel ayernek, 'Saul-ay, ilek ntw a tyenh-rnem alwerneyel atwetyek ngay? Atyeng irrpelthirremel nga ament apmwelheleyel!'

¹⁵ Athanem renh ayernek, 'Ingkartay, angwenh ngan?' Ingkartel ayenh ilek, 'Ayengan Jesus-arl. Ayenh ntw a alwerneyel atwetyek.

¹⁶ Kel, akemirra! Ayeng ngkweng-warl aremirrek. Atha ngenh rlwanek, atyeng warrkirretyek, ntw a renh-rnem iletiek. Ntw a renh-rnem angka ingwer iletiek, angka renh atha ngkweng iley-angenh-antey.

¹⁷ Atha ngenh Jew-rnem-warl Jew-weny-rnem-warl-then thwenem, atha ngenh kel ikwer-rnem-kety arntarnt-areyel.

¹⁸ Ntwanem renh-rnem angka atyenh akalty-anthetyek. Ntw a renh-rnem iletiek, apmw ek inkwerelhey-angenh anayntetyek, arrenty ek awelhey-angenh anayntetyek, kel Akngeyekant awelh-ayntetyek, rernem Akngey-warl angkepirretyek. Rernem ayenh-anem tnaketyek, Akngeyel apmwa ikwer-rnem-

kety iwem. Ikwer-penhan atha renh-rnem anyentelhilemarl.'

¹⁹ King Agrippa, ayeng kel Inkartek awelhek. Ra atyeng aremirrek.

²⁰ Atha Jew-rnem-then Jew-weny-rnem-then akalty-anthek Damascus-itwek-anem Jerusalem-itwek-anem, apmer Judea-itwek-anem. Ikwer-penhan apmer arrpanenhek. Atha renh-rnem ilek, rernem Akngey-warl angkepirretyek, rernem-anem arraty-angkwarr anetyek. Ingwer-rnemel iterl-areyenh rernemarl angkepirrek Akngey-warl-athek.

²¹ Jew-rnemel ayenh tyaty ilkwitwek anterrk-wek, rernem ayenh ipmek atwetyek ilkelhek.

²² Akngeyel ayenh arntarnt-arek. Athanem ingkerrenh ileyel angka Jesus-kenh. Angka nhenh arraty inngarl aynteyel. Akngey apenteyelarl-rnem awankarl anenh-rnemel Moses-akerr arwekel ilek arrpemarl.

²³ Rernem ilek Christ ra irrwampenty awelhenty-penh ilwetyek. Ikwer-penhan retangkwel arrewaly-penh akemirreyenh. Ikwer-penhan angka ikwerenh arlpimperreyenh angka ilpertel-warl, Jew-rnemel-then Jew-weny-rnemel-then renh arraty iterl-aretyek, rernem-anem iteth intem-antey anayntetyek."

²⁴ Paul angkenh-antey Festus ikwer angkek, "Paul arwengk ngan! Ingkerrenh-angkwarr nga akaltyirrek, ilpertelhilemel!"

²⁵ Paul-el renh ilek, "Festus, atyetyart ilkwa, ayengan arwengk-wenyarl. Atharl ikwer-rnem ileyel arraty inngarl.

²⁶ King Agrippa-el angka nhenh iterl-areyel. Alakenhaym ayeng ikwer arternp innga angkek. Christ ra akgerr-itwek anngetherr-itwek ilwek, rap akemirrek.”

²⁷ Paul-el Agrippa renh ayernek, “Ntwa angkakert arrwekeleny Akngey-kenh tnakem? Ayeng akalty ntwa renh-rnem tnakem!”

²⁸ Agrippa-el Paul renh ilek, “Nga atyeng arrk-ernelheyel ayeng Inkart-angkwarr anetyek!”

²⁹ Paul-el renh ilek, “Lyert apek, ingwer-inger apek. Atha Akngey renh ayernem ngkweng ingwer-rnemek, arrantherr atyeng lyert awelhetyek. Arrantherr ingkerrenh Jesus-arl apenteyel-rnem atyeng-apeny anetyek tyeyn-weny.”

³⁰ King-then Festus-then Bernice-then rernem akwentemel rtnerl-alhek ingwer-rnem-then.

³¹ Ikwer-penhan room-they rernem aketh-warl-anem alhek. Rernem angkerrenh, “Artwa nhenh apmwewenyarl! Nthakenh anwantherr renh ipmek atwey-angenh! Nthakenh tyayl-itwek atnyeney-angenh.”

³² Agrippa-el-anem Festus renh ilek, “Anantherr renh tyayl-they menty tyarlewey-angenh, Caesar-elant renh court-emiletyek rarl ilkelheyel-angkwarr.”

27

Paul rtnwewarl nganeyel, Rome-warl alhetyek

¹ Festus ra iterrek Paul renh apmer Italy-warl thwenetyek. Alakenh-anyem Paul artwa tyayl-areny ingwer-rnem-then Julius-warl thwenek,

Rome-areny Atyetyart anyent ra renh-rnem Rome tawen-warl akngetyek. Julius ra atyetyart ahelengkw 100 ikwer-rnem, irkentyek-akert.

² Anwantherr-anem rtnwa anyent-warl nganek. Aristarchus artwa Macedonia-areny ra Thessalonica tawen-itwek anenh. Ra nganerl-alhek arrpemar. Adramyttium-warl kel alhetyek irrek apmer Asia-warl.

³ Arlta ingwerelan Sidon tawen-itwek Julius ranem Paul renh mwerr-angkwarr tyarlewek, ikwerenh-rnem arerl-alpetyek. Rernem renh amern-rnem antheke ra alethel alhetyek.

⁴ Kwatyel-antey alhenh, awer ilkwa innga pwey-alhek. Awerel anwenhantherr akngelhew-akngelhilek. Alakenh-anyem anwantherr apmer Cyprus-they arrer-antey alhenh.

⁵ Ikwer-penh anwantherr ahern Cilicia-angkwarr ahern Pamphylia-they aleth alhek, Myra ikwer-itwek-anem aney-alhek. Myra ra tawen anenh ahern Lycia-itwek.

⁶ Myra tawen ikwer-itwek atyetyart ra rtnwa ingwer arek, Alexandria tawen-they apetyek. Rtnwa ra Italy-warl alhetyek-anek. Alakenh-anyem Atyetyart ra anwenhantherr thwenek rtnwa ikwer-warl-anem nganerl-alhetyek.

⁷ Anwantherr arlta irrpety-inger alhek Cnidus tawen-warl. Anwantherr kel ywarn-antey alhek, awerel anwenhantherr akngelhew-akngelhilek. Alakenh-anyem anwantherr alhek apmer Crete-warl. Salmone tawen-angkwarr anwantherr aleth alhek.

⁸ Anwantherr apmer-they arrer-ampenyel alhek. Ikwer-penhan anwantherr Fair Havens

tawen-warl apetyek. Fair Havens tawen Lasea tawen-they arrer anenh.

⁹ Awer rlterrkkel akngelhew-akngelhilek-kety, anwantherr Fair Havens tawen ikwerel-antey anak. Awer ra rlterrkam-rlterrirrek alyangkwel. Alakenh-anyem anwantherr arrangkw ayntek, anwantherr aleth alhey-angenh. Paul-el artwa renh-rnem ilek,

¹⁰ “Artwernemay, anwantherr nthakenh anper-alhey-angenh anwantherr apmwewarl irrekerr apek rtnwa akelhekerr ingkerrenh atwekerr kwatyel aylpekerr. Rtnwa akelhentyel kwaty-itwek, ampwal ingkerrenh ywerrekerr.”

¹¹ Rome-areny atyetyart ra Paul-ek awelhey-angenh. Ra rtnwek-artweyekant, rtnwek atyet-yartekant awelhenh.

¹² Fair Havens ra rtnwek rtakw mwerr aney-angenh, alherrp aleth-antey pwenh. Alakenh-anyem rtnwek-artwey-rnem ilkelhek Phoenix tawen-warl anper-alhetyek. Phoenix ikwer-itwekan rtnwek-arelh rtakw mwerrarl ayn-tek. Rtnwel anerl-apenh-rnem ilkelhek apmer nhenh-itwek anetyek, alherrp-kety.

Awer rlterrkkel kwaty aypmerrel-then Paul renh akngelhew-akngelhiley

¹³ Ingwer-ingeran awer akely-anem pwey-alhek. Rernem-anem iterrek, “Anwantherr kel arrkernelhey, Phoenix-warl-anem anper-alhetyek.” Rernem ayen kanty-akert renh lhelek, Phoenix-warl-athek kwatyel-antey anperl-alhek.

14 Ikwer-penhan awer rlterrk-el-anem ayerrer-they akngerrakw-they pwey-alhek apmer Crete-they.

15 Awer ilkwanem pwey-alhek, alhetyek arrkernelhek. Rernem ywarn-anem altwerl-athek alhetyek arrkernelhek. Awer ra rtnwa renh akngartewek-anem antekerr-athek.

16 Awerel-anem anwantherr akngartewek, apmer akwerlp akely-warl, itnan ikwerenh Cauda. Anantherr akwerlp akely ikwer arrer irremel, anwantherr rtnwa akely inemel rtnwa ilkwewarl arertnek, ayteng-akngeynetyek.

17 Rtnwa ikwer-itwek rwepel arertnek, ngkweltyirrekerr. Awerel aleth akngartewekerr rernem aterirrek, rtnwa ra ahernel mwernelhekerr, apmer Libya-itwek. Rernem kalikw akely-anem artelh-aynek, rtnwa ra mwerr-angkwarr alhetyek.

18 Arlta ingwerel, awer ra rlterrk aleth pwenh. Alakenh-anyem arlta ingwerel rernem rtnwethey ampwal-rnem kwatyek iwek arwerlp alhetyek.

19 Ikwer-penhan arlta ingwerel, rernem kalikw-rnem-then rwep-rnem-then kwaty-warl iwek.

20 Arlta akngerr ingkeny-then antyarr-rnem-then anwantherr arey-angenh. Awer ra aleth pwenh. Anwantherr-anem iterrek, anwantherr ingkerrenh ilweyenh, kwaty ampantel.

21 Anwantherr angayakw kel amern arlkwey-angenh anenh. Paul-el-anem artwa renh-rnem ilek, "Arrantherr atyeng awelhey-angenh. Ar-

rantherr apmer Crete-el aney-angenh, rtnwa mwerr ayntey-alhek ampwal-rnem ingkerrenh.

²² Arrantherr aterirrey-angenh anetyek, nthakenh anwantherr ilwey-angenh.

²³⁻²⁴ Aray, Akngey atyenhel angel thwenek atyeng-warl. Angel ra ayenh ilek, 'Paul-ay, aterirrey-angenh! Akngey ilkelheyel nga Caesar-angkwarr angetherr ilelhetyek. Ra artwa ingkerrenh itethileyenh.'

²⁵ Alakenh-anyem artwernem arrantherr aterirrey-angenh anetyek. Atha Akngey tnakem, angka ikwerenh innga aynteyel, ran anwenhantherr kwaty-kety itethiley-angker!

²⁶ Rtnwa akwerlp-itwek mwernelheyel."

²⁷ Anwantherr kel ingwa 14-ek-atwety kwaty alay Mediterranean ikwer-itwek anenh. Awer ra rtnwa renh aleth-antey akngelhew-akngenhelhilek. Kel iterl-arek rernem ahern ikwer-warl irrenty-arrpantey.

²⁸ Rernem-anem ayen kanty-akert renh kwaty-warl iwek, rernem aretyek kwaty ra apek kwen ayntentyek. Rernem rwep renh kwaty-they tyerrek, rernem arek kwaty ra 37 metres ipert ayntek. Ikwer-penhan rernem arek kwaty 27 metres ipert ayntekan.

²⁹ Rtnwek warrkenh-rnem aterirrek, apwert atwekerr-arrpantey ahern-then. Rernem-anem 4-pel anchor-rnem kwaty-warl iwek. Rtnwa ingkern-ampenyek rtnwa renh arternpiletyek. Ikwer-penhan rernem ingwepenhek-anem mpwelheyel.

³⁰ Ikwer-penhan rtnwek warrkenh-rnem aterirrek, rtnwa ikwer-they anterretyek.

Rernem-anem rtnwa akely kwaty-warl arrernek. Ingwer-rnem irrtywerremel ilek, “Anwantherr kanty ayen-akert ingwer-rnem rtnwethey atwarrelhiley.”

³¹ Paul-el renh-rnem arek, Rome-areny Atyetyart-rnem ilek, “Rernem rtnwa renh iwerl-alhenty, Akngeyel arrenhantherr kwaty-kety itethiley-angenh.”

³² Atyetyart-rnemel rwep renh akek, rwep rarl rtnwa akely renh anterrkwenh. Rtnwa akely ranem kwaty-warl aytnek.

³³ Ingkeny tyerrelhetyek-anem irrek, Paul-el-anem artwa ingkerrenh ilek amern arlkwe-tyek. Ra renh-rnem ilek, “Arenherr-arey, kel ingwepenh-anem. Kel arrantherr arlta 14-ek-atwety aterirremel warrkirrek, arrantherr amern arlkwey-angenh.

³⁴ Kel-anem amern arlkwenherrer-arey! Arrantherr amern-weny angayakw irrekerr; arrantherr mwerr anetyek ilwey-angenh.”

³⁵ Alakenh angkek-penh Paul-el amern inek. Ranem ikwer-rnem-itwek anngetherr Akngey ay-ernek, amern renh rlweth-akemel, ra kel arlkwek.

³⁶ Paul-ek awelhemel, rernem amern renh arlkwek arrpemar.

³⁷ Artwa 276 rtnwa ikwer-itwek anenh.

³⁸ Rernem ingkerrenh amern arlkwek-penh. Ikwer-penhan rernem weyt ntang-rnem alay-warl iwek, rtnwa ra, arwerlp-awaty alhetyek.

Rtnwa ra ahern atwey-alpeyel

³⁹ Kel ingwepenh irrenhey-alhek-anem rtnwek warrkenh-rnemel ahern impalth-anem arek, apmer renh iterl-arey-angenh. Aketh mwerr ahern impalth renh arek rernem ilkelhek rtnwa renh ahern ikwer-warl nganerl-alhetyek.

⁴⁰ Alakenh-anyem rernem ayen kanty-akert 4-pel rwep-they akek. Ayen kanty-akert rernem ipertek aylperl-alhetyek. Rernem rtnwa renh kwaty impalth-warl akngartewek. Ikwerpenhan kalikw sail mpwarek, awerel rtnwa renh kwaty impalth-warl-athek akngeynetyek.

⁴¹ Rtnwa ra ahern-itwek mwernelhek. Akwerlp ranem ahern-itwek mwernelhek. Ikwerpenhan kwatyel rtnwa ingkern-ampeny ngkweltyilek.

⁴² Ahelengkw-rnem ingkerrenh iterrek, artwa tyayl-areny-rnem ingkerrenh ipmek atwetyek, rernem anterekerr.

⁴³ Julius atyetyart Rome-areny ilkelhek, Paul ra iteth anetyek. Alakenhaym ra ahelengkw-rnem arrkngert angkek. Ranem renh-rnem ilek kwaty-warl alyeyamparl alhetyek artempel-warl.

⁴⁴ Artwa akwerrp-rnem ra ilek, rernem ngkwelty rtnwepenh anterrkwemel alyeyamp pwerlpirrenh. Kel artwa ingkerrenh-anem mwerrantey kwaty impalth-warl artarnpenhek.

28

Akwerlp itnan Malta

¹ Anantherr ingkerrenh kwaty impalthel ahern-itwek-anem rtney-alhek. Apmer-areny-rnem anwekantherr ilek, akwerlp renh itnan Malta.

² Apmer Malta-areny-rnem rernem anwekantherr inkwerelhek. Kwaty rntwenh. Rernem anwekantherr rwa arrtyek, anwantherr arlter-rngirretyek, irrentel anwenhantherr atwekerr.

³ Paul-el-anem ngkwelty akwetyemel rwewarl iwek. Rtnwem-anem ikwer-they tyerrelhey-ayntek, iltyanem renh tnhwek.

⁴ Apmer-areny-rnemel arek, rernem alakenh angkerrenh, “Artwa nhenhan artwa ahelengk-warl. Ra nthakenh iteth aney-angenh, lyert ilwem.”

⁵ Paul-el-anem rtnwem renh rwewarl iwemel arrtyek, Paul ra arntetyirrey-angenh.

⁶ Apmer-areny-rnemel renh artewentyel arenh. Rernem arenh, ra wangketyek-arrpantey, rtnwemel tnhwem-penh, ra ilwetyek-arrpantey. Rernem renh aleth-antey arenh. Ra mwerr aleth anenh. Rernem alakenh-anyem angkerrenh, “Artwa nhenh altyerr!”

⁷ Artwa Publius akwerlp ikwer atyetyart anenh. Ra anwekantherr inkwerelhek, warl ikwerenh-warl akngeynek. Anwantherr arlta irrpetyel ikwer-itwek anenh. Anwantherr awek Publius-kenh aynikw arntety ayntenh rwenpirrek, atnert-then akaltheek.

⁸ Ikwer-warl alhemel, Paul ranem Akngey-warl angkek. Ranem iltya ikwerenh ikwer-warl ar-rernek. Publius-kenh aynikw-anem mwerrirrek.

⁹ Rernem awek-penhan, arntety-rnem Paul-warl apetyenh, Akngeyel-anem renh-rnem mwerriletyek.

¹⁰ Rernem anwenhantherr tnakek, amern-akerr antheek, alethel alpetyek.

Paul Rome-warl alheyel

¹¹ Malta ikwer-itwek rtnwa ingwer anek. Alherrp-kety arrwekel-antey apetyek. Rtnwa Alexandria tawen-they apetyek, rtnwa itnan ikwerenh Akngey Atyewenheng. Anantherr Malta ikwerel alkent irrpetyek-atwety anenh-penh anwantherr rtnwa ikwer-warl-anem nganek, kwatyel aleth alhek.

¹² Anantherr Syracuse tawen-warl artarnpenhek. Syracuse tawen ikwer-itwek arlta irrpetyinger anenh.

¹³ Ikwer-penhan anwantherr Rhegium tawen-warl-anem anper-alhek. Arlta ingwerelan awerel-anem kel antekerr-they-anem pwek, anwantherr arlta atherr-penh Puteoli tawen-warl-anem alhek.

¹⁴ Tawen ikwer-itwek anwantherr Jesus-arl apenteyel irrpety arek, rernem anwekantherr yangkelhek, anwantherr wik anyent anetyek.

¹⁵ Jesus-arl apenteyel Rome-arenyel awak, anwantherrarl apetyek, rernem anwekantherr-warl-athek apetyek, ampep-warl, rlwatetyek. Appius tawen Three Taverns tawen-warl. Renh-rnem aremel, Paul Akngeyek inkwerelhek, rantey arrpemarl arnkatyirrek. Ikwer-penhan anwantherr Rome-warl-anem anperl-alhek.

Paul Rome-el aneyel

¹⁶ Rome-itwek-anem kapmentel Paul renh tyarlewek rarl warl-itwek anetyek. Rernem ahelengkw anyent thwenek renh atnyenetyek.

¹⁷ Arlta irrpety-penh Paul atyetyart Jew-rnemek yangkelhek. Rernem kel anyentirrek.

Ra renh-rnem ilek, “Atyenh-rnemay, atha anwekantherrenh-angkwarr akengenty mpwarey-angenh, ayeng arrwekeleny-rnem apmwangkwarr alhey-angenh. Jew-rnemel ayenh anterrkwemel thwenek, Rome-areny kapment-warl.

¹⁸ Rernem ayenh ayernek. Rernem ayenh iterl-arek ayengarl artwa arla. Rernem-anem ilkelhek rernem ayenh ipmek atwey-angenh tyarlewe-tyek.

¹⁹ Jew-rnem atyetyart-rnemel ayenh ayntarrp-ilek. Alakenh-anyem ayeng angkek, ‘Ayeng ilkelheyel Atyetyart ilkwa Caesar-elant ayenh court-itwek ayernetyek.’ Atha nthakenh anwekantherrenh-rnem ayntarrp-iley-angenh.

²⁰ Arrenhantherr iletiek, ayeng arrekantherr yangkelhetyek. Ayeng lyert tyeyn-akert aneyel. Ilek-they? Atha Akngey-kenh Itethiley-angker tnakeyel. Itethiley-angker renh Akngeyelarl alhelek, Israel-kenh-rnem-warl thwenetyek.”

²¹ Jew-rnem atyetyart-rnemel Paul renh ilek, “Aray, apmer Judea-areny-rnemel pip anwekantherr-warl thweney-angenh-antey ngkweng-they. Artwa rernem apetyey-angenh-antey, ngenh ayntarrp-iletiek.

²² Anantherr ilkelheyel, ngenh awetyek, ngarl ilelhem. Anwernantherr awek apmer arrpanenh-they ingkerrenharl Jesus apenteyel-rnem-kety arlkarirreyel.”

²³ Rernem-anem angkerrenh arlta ingwerel rernem anyentirremel angkerretyek Paul renh awetyek. Arlta ikwerel rernem Paul-warl apetyek. Paul ranem ikwer-rnem angkek

ingwepenh-they atwerrpek-atwety. Ra renh-rnem ilek, “Jesus ra Inkart ingkerrenhek aneyel.” Rantey arrpemarl renh-rnem ilek, “Moses-kenh angka arrwekeleny Akngey-kenh angkakert-rnem arrwekel Jesus-ek angkerrenh.”

²⁴ Ingwer-rnemel-anem ikwer-penhan angka tnakek. Ingwer-rnem-anem arrangkw, tnakey-angenh.

²⁵⁻²⁹ Paul-el renh-rnem ilek, “Itnweng rant arraty innga angkek, Akngey-kenh angkakert arrwekeleny Isaiah-angkwarr, ra arrwekeleny-rnem ilekarl, ‘Akngey renh-rnem ilay, arrantherr arternp innga awelhey-angenh. Arrantherr nthakenh iterl-arey-angenh. Arrantherr intem-antey arerl-aneyenh. Arrantherr nthakenh iterl-arey-angenh. Akngerr iyipa akentelhek, atyeng mwerranty awelhey-angenh. Annga ikwer-rnem aparrngirrek. Atha renh-rnem alakenh ilek, rernem annel aretyek, rernem iyipel awetyek, rernem-anem atyeng arraty-angkwarr awelhetyek. Ikwer-penhan atyeng-warl angkepirretyek, athanem renh-rnem mwer-riletyek.’ Alakenh-anyem Akngeyel Israel-kenh-rnem ilek.”

Paul-el renh-rnem ilek, “Angka nhenh Akngeyel ingkerrenh Jew-weny-rnem itethiletyek, angka nhenh atha renh-rnem ilek, rernem angka nhenhek awelheyek.” [Rernem ilterrek. Ikwer-penhan rernem alpek.]

³⁰ Paul-anem aherrety atherrel-anem anenh, warl anyent rent-emilemel. Rernem ikwer-warl ilkwatherr apetyek.

³¹ Ranem renh-rnem arnkatyel akalty-anthek, Akngey ra Inkart ingkerrenhek aneyel. Ra Inkart Jesus Christ-kenh angka akalty-anthek, Akngeyelarl renh thwenek. Ingkerrenh ikwer awelhek, ingwerel renh tyerney-angenh.

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 18 Apr 2025 from source files dated 10 Nov 2023

284d4e02-292d-5bd8-a8a6-8360a307b937